



# مَعَالِيقُ مَبَارَاتِ مُلْكِ شِيرَازِ

ایکینجی قسم

مکاتیب رشیدیہ مخصوص اولوب اصول اداره و حیا  
اجتماعیہ منزہ دائر مباحث مفیدہ پی حاویدر .

محوری

دو قطور : حاذق

یکی پروغرامہ توفیقاً عموم مکاتیب رشیدیہ لرینک اوچنچی  
سنہ سنہ تدریس ایدملک اوزره قبول ایدلمشدر .

اوچنچی طبعی

محوری طرفیندن یکیدن تصحیح و تعدیل اولنمشدر .

صاحب و ناشری : کتابچی الیاس

درسمادت

قناعت کتبخانه و مطبعہ سی

۱۳۲۸

T- 110

قَنَا لَعَنَ كُنَّا لِنُخَابِئِ  
بَابِ عَالِي جَاهِدِ سَدِ



تفقیه  
۱۹۵۹

برنجی بحث ۹۹

۹۹

۳ جمعیت بشریه نك صورت تشكلى

اسان ويازينك منشائى

انسانلر جمعيت تشكىل ايتمزدن اول برلرندن آيرى اوله رق  
اورمانلرده ، طاغلرده ، مغاره لرده يشارلردى . بولندقلرى  
محللرده كى حيوانلرى اولامق ، كندى كندينه يتيشن آغاچلرك  
ميوه لرني يىك صورتيه كچيرلردى . اللرنده آلت مدافعه  
اوله رق بسيط بر ذكالرندن باشقه هيچ بر شى يوقدى . فقط  
بوسايه ده انسانلر اك مدهش اك قورقنچ حيوانلرى بيله هلاك  
دوزاغنه دوشورلردى . قارنلرى آجيقدينى زمان او آرامغه  
كيدرلر ويك درلوقورنازلقله اولرني الده ايدرلردى . ياقالادقلرى  
حيوانلرك اتلرني ير ، دريلرني دخى كيپرلردى .

صغونك شدنه مانع اولمق ايچون آتاج دالارندن قيسالر  
آره سنه نهرلر ، كوللر كنهارينه ، قباتا صلاق برر قوبله ياپارلردى .  
ايسته شوصورتله حيات سورن ايلك اجداد مزده اتحاد  
واجتماعه بر ميل طيبي كوريلوردى . حيوانلرده دخى اجراى  
حكم ايدن بو آرزوى جمعيت بو تون حيواناتك اك مكمللى اولان  
انسانلرده بالطبع ده ازياده ايدى . چونكه انسانلر اتحاد واجتماع

ایتمه‌مش اواسه‌لرایدی شو و اراق غوغا-نك ده‌ایلك هجو‌نده  
 مغلوب اولملری ، دیگر حیوانلرک پنجه‌لری آلتنده ازیلوب  
 کیتملری شبه‌سز ایدی ... اوت ! اتحاد واجتماع ایتمیوبده‌حال  
 انفرادده‌قالانلر غدای یومیلرینی بیله تدارک ایدمه‌یه‌رک آچلقدن  
 صوسز لقدن اولوب کیدرلر ؛ دیگر وحشی حیواناته شکار  
 اولورلردی . ایتمه‌ایلك اجداد من‌کندی موجودیتلرینی تأمین  
 ایتک و مجادلهٔ حیات صفحه‌سنده غالب کله‌بیامک ایچون تا  
 اوزماندن اتحادک قوت یابدیغنی اییدن‌ای‌یه درک ایتملر ، بتون  
 ترقیات و کمال‌تک‌اساس و منبئی اولان قوتک دخی آنجق اتحادله  
 الله ایدیه بیله‌جکفی دوشونمشلر و اوپله‌جه حرکت ایتشلر  
 ایدی . ایتمه‌تا اوزماندن - تخمیناً یوزبیک سنه اول - باشلایان  
 ایلك اتحاد واجتماع بویه‌جه طاغرده کوچیه‌حائده بده ایتشدی .  
 ایتمه‌بوایلك اتحاد سایه‌سنده ایلك اجداد من‌کندی دشم‌لرینه  
 غایه چالیدیلر . و بوسایه‌ده ادارهٔ حیاتلرینی تأمین ایتیدیلر .

او ایلك اجداد منک باشایه‌جه دوشونجه‌لری شو ابتدائی  
 جمعیتلرینی ترقی ایتدیرمکدی . بونک اوزرینه جمعیتلرینی چوغالتمه  
 و نقصانلرینی اکماله چالشدیلر . ابتدائی اوتوز قرق قولبه‌لی  
 برکوی ویا قبا حصارلردن طوقونمش چادرلرده ساکن برر  
 کوچیه‌حائنه‌کلیدیلر . فقط اوج درت‌کشیدن عبارت اولان  
 بر عائلده بیله اداره و انتظام‌طبیعی اولدیغندن بوزلرده کنیدی  
 اداره‌لرینی تنظیمه‌باشلادیلر . ایچلرنده هپسنگ اعتمادی اولانلر .

## جمعیت بشریه مک تشکی

دن بریسنی کندیلرینه رئیس انتخاب ایتدیلر و یکدیگرلریله اولان حسن امتزاجلرینی تأمین ایچونده آره لرنده بر طاقم بسیط قانونلر قویدیلر .

اوزمانک عالم ، فیلسوف و بوتون خلقتک ذهنی اشغال ایدن مهم بر مسئله وار ایدی که اوده آره لرنده تعاطی افکار ایچون برلسانک وجودی ایدی . کرچه ابتدالی بر طاقم اشارتلی ، حایقمره لر مختلف اوضاع و اطوار ایله یکدیگرینه افاده مرامه مقتدر اولیور ایدیه لرده بو اولرک افکار وحشیاتی ترجانه کافی گلزدی .

ایشته فلسفه بشریت قدر قدیمدر . فقط فلسفه دائماً هبرم اولان مجهولاتی حل اتمکله اوغراشدیفندن اوزمانک فلسفه سیده برلسان یایه بیلمک ایچون لازم کلن کله لری بولمقدن عبارت ایدی . ایلک اجدادمن بونی دخی بک قولای وطیبی بر صورتده بولدیلر . ایلک اول کوزه جاربای هر جسمه ، هر شیئه برر اسم ویرمک لازم ایدی . بواسمی ایسه او جسمک ویا اوشینک طبیعی اوله رق حاصل ایتدیکی صدا ایله توسیم ایتدیلر که بوکا توسیم بالقیده الصوت « onomatopée » دینور . مثلاً برنهره اسم ویرمک ایچون اونهرک آقارکن حاصل ایتدیکی حشیرتی بی ، بر آغاجه اسم ویرمک ایچون روزکار اسرکن حاصل ایتدیکی اهتزازی ، الحاصل بر قوشه ، بر حیوانه بویله جه حاصل ایتدکری صدای طبیعی بی عیناً تقلید ایدرک اونلره اسم ویردیلر ؛

ايسته بو صورتله لسان ابتدائينك ايلك كلهلري بولمدي . فقط بر طاقم جسملر وار ايدى كه اونلر طبيعي اوله رق هيج بر صدا چيقارمزلايدى . حالبوكه بونلرده برر اسم ويرمك لازم ايدى . بزم قوجه داهيلر بونك ده چارمىنى بولديلر . اولجه صدياي تقايد ايدمك بولدقلرى كلهلرك بر ايكيمنى بر بريله برلشديرهرك صدا چيتارميان جسملره اسم ويرديلر . برزمان صوكره كوزه چارمىيان فقط فكراً موجود اولان بر طاقم شيلرمده اسم ويرمك واونلر ايجونده برر كله بولمق لازم كلدى . اوايلك فيلوسوفلر بوكاده موفق اولديلر . كرك صدياي تقايد ايله وكرك اونلرك امتزاجيله بولدقلرى كلهلرك اول و آخر لرينه كايشى كوزل برر حرف ويا كله علاوه ايدرك بو صورتله فكراً موجود اولان شيلرمده اسم ويره بيلديلر . الحاصل بوسايه ده ايلك لسان يواش يواش تكمل ايتدى . علم السنه نك فلسفه سنه كوره بوايلك اجداد منرك توسيم بانه تاييد الصدا ايله بولدقلرى ايلك كلهلرك عددى بشيوز صداى طبيعىدن عبارتدر . حال حاضر ده هر هانكى برلساندن اولورسه اولسون بر كله آتوبوده علم السنه اشتقاقچه اصلى واساسى آرائيلورسه اك نهايت او بشيوز صداى طبيعىدن بريسنه منجر اوليور [\*] فقط اسانيونك بولدينى بوايلك بشيوز صداى طبيعىنك

[\*] مثلاً: فرانسزجه تاريخ معناسنه اولان histoire كله سنى الهجى اولورسه ق بونك اصلى لاتينجه histor كله سندن عبارتدر . بوايه his ايله tor دن مركبدر . his اصل اولوب tor ايسه صوكره دن

اوزما نلر هانكى جسمه اسم و يرلدىكى بوكون مجهول اولوب اساساً معلوم اولسه بيله بوكا لزوم يوقدر .

بربرينك ديلندن آكلاميان ايكي كيمسه بربرينه مرام اكلامق ايجون ابتدائى اولان بواصوله رعايته مجبور قاليرلر .  
اولا اشارتله صوكره بيان ايتك ايتدكلرى اشياني تقليد ايله مرام آكلا تيرلر . انسان بوقدر تكمل ايتدىكى حالده قوللانديغمنز كلهلرك ايجنده بك چوق تقايدلر واردر . مثلاً جوجيو ، هودهود ، غوغو ، هپ او حيوانلرك صدالرينى عيناً تقايد ايله ويرلش برر اسمدر .

بوندن صوكره ايلك جمعيتك داهيلرينك ذهني بر مسئله مهمه ده اشغال ايدر كه اوده كرك بولدقلىر بوكلهلى و كرك بوكلهلرله افاده ايتدكلرى فكرلىر بربره يازارق اونلرى ابدىاً حفظ ايتك مسئلهسى ايدى . بونى دخى بك قولايلاقه بولديلر . اسم بولق ايجون اجسامك صدالرينى تقايد ايدىورلر ايدى . كله بولق ايجونده اجسامك شكللرينى تقايد ايتمكه باشلاديلر . بر آغاجك ، بر قوشك ، بر نهر ك رسمنى چيزمكله اونلرى افاده ايدن كلهلى بولديلر . يازى يى ابتدالى قوملر اوزرينه ؛ سيامكور و تباشيرلرله ديوارلر ، ياپراقلر و تحتلر اوزرينه يازمغه باشلاديلر . لسان تكمل ايتدكجه يازى ده تكمل ايتدى . نصل كه بوكون قوللانديغمنز

علاوه ايدلش برادات انتهائى اولديغندن كبرى به اصل اوله رق his قاليركه ايشته بو his اوبشيو ز صدای طبعیدن بر يسيدر .



لسانك هر بركله سی ال ابتداکی صدایی تقایدایله قونیلان کله ركه  
 ترکیب و تخایطیله حاصل اولمش ایسه شمیدیکی حروفاتمزدده ال  
 ابتداکی اشکالی توسیم ایله بولنان حروفاتك تخریف وتبدیلندن  
 حاصل اولمشدر. بوکون هر هانکی لساندن بر حرف آتوبده  
 اصول مخصوصه-ینه حال ابتداییسی آراناسه بر قوش، بر حیوان ویا  
 بر جسمك رسنه منجر اوله جنی شبهه سزدر. خلاصه، جمعیتك  
 ایکی ركن اعظمی اولان لسان ایله یازی بولندقدن صوکره آرتق  
 جمعیت بشریه ساحه ترقیده سربع آدملر آتغه باشلادی. جمعیت  
 بشریه تکمل و ترقی ایتدکجه اوجعتی اداره ایتمک ایچون قونیلان  
 قانون و نظاملرده زمانه کوره تعدیل ایدایر و هر زمانه موافق،  
 سعادت و رفاه عمومی یه مطابق یکی یکی قانون و نظاملر قونولورایدی.  
 بشریت ابتدا کندینه بویله يك طبیعی و حقیقی بر یول بولدینی،  
 تکمل و ترقیسنه آنکدار بر صورتده دوام ایتدیکی حالدهینه کندی  
 غفلتی نتیجهسی اوله رق اوکنه بر طاقم مانه لر چیقیدی که بشریتی  
 بیکلر جه سنه دزبری ساحه ترقیده بر خطوه بیله آتدیرمدینی کبی  
 نیجه عصرلردن بری طیرمانه دیدینه الده ایدیلن بوقدر محصول  
 مساعی بی، آثار عمومی بی دخی محو و نابود ایتدی. بشریت  
 قورتلسی مشکل و بلکه ده غیر قابل بر کیرداب هوانا که دوشدی.  
 بومانعلر، بو کیردابلر ادیان و مذاهب باطله نك ظهوریدر.  
 انسانلر کندیلر نده تجلی ایدن بونور عقل سایه سنده نظرلرینه  
 چاربان بر طاقم علائم و حادثات طبیعیه قارشى مفتون و حیران

قالبرلردى . ابي دوشونلرى حيرت و تقديرلرني جلب ايدن بو  
علامتى تماشاليندكجه اولورك بر صانع حقيقتيك وجود و موجوديتنه  
دلالت اينديكنه قائل اولورلر و او علامتدكل ، او صانع  
حقيقيه قارشى تعبد ايدرلردى . فذا دوشونلرى ايسه اوقدر  
درينه و ارميوب كوزلرينه چاربان هر علامتى برر معبود مطلق  
كبي طائيرلر ايدى .

فقط مع اتئاسف ابتدائى بر ذكاده آنجق شق ثنائى كثير  
اتوقوع و غالب ايدى . شق اولدن بولنسه بيله پك ايلرى  
واره منزل و نهايت طوفان بطلان ايچننده بوغولورلر ايدى .  
بشریت اديان و مذهب باطله دن مشكل سورلر ايچنده اسير  
اولدى . او دهشتلى مانع ترقى سورلرى ييقيمى غير قابل  
ايدى . چونكه زمان ايله بشريتك تكملى يرينه او اسرار  
و استبداد سورلرى تحكيم اولتوردى .

بر زمانلر بشریت پترلر اسير اولدى . طاشدن طوپراقدن  
ياپييلان صنمملره طابدى . بر زمانلر كونشسه ، قره ييلديزلره  
خلاصه آتسه پرستش ايتدى . بر زمانلر حكمدارلره اسير  
اولدى . بونلرك هر بريسي بيكلرجه سنه دوام ايتدى . بو  
زمانلر هپ « ماضيلرى آتيلره قلب ايتمكه مأمور » ايدى .  
اك نهايت پك يقين زمانلرده ، تخميناً ايكيوز سنه اول انسانلر  
راه حقيقي كورمكه باشلاديلر ، كنديلرني محو ايدن موجو -  
ديتيريني كيرن اسباب و موانعك كافه سنى سوكوب آتمغه

جسارت ايتديلر چونكه حقيقت بي تيرسه مدافعه ايديلر .  
 نور معارف يك يقين زمانلرده حقيقتي انسانلره اظهار  
 ايديه بياش ايدك . يك يقين زمانلرده انسانلر مشروطيتلر  
 تأسيس ايتديلر ، جمهوريتلر ك اساسي قورديلر . حريتي دائما  
 اوكلارنده حقيقتك برره بري اتخاذا ايدنديلر . فقط مع الناسف  
 بونلر يك محدود فرقه لرايچنده وقوعه كلدى . صحنه بشريتك بر  
 كوشه سندن چيقان بو صداي حقيقت هر طرفه عكس ايتدى .  
 هند ، چين كبي بر طاقم اديان ومذاهب باطله نك اسيرى اولان  
 وييكلرجه سمنه لردنبرى ساحه ترقيده بر آديم بيله آتيمان ايكي  
 قوم ضاللين بشريتك كوز ياشلريله ، قانلريله ، غيرتليله الحاصل  
 بوتون موجوديتليله ديدينوب طيرمانه ميدانه كتيرديكي اومجوع  
 كالاتى محوايمك ايجون حاضر در . اونك ايجون كندمزي دكل هم  
 جنسلرمزي ده ايفاظ وتشويق ايتملي يز . اكر بز يالكنز باشمزه  
 تكمل ايدرده محيطمزي جاهل براقيرسه قبز اولنره اولرده بزه  
 قارشى امانسز بر دشمن ، دواسز بر درد اولور . سعادت  
 عموميه حصـوله كله بيايمك ايجون عموم انسانلر ك متحد اتكمل  
 و ترقـيـلـرى شرط اعظمدر . عكس حالده برينك فضائلي  
 ديكرينك رذائيله ستر و افذا اولتور .

### خلاصه

۱ — انسانلر جمعيت تشكيل ايتزدن اول ناصل يشارلرايدى؟

انسانلر جمعیت تشکیل ایتمزدن اول بربرلزدن آیری اوله رقی داغلرده ، اورمانلرده ، مفاره لرده یشارلر ایدی .

۲ — انسانلر جمعیت تشکیل ایتمکه نهدن لزوم کوردیلر؟

انسانلر احتیاج اوژرینه جمعیت تشکیل ایتمکه لزوم کوردیلر .

۳ — انسانلرده کی بو احتیاج نه ایدی ؟

انسانلرده کی بو احتیاج حیات شخصییه و حیات نوعیه لرینک حفظ ووقایه سندن عبارت ایدی .

۴ — حیات شخصییه نه در ؟

حیات شخصییه دیمک دیمک ، ایچمک ، کیمک و دیگر بردشمنک شرندن کندینی محافظه ایلمک کی ترکی غیر قابل برطاقم لزوم و احتیاج قطعیدن عبارتدر .

۵ — حیات نوعیه نه در ؟

حیات نوعیه انسانلک بقا و نسلی ایچون جوجقی یتیشدیرم سندن و اونلک دخی کندینی اداره ایده بیله جک بروراده به کلنجه به قدر حیات شخصییه سنی محافظه ایلمسندن عبارتدر .

۶ — جمعیتدن نه فائده وار ؟

جمعیت اتحاد ، اتحاد ایسه قوت دیمکدر . بر جمعیت نه قدر قوتلی اولورسه او نسبتده کندی دشمنلرینه مقابله ایدر و اونلرک دندان تعرضنه دوشمکدن قورتلور . بوندن باشقه هرکس بربرینه یاردم ایدرک بربرینک احتیاجنی تسویه ایدر .

۷ — انسانلر ایلمک جمعیتی تشکیل ایدر ایتمز اک جوق نه به

احتیاج حس ایتدیلر ؟

انسانلر ایلمک جمعیتی تشکیل ایدر ایتمز ، یکدیگر بیله تعاطی افکار ایچون ، اک زیاده لسانه لزوم و احتیاج حس ایتدیلر .

۸ — ایلمک اول ایلمک لسانی ناصل بولدیلر ؟

ایلمک اول ایلمک لسانی هر شیشک سه سنی تقلید ایدرک بولدیلرکه بوکا سه سی تقلید ایله اسم و برمه دینور .

۹ — سه س چیقارمیان شیلره فاصل اسم ویردیلر ؛  
سه س چیقارمیان شیلره دخی اسم ویرمک ایچون اولجه سه س  
چیقاران جسملره ویردکلری اسملرک بر قاجنی بر بریله بولشدیره رک  
اسم ویردیلر ؛

۱۰ — ذهنأ موجود اولان شیلره فاصل اسم ویردیلر ؟  
ذهنأ موجود اولان شیلره اسم ویرمک ایچون اولجه بولدقلری اسملرک  
اول و آخر لرینه بر طاقم کلمات علاوه سیله اسم ویردیلر .

۱۱ — لساندن صوکره اک زیاده نه یه احتیاج کوردلی ؟

لسان دن صوکره اک زیاده یازی یه احتیاج کوردلی .

۱۲ — ایلک اول ایلک یازی بی فاصل بولدیلر ؟

ایلک اول ایلک یازی بی اجسامک شکل لرینی تقلید ایدره رک بولدیلر که  
بوگاده شکلی تقلید ایله یازی دینور .

۱۳ — انسانلرک ترقیسنه مانع اولق ایچون نه کبی اسباب ظهور ایتدی ؟

انسانلرک ترقیسنه مانع اولق ایچون ادیان و مذاهب باطله ظهور ایتدی .

۱۴ — انسانلرک ترقیسنه مانع اولان بوادیان و مذاهب باطله نه لزدر ؟

انسانلرک ترقیسنه مانع اولان بوادیان و مذاهب باطله پک چوق  
ایسه ده باشلیجه لری بت پرست ایله مشرکین و سائره در .

۱۵ — ادیان و مذاهب باطله دن ماعدا انسانلرک ترقیسنه مانع

باشقه بر سبب واری ایدی ؟

ادیان و مذاهب باطله دن باشقه انسانلرک ترقیسنه مانع اولان مستبد  
و ظالم حکمدارلرک ظهوری ایدی . دین غوغالریله حکمدارلرک حرص  
و طمع لری دنیای آلت اوست ایدردی .

۱۶ — سعادت عمومییه حصوله کله بیلیمک ایچون نه لازمدر ؟

سعادت عمومییه حصوله کله بیلیمک ایچون عموم انسانلرک متعده  
و متفقاً تکمل و ترقیلری شرط اعظمدر . عکسی حالنده برینک ایلکی  
دیگرینک کو تولوکیله افنا اولنور .



## ایکنجی بحث

### حکومت لک صورت تشکل و انواعی

انسانلر هر درلو احتیاجلرینی آنجق یکدیگرینه معاونت سایه-  
سندہ تحت تأمینہ آلہ بیلیرلر . بومعاونت ایسه تقسیم اعمال و سہمی  
مشترکہ میدانہ کلیر . تقسیم اعمال و سہمی مشترک دخی انسانلری  
جمعیته پشامغه مجبور ایدر . شو حالده جمعیت عین بر مقصد  
اوزرینه اجتماع و اتحاد ایدن و بر برینک مذافع و سعادتنی تأمینہ  
چالیشان بر چوق انسانلرک هیئت مجموعہ سیدر . فقط بر جمعیته  
مقصد تشکلندہ غایت مهم بر نقطه واردر که اوده اوجہیتی تشکیل  
ایدن افرادک کانہ سنک محافظه حقوق و تأمین سعادتلریدر . بر  
جمعیت کندی افرادینک حقوقلرینی محافظه و سعادتلرینی تأمین  
ایده مزہ اوجہیتک وجودیہ عدم وجودی مساویدر . او حالده  
هرشیدن اول جمعیت کندی موقعنی تحت تأمینہ آملی که آندن  
صوکرہ افرادینک حقوق و سعادتنی دوشونہ بیلسون . بوندن  
آکلاشیلیور که هرشیدن اول جمعیته انتظام و دوامی شرطدر .  
جمعیته انتظام و دوامی ایچون حکومتک وجودینه احتیاج  
واردر . چونکہ حکومت اولمازسه بر جمعیت دخالندہ انتظام

و آهنگ عمومی پایداری اوله من . افکار بشریه بک مختلفدر ،  
 الک مطلق بر نقطهده بیه بر جوق معارضلر بولنور . بعضاً ایکی  
 کشینک فکری بیه بر نقطهده جمع ایتک ممکن اوله من . حالبوکه  
 مجموعی ، یایونلره بالغ اولان بوقدر انسانلرک فکر لرینی هر زمان عین  
 بر نقطهده جمع ایتک قابل دکلدر . بونک ایچون دائماً اکثریتی  
 قازانلره حق ویرمک و دیگر لرینی سکوته دعوت ایتک لازم  
 کلیر . بوندن بشقه بر جمعیت داخنده مضر کیمسه لر اکیمک  
 اولمز . بر جمعیت افرادینک کافه سی عین صورتله تکمل ایدمنز ،  
 ایچلرنده جاهلر سفیللرده ، قاتلرده بولنور . بونلر ایسه یادوشونجه سز  
 حرکتلریله و یا افکار ظالمانه لر یله جمعیتک دیگر افرادینی ، بالذات  
 کندنی قرداشلرینی اصراره ، ماللرینی جانلرینی یا غمه و تلفه قیام ایدرلر .  
 اوجمهیت داخنده کی شیرازة انتظامی بوزارلر . راحت عمومیه یی  
 سلب ایدرلر . بناءً غایه اورته لق قارمه قاریشیق اولور .  
 میدانده نه جمعیت نه ده افراد قالیر . ایسته حکومت آهنگ  
 وانتظام عمومی یی تأمین ایتکله برابر جمعیتک بقای تحت امنیته آلمش  
 اولور . بناءً غایه جمعیت انسانلر ایچون فاصل بر امر طبیعی  
 و مجبوری ایسه حکومت ده اوجمهیتک بقا و تأمین سعادت ایچون  
 اویله جه بر امر طبیعی و ضروریدر . جمعیتلری اداره ایدن بو  
 حکومتلر بک مختلفدر . فقط باشایجه بش سیوک صنفه تقسیم ایتک  
 ممکندر . بونلردن برنجیسی حکومت مطلقه ، ایکنجیسی حکومت  
 مشروطه ، اوچنجیسی حکومت جمهوری ، دردنجیسی حکومت

خواص، و بشنجهیسی دخی حکومت عوامدن عبارتدر .

۱- حکومت مطلقه: جمعیتک ادارهسی صرفی حکمدارک اداره کیفیه سنه تابمدر. پک نادر اوله رقی بونلرک ایچنده ارباب کمال کایرسه بو حکومت ترقی ایده بیلیر . فقط بویله برادارهده ظلم و استبداد یوزده یوزدر. چونکه یالکیز رکشی همده کوچکدنبری فقر و سفالت چکمه مش، اها لیک حالته واقف اولماش جاهل برکشی نه قدر عقللی ، درایتلی اولورسه اولسون میاونلرجه کشیک احتیاجلری نی بیلهمز؛ و بیلسه بیله عمومی حسن اداره ایده مز . بونلرک ایچنده حسن نیت صاحبلری بوانوبده ملتک سعادتنه چالیشسه بیله ینه قاش یاپارکن کوز چیتارر . نتیجه سی ظلم و هلاک عظیمدر . حکومت مطلقه بوکون دنیادن قالد یرلمشدر . فقط مع التأسف اها لیسى نسبتاً جهالت ایچنده قالان بعض یرلرده ینه اجرای ظلم و خبانت ایتمکده در . حکومت مطلقه نك اجرای حکم ایتدیکی محالرده ذره قدر تکمل و ترقیدن اثر کوزیله مز . چونکه حکومت مطلقه نك حکمدارلری آنحق کندی موقع خود بینانه لرینی تحت تأمین آله بیلیمک ایچون دائماً اها لینی جاهل براتق و آنحق بو سایهده کنسیدی اوامر و نظامات مستبدانه لرینه منقاد و مطیع ایتمک مسلك سقیمنی تعقیب ایدرلر . نور معارفک کیرمیدیکی بریره ایه نه تجارت ، نه صنایع ، نه زراعت کیرر . هرکس ظلم ایچنده حقیقی کوره مز . برکور شوغاسیدر کیدر ، آور و پاده بوکون بزه حیرت و یرن ثریات



استبداد دورنده دكل حریت زماننده وجوده ككشدر. اونلرده ظلم واستبداد آلتده بولندقلری زمان بزدن دهافنا برحیات سفایه به محكوم اولشلر ایدی . بزم حكومتتمز آلتیوز سنه لك بر حكومتدر . عجیابومدت عظیم ظرفنده انسانیتنه نافع آلتی باره لق بر اثر تكمل وترقی كو ستره بیلیرمی یز ؟ خیر ! چونكه بز آلتیوز سنه دنبری انسانیت ایچون دكل آنحق بر حكمدارك كیفی ایچون چالشصدق ، قان دوكدك . كوزلرمن اوزمانلری نور حقیقتدن محروم اولدی ، وطنمز فقر وسفالفتك مدھش برمنبی حالی آلدی . بزم پادشاهلرمنك بر قاچندن ماعدا هپسی مستبد وظالم ایدی ؛ هپسی صرف كندی منهقی ایچون چالیشیردی . تاریخمز بونك شاهد عدیلدر . كندی قرداشنی ، باباسنی ، اوغلنی اولدورین آز بولنور .

مقصدملك تلیری فتح ایتمك دكل اونلری حسن اداره ایتمكدر بزم اسكیدنبری اولان سوء اداره منسائقه سیله دركه وقیله قوشه رق سنجاغمزك آلتنه كیرن صربلر ، بانغارلر ، قره طاغلر ، بجارلر ، لهیلر ، رومانیا لیلر ، تانارلر ، كورجیلر ، صوكر بدن قان دوكدك بزدن آیرلایلر . چونكه بز اونلرك سعادتلرینی تأمین ایتمك شویله طررسون حقوق حریتلرینی ده غصب ایتمش ایدك . فقط بوكون بر حكومت مشروطیه مالیکز ، او سایه ده اسکی ضررلرمنی تضمین ایچون بوكوندن اعتباراً متین وسریع آدلر آتملی یز . چونكه اوتوز اوچ سنه دنبری چكدیكیمز

استبدادی دکل آلتیوز سنه دزبری اوغرا دیغمز فلاکتلری ،  
دوچار اولدیغمز ضایعاتی تضمینه مجبورز .

۲ — حکومت مشروطه : بونده حکمدار ایستدیکی کبی  
حرکت ایده من حکمدار ایله ملت آره سنده بر طاقم شرائط  
وضع اولنور که هرا یکسی ده اوشرائطدن آیریه من . هرنه اوله .  
جقسه ماته حکمدارک وکیللری طرفدن مذاکره اولندقدن  
صکره قبول واجرا اولنور . حکومت مشروطه بوکون الک اپی  
بر حکومتدر .

حکومت مشروطه ملت وکیللری طرفدن اداره اولنور  
بر حکومت اولدیغدن بالذات ملت حاکمیتی محافظه ایدر . هر  
ملکتک احتیاجی او ملکتک کوندردیکی وکیل طرفدن میدانه  
قونور ، وهیسی برلکده عموم وطنک منفعتی دوشونور . ملتک  
ویردیکی ویرکولر حکمدارک ذوقنه کینه صرف ایدلر . ینسه  
ملتک کندی آرزوسيله احتیاجنه ، شوکت وسطوتنه صرف  
ایدیلر . بزم حکومتمز هنوز مشروطه اولمشدر . ۱۰ تموز  
سنه ۳۲۴ و ۱۰ نیشان سنه ۳۲۵ تاریخلری اونودایه جق برر  
کوندر . ۱۲۹۳ سنه -نده مرحوم مدحت پاشا طرفدن یازیلوب  
قبول ایتدیریلن قانون اساسیمز بیک درلو حیهله و دسیسه ایله غصب  
اولندی . ملتمز ۳۳ سنه دزبری ظلم واستبداد آلتنده چورومش  
ومحو اولمش ایدی . اتحاد و ترقی جمعیتک سایه سنده روم ایلی  
طرفلرنده عموم عسکر واهالی حکومت مستبده عاینه قیام ایدرک

اك نهايته اردوايله استانبوله كلهرك حريمى قلعجلىيله سونكو-  
لريله آلديلر .

۳ — حكومت جمهوريه : حكومت مشروطه نك عيى اولوب  
يالكىز بش آلتى سنده بردفعه ديكشمك شرطيله ملت و كيلارى  
طرفندن منتخب بررئيس ايله اداره اوانور . جمهور رئيسى ايله  
ملت آرمه سنده برطاقم شرائط وقوانين قونولور . بوتون حكو-  
ماتلرك اك منتخبى واك حر و مترقىسى بودر . طبقى حكومت  
مشروطه كهى اولوب يالكىز حكمدار مجلس ميه و نان ايله اعيان  
طرفندن انتخاب اوانور . بوكاده جمهور رئيسى دينور .

۴ — حكومت خواص : بر جمعيتك زادكان و زنكىنلر  
طرفندن اداره اولنميسيدر . هر نه قدر انكلتره بوكا بر نمونه اوله رق  
كوسترييله بيلورسده اصل بونك نمونه سى يونانيلىرك فيلوسوفلق  
دورلرنده بعض مملكه كترلده كى زنكىنلر اهالىنك هم اداره و همده  
تميشنى درعهده ايدر مش . مختلف شهرلرده كى زنكىنلر مأمور-  
يتلى اولادلرينه انتقال ايمه مك شرطيله اومملكه كى اداره ايدرلر  
ايمش . بوده برنوع استبداد ديمكدر . همده آلتندن قورتملى  
غيرقابل بر استبداددر . چونكه دشمن بر دانه دكل كه قفاسنى  
ازيويرملى .

۵ — حكومت عوام : بر جمعيتك امور اداره سنك دوغروندن  
دوغره يه اوجميتك اهالىسى طرفندن اداره ايدلميسيدر بو اداره ده  
زنكىن فقير هپسى ذى مدخلدر . ياييله جق هر دبرلو اجرا آت

عمومک رأییاه یاییلور . بونلرک یعنی اهاینک فوقنده هییچ بر مأمور یوقدر . هبسی حقوق و اداره خصوصنده مساویدر . شمدی یه قدر بو طرزده بیوک بر حکومت تشکل ایتمه مشدر . فقط هر مملکتده آز چوق بونک نمونه سی کوریلور . اکثر مملکتلرده اهاینک مجتہاً طوبلانوب اجرا آت یایمهلری کبی . فقط بونلرده حکومت دینه من .

### خلاصه

— حکومتلر ناصل تشکل ایتدی ؟  
حکومتلر جمعیت بشریه نك انتظام و آهنکی ایچون بالجبوریه تشکل ایتدی .

۲ — حکومتلرک تشکلندن مقصد نه در ؟  
حکومتلرک تشکلندن مقصد جمعیتک انتظام و دوامنی تأمین ایتمکه برابر اهاینک حقوقنی دخی محافظه ایله مکدر .

۳ — قاچ نوع حکومت واردر ؟  
بش نوع حکومت واردر . اونلرده : مطلقه ، مشروطه ، جمهوریه ، عوام ، خواص .

۴ — حکومت مطلقه نه یه دیرلر ؟  
حکومت مطلقه برملتک اداره سنک یالکیز بر حکمدارک اداره کیفیه . سنه بر اقل مسندن عبارتدر . بونک نتیجه سی ظلم و استبداد اولوب اونلکده نتیجه سی هلاک عظیمدر .

۵ — حکومت مشروطه نه یه دیرلر ؟  
حکومت مشروطه بونده حکمدار ایستدیکی کبی حرکت ایده من

چونکه ملت حقوق و حریته مالکدر . علی العموم اداره ملتک النده در . هریر قوانین و نظامات بالذات ملتک و کیلری طرفدن قونولور . کرک حکمدار کرک ملت بوقوانیندن اسلا آبریه من . بوقوانینک زمانه کوره تبدیل و تعدیلی لازم کایرسه ینه ملت و کیلری طرفدن تبدیل و تعدیل اولور .

۶ — بزم حکومتز ناصل برحکومتدر ؟  
بزم حکومتز برحکومت مشروطه در .

۷ — بزم حکومتز نه زمان مشروطه اولدی ؟

بزم حکومتز ۱۲۹۳ سنه سنده مشروطه اولش ایسه ده صوکرده دن بعض حیلله و دسیسه ایله غصب اولمش ایدی . نهایت ملتز ۳۳ سنه دنبری ظلم و استبداد آلتنده ازیلوب محو اولمش ایدی . یکریمی بش سنه دنبری آوروپاده چالیشان اتحاد و ترقی جمعیتک امر تشویقیله روم ایلیده کی بوتون عساکر و اهالی اسکی حکومت ظالمه نک علیه نه قیام ایندیله . بونک اوزرینه هیچ قان دوکلمکسزین چاره سز قالان بردشمنک تسلیم اولسی کبی اسکی ظالم حکومت افرادی ده تسلیم اولغه و مشروطیتی قبول ایتمک مجبور اولدیله . فقط ۳۱ وقعه سنده صرتجملر تکرار قیام ایندکله روم ایلیدن حرکت اردوسی استانبوله کله رک عاصیلری تأدیب و مشروطیتی تحکیم ایندیله .

۸ — اتحاد و ترقی جمعیتی ناصل بر جمعیتدر ؟

اتحاد و ترقی جمعیتی دور استبداده و طمنزی ظالمه نک الندن قور . تارمق ایچون پارسه ، انکلتزه ، مصره ، برلینه الحاصل بوتون حر مملکتله فرار ایدن و اهالینک ذهنتی آچق ایچون اورادن بر طاقم غزته و کتابلری یازوب کیزلی کیزلی مملکتزده نصر ایندیرون کنج ترکله ردن عبارتدر . بونلر اوتوز سنه دنبری چالیشمقده درلر . کندیلری بیک درلو فقر و سفالت ایچنده بولندقلری و حکومت مستبده ایسه کند . یلرینه سند و قله دولوسی آلتونلر و یردیکی حاله ینه نزل ایدوب موافقت ایندیله . وطنک ، ملتک سلامتی ایچون چالیشدیله . جناب

حق ده کندیلرینی بو حسن نیتلرندن دولایی امللرینه موفق ایتدی .  
بوکون اوتوزملیونلوق برملتی ساحه سلامتہ چیقاردیلر وطنمیزی پوارلنقده  
اولدینی کیرداب فلاکتدن قورتاردیلر .

۹ — اتحاد و ترقی جمعیتی شمدیدن سوکره ینه دوام ایده جکمی؟  
و وطنه باشقه بر خدمت ایله جکمی ؟

اتحاد و ترقی جمعیتی شمدیدن سوکره ینه دوام ایده جک و وطنه ایکنجی  
بر خدمت دها ایله جک که اوده مملکت مزده معارف ، صنایع زراعت  
و تجارتک ترقیسنه چالیشه جق و عین زمانده ملتہ و حکومتہ ده رهبرک  
ایده جکدر .

اتحاد و ترقی جمعیتک بدایت تشکلندن بری ایکی مقصدی و ارایدی:  
بر یسی وطنک تخلیصی ، دیکری دخی تعالی و ترقی سیدر . حمد اولسون  
برنجیسنه موفق اولدی . ایکنجیسی ایچون ده جدأ چالیشه قده در .  
عون صمدانی ایله اوکاده موفقیتنی کمال خلوص ایله تمی ایلرز .

۱۰ — حکومت جمهوریه نهیه دیرلر ؟

حکومت جمهوریه حکومت مشروطه نکه عینی اولوب یالکیز رئیس  
حکمدار برقاج سنه ده بردکیشمک اوزرد عموم طرفندن انتخاب اولنور .

۱۱ — حکومت خواص نهیه دیرلر ؟

حکومت خواص ملتک زنکینلر و یا زادکانلر طرفندن اداره اولنمیسدر .

۱۲ — حکومت عوام نهیه دیرلر ؟

حکومت عوام ملتک علی العموم اهالی طرفندن اداره اولنمیسدر .





## اوچنجی بحث

### حاکمیت ملیه

حاکمیت ملیه ملئک بالذات کنندی کنیدیسی اداره ایتمسیدر .  
دنیا ده نه قدر حکومت واریسه هپسی مختلف صورتده برر  
حاکمیت ملیه در . هیچ بر زمان برویا بر قاج آدم مایونلرجه آدمدن  
عبارت اولان برملتی اداره ایده من . بو عقلاً شرعاً اوله من . اکر  
بویله اوله جق اولورسه مطلق ظلم استبداد تولد ایدر . ظلم استبداد  
اوزرینه قوریلان بر حکومت ایسه بوز اوزرینه قورلمش بر بنا کبی  
هم موقدر ، هم نتیجه سی هلاک عظیمدر . شو حقیقه تی بزه تاریخلر  
کوستریور . ملئک حکمداری اولان بعض ظالم لرله اولره آلت  
اولان بعض آلاقلر اهلایک جهانندن غفائندن استفاده ایتمکه ،  
ملتی کنندی هوسات نفسانیه لرینه آلت ایدینکه قالدیشیورلر ،  
و میایونلرجه افرادی کنندی ذوق و صفالری اوغورنده محوه  
چالیشیورلر . فقطینه ظلم ظالم نفرت عمومی بی موجب اولویور .  
عدالت و حقانیت سزک عدالت و حقانیت قدر پایدار اوله میور .

بر مدت سوکره هرکس یدیکی ضربه نك انتقامنی آماغه ، حقنی  
حریتنی طلب ایتمکه قیام ایدیسیور ایشته اوغدارلر اوظاملرده  
یابدقلمی بولیور .

ظالم بر ظلمه کرفتار اولور آخر  
البته اولور او بیقائک خانه سی ویران

ایشته بوصورتله حاکمیت ملیه بی قالدیرمق ظلم واستبداده  
میدان ویرمکدر . شاید بوصورتله ملتک حقوق وحریتی غصب  
اولانه رق حاکمیت ملیه اورته دن قالدیرلسه بیله بوپک موققدر . بر .  
مدت صکره ملت کندی حقوق وحریتنی کندی سلاحیله مدافعه  
ایدر . فقط مع التأسف بو حال ملته پک بهالی یه مال اولور . چونکه  
ملت سلاحله حقوقنی طلب ایتمک ایچون عمومک یا اتحاد عصیان  
ایتمسی ایجاب ایدر . بوا یسه بوتون ماتک طوفان ظلم واستبداد ایله  
خراب اولمشنه متوققدر . هرکس استبدادیلدر میله چار بیلملی که  
حقیقتی آکلاسون و مدافعه یه چالیشسون . اونک ایچون ملت  
حقوق وحریتنی قابدیر مامق ، حاکمیت ملیه سنی محافظه ایدم بیلمک  
ایچون دائماً متبصر ، متیفظ اولملی ، تدبیر و احتیاطلی بولملی  
وعموماً متحد اولماید . ملتک عموم افرادینک انتظام و سعادتی  
ایچون بر طاقم قوانین و نظاماته لزوم واردر . بوقوانین و نظامات  
ایسه او جمعیت افرادینک حقوق و وظیفه لرینی تعیین و تحدید  
ایدر . دیمکه که بر جمعیه منسوب اولان هر فرد هرشیدن اول  
حقوق و وظیفه سنک نه دن عبارت اولدیغنی ، اوجمیتک ناصل



قوانين اوزرينه مؤسس بولديغنى ايجه بيلمایدیر . اونک ایچون هرکس هرشیدن اول حقوق و وظیفه یی ، تمین ایدن قوانین و نظاماتی ایجه بیامایدیر .

### خلاصه

۱ — حاکیت ملیه نه به دیرلر ؟

حاکیت ملیه ملتک بالذات کندی کندیسنى اداره ایتسیدیر . دنیا ده نه قدر حکومت واریسه هبسی مختلف صورتده برر حاکیت ملیه در .


۲ — حاکیت ملیه اولدینی حالده استبداد ناصل حاصل اولور ؟  
حاکیت ملیه اولدینی حالده استبداد برقاچ صورتله حاصل اولور . برنجیسی ملت بيلمیه رك كور كورینه حکمدارک ویا مستبدلرک اوامرینه انقیاد ایدر . بوايه جهالتدن ایلری کلیر . ایکنجیسی بیلدیکی حالده مستبدلر طرفی غالب کلدیکندن قورتيله من . اوچنجیسی ظلم و استبدادی توالی ایتدیره جک اسباب و تأثیرات ظهور ایدر . دودنجیسی انسانلر اسکیدنبری کوردکلری شیرلی عادت حکمنه قويدقلرندن اونى بردنبره تبدیل ایتکی ذهنلرینه صیغديره منلر . مثلاً بشیوز ، بیک سنه دنبری بویله برطرز حکومت اولدینی حالده بونی بردنبره باشقه برشکله صوفى هرکسک ذهننه قولای قولای یاتمز . بشنجیسی هرملتک کندی حکمدارینه و حکومتنه قارشى معنوی بر مربوطیت و محبتی واردر . ایشته شوکی حاللر استبدادک تشکل و دوامنه سبیت ویرر .

۳ — ملت دائماً حقوق و حریتیه مالک اولقی و حاکیت ملیه سنى محافظه ایده بيلمک ایچون نه یاملیدر ؟

— ملت حقوق و حریتیه مالک اولقی و حاکیت ملیه سنى محافظه ایده بيلمک ایچون دائماً متبصر ، متفیظ اولقی ، مدبیر و احتیاطی بولمقله برابر عموماً متحد اولمیلیدر .

۴ — انتظام و آهنگ عمومی ایچون اهالینگ نه کبی شیرلی  
 بیلمسی الزمدر ؟  
 انتظام و آهنگ عمومی ایچون اهالینگ قوانین ، حقوق و وظیفه‌سنی  
 بیلمسی و اونلر داخلنده حرکت ایتیمی الزمدر .





## دردنجی بحث

### قوانین — قوانین طبیعیہ ، قوانین موضوعہ

قوانین ایکی درلودر . بریسی قوانین طبیعیہ دیگر ایسه قوانین موضوعہ در . بونلردن قوانین طبیعیہ لایتغیر ولایزال اولوب قوانین موضوعہ ایسه تمامیلہ قوانین طبیعیہ موافق ومنافع عمومیه مطابق اولنجه یه قدر دائما متبدل ومتغیردر .

قوانین طبیعیہ — طبیعتده موجود اولان قوانینک هیئت مجموعه نندن عبارتدر . یرده ، کوکده ، انسان وسائر مخلوقاتده دائما عین طرزده برطاقم حادثات ظهوره کلکده در . مثلاً هر کون کونش شرقدن دوغار غربدن باتار . بونک نتیجه سی اوله رق کیجه کوندوز حاصل اولور . سباهه قر هر آی صفحاتی منتظماً اکمال ایدر ؛ ییلدیزلر کندی محرک لرنده بر لرینه چار بمقسزین سیر و حرکت ایدر لر . قیشین قار ، یازین یاغور لر یاغار . بر

طوبراغه بر تخم اکیله جک اولورسه اوندن بیوک بیوک نباتلر  
یتیشیر. حیوانلر بر ریله جیفتلشهرک نسل تورر. انسان و حیوانات  
بیوب ایچمکه و دفع طبیعی ایتمکه مجبوردر. بر انسان کوزلری  
قبالی اوله رق دنیا به کلدیکی حالده بویور، اوقور، یازار، تکمل  
ایدر. ونیجه ده خارقلر کورستر. ایشته بونلرک هپسی طبیعتده  
یعنی حواس خمسسه مزله موجودیتنی حس ایدوب آکلادیغمز  
شو عمومی وارلقده اجرای حکم ایدن برر قانون ازلیدن  
عبارتدر.

ایشته بودرلو قوانین انسانلر طرفندن دکل عموم کائناتک  
خالق اولان جناب حق طرفندن قولش وینه اونک طرفندن  
اداره و تنظیم اولنش بر آهک وانتظام عمومیدر. بو آهک  
وانتظام عمومی دها دوعروسی بو قوانین طبیعی ازله ناصل  
قورولش و آهکنه ناصل دوام ایتش ایسه انسانلر، حیوانلر،  
نباتلر الحاصل بوتون موجودات دخی او قوانینه اویله جه تابع  
ومنقاددرلر. اگر مخلوقاتدن بری بو قوانیندن کرک بعض حادثاتک  
ظهوریله و کرک اراده و اختیار یله آیرلق ایسترسه کندی مو.  
جودیتنی غیب ایدر. چونکه بوتون مخلوقاتک موجودیتی کرک  
ازله و کرک بالتکامل حائر اولدقلری قوانین طبیعی به اولان  
مربوطیتلریله مقیددر. انسانلر و برچوق حیوانات هوادرونده  
یشارلر. حالبوکه برچوق حیوانلرده دکزده یشارلر. بو مختلف  
ایکی وسط بربری ایچون برر دار مهلکدر. دکزده یشایان بر

حيوان قره به چيقارلسه برايكي ساعت سوكره اولور . قره ده كي  
برحيوان دكزه صوقولسه اوده ينه تائف اولور . ديمككه مخلو-  
قاندن هر بريسي كنديلرينه مخصوص برر قوانين دائره سنده  
تأمين ومحافظه حيات ايدورلر . اكر بوندن آبريلورلر ايسه  
بالذات كندى حياتلرندن ، كندى موجوديتلرندن آيرلش  
اولوبورلر . چونكه او طرزده برحيات بر موجوديت آنجق اويله  
بر طاقم قوانين طبيعيه تابع و منقاد اولمقله ممكندر . كذلك  
انسان ييوب ايچمكسزين يشايه من ، فقط بو كي افعال طبيعيه  
دخى ينه طبيعى برر قانون داخنده جريان ايدر . خلاصه اك  
بسيط نقطه سندن اك مركب ومختلط قسمنه وارنجيه قدر انسان  
قوانين طبيعيه نك كافه سنه تابع اولمغه مجبوردر .

ناصل كه هر مخلوق كندينه مخصوص قوانين طبيعيه سى  
وارايسه و ناصل كه هر مخلوق كندينه مخصوص اولان اوقوانيدن  
ذره قدر آريله مرسه طبق اونك كي انسانلر كده كنديلرينه  
مخصوص بر طاقم قوانين طبيعيه لرى واردر كه انسانلرده بونك اك  
سطحيسندن بيله صرف نظر ايدمزلر . ايسته هر كس كنديسنك  
برر حق صريحى اولان بو قوانين طبيعيه سنى ايجه بيلميدر .  
بو قوانين طبيعيه غايت واسع و غايت مهم اولوب فن طب بونك  
هپسنى احتوا ايتشدرد . بناء اعليه بو نقطه هر نه قدر طبابته عائد  
بر مسئله ايسده هر كس آز چوق كنديسنى و كنديسنك طبيعتله  
اولان مناسباتى اوكرنملى و اوكا كورده حركت ايتمليدر . بو

ایسہ کوچکدن کوردیکمز تربیہ لرلہ ، سوق طبیعی ، ملکات عقلیہ ، محاکات و مطالعات ایلہ اللہ ایدیلر . بناء عایہ بورادہ بوقسمدن بحثہ زمین مساعد دکلدرد .

انسانک بو قوانین طبیعیہ سندن باشقہ بر طاقم قوانینی دہا واردرکہ اوکادہ قوانین موضوعہ دیرلر .

قوانین موضوعہ . — اسمندن دخی آکلاشیلدینی اوزرہ صوکرمدن وضع اولنش بر طاقم قوانیندن عبارتدر . قوانین موضوعہ جمعیت بشریہ نک تشکلندن صوکرہ وضع اولنشدر . شو حالہ قوانین موضوعہ صرف جمعیت بشریہ نک اداره وانتظامی ایچون قولنشدر . فقط بوقوانین موضوعہ نک جمعیت بشریہ نک سمادتی تأمین ایدہ جک بر صورتدہ اولہ بیلمسی ایچون قوانین طبیعیہ اوزرینہ بنا ایدلمسی شرط اعظمدر . اگر قوانین طبیعیہ اوزرینہ بنا ایدلمزسہ مطلقا اوقوانین موضوعہ او جمعیتک فلاکت و هلاکتی موجب اولور . قوانین موضوعہ انسانلرہ طبیعی اولہ رق بخش ایدلمہ مشدر . ناصل کہ جمعیت احتیاج اوزرینہ صوکرمدن تشکل ایتمش ایسہ اونی اداره ایچون لازم کلن قوانیندہ صوکرمدن قولنشدر .

بو قوانین طبیعیہ مستند اولہ بیلمسی ایچون قوانین طبیعیہ نک اساسندن اولان حریت اوزرینہ مستند اولسی لازم کلیر . قوانین موضوعہ یقین زمانلرہ قدرقرالارک ، حکمدارلرک اواصر خودبینانہ سندن عبارت ایدی . بالطبع بویلہ بر قوانیندن

جمعيت بشريه دائما متضرر اولور دورر ایدی . فقط انسانلر حقوق اصلیلرینک نهدن عبارت اولدیننی بیلیمورلر ایدی که آنی مدافعه یه چالیشسونلر . بالاخره علوم و معارفک ترقی وانتشاریله انسانلر حق صریحلرینک نهدن عبارت اولدیننی واونی کیملرک غصب ایتدیکنی آکلادلر . حقوق وحریتلرینه مالک اولمق ایچون همان سلاحه صارلدیلر وبو کون دنیایه حریت وعدالتک اساسلی تملارینی قویدیلر . قوانین موضوعه لرینی دخی قانون اساسی نامیله حریت وقوانین طبیعیه اوزرینه بنا ایتدیلر .

### خلاصه

۱ — قوانین قاچ درلودر ؟  
قوانین ایکی درلودر ؛ بریسی قوانین طبیعیه ، دیکری قوانین موضوعه در .

۲ — قوانین طبیعیه نهیه دیرلر ؟  
قوانین طبیعیه حقنده یعنی حواس خمسہ منزه موجودیتی حس ایدوب آکلادیمزی شو عمومی وارلقده اجرای حکم ایدن قوانینک هیئت مجموعہ سندن عبارتدر .

۳ — قوانین موضوعه نهیه دیرلر ؟  
قوانین موضوعه قوانین طبیعیه بی اساس اتخاذا ایدرک جمعیت بشریه نک سعادت وسلامتی ایچون وضع اولنان برطاقم قوانیندن عبارتدر .  
۴ — قوانین موضوعه قوانین طبیعیه اوزرینه مستند اولزسه نه اولور ؟

قوانین طبیعیه قوانین موضوعه اوزرینه مستند اولزسه مطلقا او حیثیتک فلاکت وانتقاضی موجب اولور .

۵ — قوانین موضوعه‌تک مستند اولدینی قوانین طبیعی‌تک اک  
برنجیسی نه‌در ؟

قوانین موضوعه‌تک مستند اولدینی قوانین طبیعی‌دن اک برنجیسی  
حریت‌در ؟

۶ — حریت‌ک انسانده بر قانون طبیعی‌حالنده اولدینی نه ایله ثابت‌در ؟  
حریت انسانده بر قانون طبیعی‌حالنده اولدینی انسانک اراده‌واختیارله  
ثابت‌در . اراده‌بلا سبب و بنفسه واقع اولان افعال و حرکات‌دن عبارت‌در .  
بوندن باشقه مسئولیت وجدان عذاب‌ی دخی حریت‌ک انسانده بر قانون  
طبیعی‌حالنده اولدینی اثبات‌اید . چونکه اکر انسانلر خلقة حر  
اوله‌مش اولسه لر ایدی دنیا و آخرت‌ده باید قلمری شیلردن مسئول اوله‌ملری  
وفنا بر حرکت‌ده بولند قلمری بر زمان وجدان عذاب‌نه دوشه‌ملری لازم  
کلیر ایدی .







## بشنجی بحث

### قانون اساسی

قوانین موضوعه دن الك اساسیسی قانون اساسیدر . برملتی اداره ایدن بالجمله قوانین قانون اساسی یه مستنداً یاپیلور . قانون اساسی هر جمعیت ایچون باشقه باشقه در . چونکه انسانلر مختلف محللرده مختلف عادات و تربیه اکتساب ایتدکلرندن هیچ بر قومک تربیه مایه و اصول اجتماعیسی بر برینه بکزه من . اونک ایچون اونلرک سعادت و سلامت حال و آتیسنی تأمین ایدن قوا-نین ده طیبی بر برینه بکزه من . بوتون انسانلرک هپسنه بردن عین طرزده بر قانون اساسی قویق شمدیلک ممکن دکادر . چونکه ایکی مملکت اهاایسی بیتنده بیله بر طاقم تربیه و عادات اختلافی اولدینی حالده مختلف ایکی قومی عین بر قانون اساسی یه باغلامق ترقی یرینه تدنی یه سبب اولور . انک ایچون هر مملکت قانون اساسیسی باشقه باشقه در . هر فردک جسماً بیله بولایدینی

قطعیه تابع اولدینی جمیته کوره بر شکل مادیسی ، بر  
 فیزیو نو مادیسی واردر . تشکلات منویه سی ده طیبی بونک  
 کیدر . بر ملت هر نه قدر مختلف عناصردن عبارت اولورسه  
 اولسون مادامکه عین بر وطنک اولادلیدر ، مادامکه عین  
 بر وطنده سنه لدنبری قرداش کبی بشایورلر ، حسیت ملیه  
 و تربیه قومیه جه آره لرنده بک جدی و صمیمی بر رابطه قویه  
 واردر . الحاصل تربیه ، عادات اخلاق و حسیات نقطه نظرندن  
 بو وطن اولادلرینی بر نقطه ده توحید ایدن اسباب بک چوقدر .  
 اوله ایسه قانون اساسی وضعنده ماتک عناصر مختلفه سی نظر  
 اعتباره آلتز ، بالعکس اونلرک تربیه سیاییه ، اصول و شرائط  
 اجتماعیه لرله احوال سابقه لری نظر اعتباره آلتز . ایشته بونک  
 ایچون قانون اساسی بی یکی تشکل ایتش بر ملت ایچون  
 اوله مز . اوله بیله بک بییط اولور . قانون اساسی عصر لرجه  
 یشامش ، دنیانک کرم و سردینی طامش بر ماته مخصوصدر .  
 تاریخمزی بر کره کوزدن کچیریر سه ق ناصیل دورلر کچیردیکمزی  
 هانکی دورلرده مستفید و هانکی دورلرده متضرر اولدیفه مزی  
 کوریلور . بر عشرت خلقی بکلرینک هر امرینه منتظر قالمسینه  
 مجبوردرلر ، چونکه ناصل بر خط و حرکت تعقیب ایده جکلری  
 مجبه ولدر . زیرا ماضیسی یوق که اوندن استنباطنه بر نتیجه  
 چیقارسون و بو نتیجه بی کندینه رهبر اتخاذ ایتسون .  
 هر فرد بیله بویه دکلیدر ؟ هر کس ماضیسی تفکر ایده رک

استقبالہ بر پروغرام تنظیم ایتزمی ؟ ایستہ قانون اساسی ده طبقی بویله در . یعنی بر قومک استقبالی ایچون ماضیسنندن چیقارلمش بر نتیجه ، بر دستوردر . اوپله ایسه قانون اساسی بزم کبی عصر لرجه یشامش ، تدبیر سزلیکی سائیه سیله بر چوق سله تأدیب یمش و حسن تدبیری سایه ننده بر چوق فتوحاته ، مظفریاته نائل اولمش عصر دیده ماتلر ایچوندر . ایستہ بقانون اساسی بی وضع ایچون ملتک ابتدای تشکلندن شمدی به قدر کچیردیکی صفیات ماضیه سی برر برر حاده تدقیق و تفکر دن کچیریلد کدن و دیگر حکومتلرک ده احوال حاضره و سابقه لری مقایسه ایدلد کدن صوکره هانکی نقطه ده انقراض و فلاکت علامت لری باش کو سترمش ، هانکی نقطه ده سعادت و سلامت دور لری کورلمش و بونلرک سببی نه ایمش ؟ نره دن کلش کبی بر طاقم تبعات و تدقیقات نتیجه سیله هان هان قطعی دینه جک درجه ده بر قانون قونیلور که ایستہ بو « قانون اساسیدن » عبارتدر . مثلاً ، بزم قانون اساسی بزمک اوچنچی ماده سننده « سلطنت سنیه عثمانیه خلافت کبرای اسلامییه بی حازر اوله رق سلاله آل عثماندن اصول قدیمه سی وجهله اکبر اولاده عائددر ، دیه مصر حدر . اگر بونی بویله قومیه مش اولسه لرده سلاله عثمانیه دن هانکی سی منتدر ایسه تختہ اوچیقسون دیسه لر ایدی هر دور انقلابه بیوک بر کورولنی قوپه جفته هیچ شبهه یوق ایدی . نسکیم تاریخ زده بویله وقایع چوق ظهور ایتمشدر .

یالکمز بر پادشاه دیکشسه-نک اون، یکرمی -نه بیلہ دولتی  
 اشغال ایندیکی چوق کرہ واقع اولمشدر . ایشته بونقطہ لر  
 کورلتی یہ میدان ویرمز ، اگر چیقان مقتدر دکلسہ اوزمان  
 ترک تحت ایدرک صرہ سنی صاومش اولور . وصوکرہ دن  
 کورلتی یہ سبیت ویرمز . آرتق بوکا اعتراض ایدیلہ مز .  
 چونکہ بوحقایق وقایع تاریخیہ مز کوستریبور . هپسی بویله در .  
 بوقانون اساسی بوتون جمعیتک ، ماتک حکمدارک هپسنک  
 برلکده رعایتہ مجبور اولدقلری برقانوندر . بوقانون اساسی  
 ماتک اطرافنه عمومی ایجریسنہ آلمق اوزره بر سور ، برقله  
 یامش اولور . اوجمیتہ مذسوب اولان افراد اوسوردن خارجه  
 جیقہ مز لر چونکہ جیقاچق اولورلرہ تابع اولدقلری جمعیتہ  
 اہانت ایتش اولورلر . بناء علیہ اوجمیت اونلری تأدیباتک  
 حقنہ مالک اولور . ایشته بوقانون اساسی ایله جمعیتک اطرافنه  
 بر امنیت سوری چکلدکن صکرہ اوسورک داخاندہ ینہ  
 بوقانون اساسی بی اساس اتخاذا ایدرک عدلیہ ، ملکیہ ، عسکریہ  
 وسائرہ عائد اولمق اوزره برطاقم قوانین ونظامات دھا وضع  
 اولنورکہ بونلرہ قانون اساسینک تفرعاتی دیمکدر .



## آلتنجى بحث

### حقوق

#### حقوق طبيعیه ، حقوق موضوعه

حقوق ، انسانلرك خلقهٴ و سياسهٴ حازر اولدقلرى قوانین طبيعیه واجتماعیه لرینك هیئت مجموععه سیدر . شو حالده حریت حقوق ایله ، حقوق ایسه قوانین ایله نتیجه لئمكده در . حقوق حریتله هم معنادر . هر كسك حقوقى حریتى ، حریتى ایسه حقوقى دیمكدر . هر كسك دائرهٴ حقوقى نه ایسه دائرهٴ حریتى ده اودر . شو حالده حقوقك بر درجه سى واردر . اودرجه یی آشه مز .

حقوق ایكى قسمدر : بریى حقوق طبيعیه ، دیگرى ایسه حقوق موضوعه ویا اجتماعیه در . حقوق طبيعیه دخى مادی معنوى اولق اوزره ایكى قسمه تقسیم اولئور : حقوق اجتماعیه ایسه حقوق مدنیه ، سیاسیه ، دینه اولق

اوزرہ تقسیم اولتور . بونلری برر بر تعریف ایدہ لم :

حقوق طبیعیہ . — انسانک خاقہ طبعیتہ موجود اولان خصائل وقوانینک ہیئت عمومہ مندن عبارتدر . بونلر ایسہ بر طاقم قوانین طبیعیہ ایلہ معلوم اولدیغندن انسانک قوانین طبیعیہ سی ینہ انسانک حقوق طبیعیہ سی دیمکدر . طاشلر ، طور اقلر ، صولر ، الکتریق ، ضیا وحرارت کبی مادی وقوہ وی نہ قدر اجسام ومؤثرات طبیعیہ حقندہ برر کونا قوانین طبیعیہ وار ایسہ انسانده طبعیتدن بر-جزء اولدیغندن اوندهده بر چوق قوانین طبیعیہ تجلی ایتکدهدر . بو قوانین طبیعیہ ایسہ انسانک حق صریحیدر . انسانلر یالکز قوانین طبیعیہ بیلمکله مکلف اولوب تبدیل ایتکله مکلف اولمادقلرندن اساساً بوکا موفق اولہمدقلرندن انساندهکی بو قوانین طبیعیہ دخی کیسه تبدیل ایدہ منر . بونی بیلمک ایسہ هرکسک اک مهم وظیفہ سیدر . بیلمیورسہ پک بیوک غفلت ایدیور دیمکدر . بر ملکہ صاحب اولوبده صاحب اولدیغنی بیلمہ مک نہ قدر موجب تأسف ایسہ انسق حانک صریحی بیلمامسیده اودرجه شایان تأسقدر . فقط حال بونکلهده قالماز . کندی حقوقنی بیلمینلرک حقوقی دائماً غصب اولتور . بونی غصب ایتدیرمه مک ایچون اونو بیلمک ومدافعه ایلمہ مک لازمدر .

حقوق طبیعیہ ایکی قسمدر : حقوق طبیعیہ مادیہ ، حقوق طبیعیہ معنویہ .

حقوق طبيعیه ماديہ . — انسانك جسماً حائز اولديني قوانين طبيعیه نك هيئت عموميه-سندن عبارتدر . يلك ، ايچماك ، كيملك كهي ... بيك درلو لزوم واحتياج ماديمنز هب حقوق طبيعیه منك مادی قسمی تشكيل ايدر ، كذا لك قولمز ، بجاغمز ، بتون اعضا-منز هب طبيعتك بخش ايتديكي برر حقدبر . بونلری بریسی كس-ماك ايس-ترسه حقه-زی غصب ایدیور ديمكدر . او حالده اونی مدافعه لازمدر .

حقوق طبيعیه معنويه . — انسانك معنأ یعنی روحاً حائز اولديني قوانين طبيعیه نك كافه-سيدر . بونلرك لك مهمی ايسه حریت واراده در . عقل ، حس ، محاسنه ، وجدان ... دخی هب حقوق معنويه دندر .

حقوق موضوعه ويا اجتماعيه . — انسانده طبيه اوله رق موجود اولمايوب كييلن البسه كهي صوكردن كوريلن لزوم قطعی اوزرينه وينه قوانين طبيعیه استناد ايتماك شرطيله وضع ايدیلن قوانين موضوعه نك هيئت مجموعه سيدر . حقوق اجتماعيه ، حقوق طبيعیه يي اساس اتخاذايدرك ياپاييرسه سعادت عموميه يي ، عكس حائده ، برطاقم حرافات ومذاهب باطله يي اساس اتخاذايدرك ياپيلورسه ، فلاكت عموميه يي موجب اولور . اونك ايچون بوكون هر حكومت مشروطه ده قانون اساسی يي حقوق طبيعیه دن اولان حریت اوزرينه تأسيس ایدیور . اكر بويله اولماش اولسیدی دنيا بر میدان وحشت خالی آلیر ایدی .

نتہ یکم ازمنہ قدیمہ دہ قانون اساسی بی صاحبہ بر طاقم دین و مذہب بدن عبارت بیلن اوانکیزیسیون کروہی ، اویا پالار زمرد سی ، بشریتہ آجدق لری یارہ لردن دولایی، بوکون ابدی بر نقرتله یاد ایدلمکده در .

خلاصہ : بر ملک بقاسی آنجق اونلرک قوانین اجتماعیہ لریخی قوانین طبیعیہ لریخہ استناد ایتدیرمکله ممکندر . عکس حالده جابق محو اولور کیدر . ادیان دخی بر لزوم اجتماعی اوزرینہ مؤسسدر . بناءً علیہ الک معقول ادیان الک زیادہ قوانین طبیعیہ موافق اولاندر . او حالده حقوق اجتماعیہ : حقوق مدنیہ ، حقوق سیاسیہ ، و حقوق دینیہ اولق اوزرہ اوچ قسمہ تقسیم اولور .

حقوق مدنیہ . — عمومک خصوص ایله و خصوصک عموم ایله آہنک ارتباط و مناسباتی تأمین ایچون ، حقوق ویا قوانین طبیعیہ استناداً ، قونیلان قوانینک ہیئت مجموعہ سندن عبارتدر . دیگر بر عالمک تعریفنہ کورہ « حقوق مدنیہ قوانین مثبتہ ایله تصریح و توضیح ایدیلان حقوق طبیعیہ دن عبارتدر » .

حقوق مدنیہ علی العموم قوانین مشروطیہ بی احتوا ایدر ، بر جمعیت ویا بر ملک استناد ایتدیکی قانون اساسی ایله او قانون اساسیہ استناداً قونیلان دیگر قوانینک کافہی حقوق مدنیہ بی تشکیل ایدر . خلاصہ بر ملک انتظام و آہنکی ایچون ، سلامت



و سعادتی ایچون لازم کان بالجمله قوانین و نظامات او ملتك  
بر حق ، بر حق مریسی در .

حقوق سیاسیه . — هرکسک کنندی مملکتی اداره  
خصوصنده حائر اولدینی حق صلاحیتدر . بو ایسه قوانین  
سیاسیه دن عبارتدر . بونک ایچون مجلس مبعوثان اعضا لر  
ماتک وکیللری دیمک اولدیقندن اونلر او وظیفه بی ایفا ایدرلر  
ینه هرکس ایسترسه تحریراً بحاس مذکوره یه بیان فکر ایده بیلر .  
مملکتک سمدت و سلاقی ایچون جمعیتلر قلوبلر تشکیلی دخی  
هپ حقوق سیاسیه دندر . اها لیدن هر هانکی بر فرد حکومت  
مأمورلرندن برینک خلاف قانون بر حرکتی و یا سوء استعمالاتی  
کوررسه در حال حقنده اقامه دعوا یه حقیدر . اگر دعوا بی  
قازانه مزسه اوزمان کندیمی جزایه دوشر اونک ایچون حقنده  
شکایت ایدیلر جک مأمورک احوالی ایجه تدقیق ایتلی و حرکات  
غیر لایقه سنی دخی آچیقجه میدان قویمیدر ، برده علی العموم  
هیئت اجراییه یعنی حکومت مأمورلری حکومت ایشلرندن  
مسئولدر . فقط بو مسئولیت اهالی یه قارشی اولیوب اها لینک  
وکیللری اولان بحاس عمومیه یه یعنی هیئت قانونیه یه  
قارشیدر . اونک ایچون اها لیدن هیچ بر کیمسه کیدوبده  
بر حکومت مأمورینی کنندی وظیفه سندن طولای مسئول  
ایدنر ، اگر اونی قانون دائره سنده مسئول ایتک  
ایسترسه اونک حقنده کی شکایتی مجلس مبعوثانه ویرمی و یا

حکومت به مراجعت ایتمی ایجاب ایدر . چونکه هرکس حکومت  
 مأمورلرینک ایشنه قاریشیرسه اونلرده نه یاه جقارینی بالطبع  
 شایبرر قالیرلر ، براداره مشروطهده اهالینک هردرلو حقوقی  
 کندی وکیللری اولان مجلس عمومی رؤیت ایتدیکی کبی مأمور-  
 لرلک ایشلرینی دخی یته اهالی نامنه اونلر رؤیت ایتمکه مجبوردرلر ،  
 اونک ایچون اهالی حقنی بیلهدیکی کبی اونی مدافعه و طاب  
 ایتمسی ده بیلملی ، اگر دوعریدن دوعریه مأمورلری کندی  
 وظیفه لرندن مسئول ایتمک ایستلرله اوزمان یولسز حرکت  
 ایتش اولورلر . مأمورلر حقسز بیله اولسلرینه اهالی یولسز  
 حرکتدن دولایی جزایه دوجار اولور . اگر اهالی کندی  
 حقارینک لایقیله محافظه سنی آرزو ایدرلر ایسه کندی وکیللرینی  
 غایت ابی آدملردن ، معلوماتی ، درایتلی کیمسه لردن انتخاب  
 ایتمایدرلر . بونلری حقیله انتخاب ایتمک بتون ملتک الک مهم  
 بر وظیفه سیدر . چونکه اگر بونلر حقیله انتخاب ایدلزلرله  
 ملتک حقوقی مدافعه ایدیله مز . وطنک سعادتی تأمین اوانه مز .  
 چونکه بوتون اداره بوملت وکیللرینک التده در . اونلر ناصل  
 بر قانون قورلرله هیچ کیمسه اوندن آیریله مز . اونک ایچون  
 بونلری انتخاب ایتمکده بک جدی طاورانمایدلرلر .

حقوق دینییه — هرکسک وجداناً قانع و معتقد اولدینی  
 دینی هرکسک حقیدر . بوکاده کیمسه مداخله ایده مز . وسالک  
 اولدینی طریقک بطلانندن طولایی اتهامده ایلیمه مز . چونکه

هر كس كندى نفسندن مسئولدر . هر كسك دينى هر كسك  
 حقيدر . فقط بوحق حقوق طبيعيه كې خلقه اوليوب . سو -  
 كردهن بولمش بر حقدرد . اونك ايچون بر جمعيتك حقوق مدنيه سنى  
 حقوق طبيعيه سى طور ركن : بوكا ربط ايتيك خطادر . وبوكا  
 مربوط اولوب قالمق ده خطادر . چين وهندايلاربشيك سنده نبري  
 ساحه ترقيده بر خطوه بيله آناما مشلردى . بونك سبب يكانه سى  
 ايسه قوانين اجتماعيه لرينى هپ ، دين مذهب ، طريقه اوزرينه  
 بنا ايتدكلرنندرد . بونك نتيجه سى هلاك عظيمدر .

هر شيك بر موقى ، بر حدى اولدينى كې دينك ده ، بر  
 موقى ، بر حدى واردر . دين باشقه ، امور دنيا ايسه ينه  
 باشقه در . خلقندن شيمدى به قدر كچن قومارك تاريخلرى مطالعه  
 اولنسه و اسباب انقراضلرى تدقيق ايدلسه دينلرينى دنياالرينه  
 قارشديرانلرك محو اولدقلرى ، دينلرينى دنياالرنندن آيرانلرك  
 ايسه پايدار اولدقلرى كوريلير . بناء عليه دينى مقدس موقنه  
 قويلى ، دينك صلاحيتك خارجنده اولان امور دنيايى اونسكله  
 حله قالدشمه مليدر .

صوكره دينى كندى موقعندن دوشورمش و كندى حدينى  
 آشيرمش اولورز . بويوزدن هم كندمى هم ده دينمى  
 متضرر ايدرز .




## خلاصه

- ۱ — حقوق نهیه دیرلر ؟  
حقوق انسانك خلفهٔ "وسياسة" حائز اولدینی قوانین طبیعییه واجتہا-  
عیهٔ نك هیئت مجموعه سیدر .
- ۲ — حقوق قاچ قسمدر ؟  
حقوق ایکی قسمدر : حقوق طبیعییه ، حقوق موضوعه در .
- ۳ — حقوق طبیعییه نهیه دیرلر ؟  
حقوق طبیعییه قوانین طبیعییه نك هیئت مجموعه سیدر .
- ۴ — حقوق طبیعییه قاچ قسمدر ؟  
حقوق طبیعییه ایکی قسمدر : مادییه ، معنویه
- ۵ — حقوق طبیعییه مادییه نهیه دیرلر ؟  
حقوق طبیعییه مادییه انسانك مادهٔ یعنی جسمائ حائز اولدینی قوانین  
طبیعییه نك هیئت مجموعه سندن عبارتدر .
- ۶ — حقوق طبیعییه معنویه نهیه دیرلر ؟  
حقوق طبیعییه معنویه انسانك معنائ یعنی روحائ حائز اولدینی قوانین  
طبیعییه نك كافه سیدر . بونلرك اك مهمی حریت اولوب عقل ، حسن  
محاکمه ، وجدان دخی هب حقوق معنویه دندر .
- ۷ — حقوق موضوعه ویا اجتماعیه قوانین طبیعییه استناداً وضع ایدیلن  
قوانین موضوعه نك هیئت مجموعه سیدر .
- ۸ — حقوق اجتماعیه قاچ قسمدر ؟  
حقوق اجتماعیه : حقوق مدنییه ، حقوق سیاسییه و حقوق دینییه  
اولقی اوزره اوج قسمه تقسیم اولنور .
- ۹ — حقوق مدنییه نهیه دیرلر ؟  
حقوق مدنییه برملقی اداره ایدن قوانین عمومیه ، یعنی قوانین مد-  
نییه نك هیئت مجموعه سندن عبارتدر .

۱۰ — حقوق سياسيه نه به دبزلر ؟  
حقوق سياسيه هر كسك كندى مملكتى اداره خصوصنده حائز  
اولدنى حق و صلاحيتيدر .

۱۱ — حقوق دينيه نه به دبزلر ؟  
حقوق دينيه هر كسك وجداناً قانع و معتقد اولدنى اديان  
ومذاهبدن عبارتدر .





## يدنجى بحث

### وظيفه

وظيفه هر كسك كندى حقوقى بيلوب اونك دائره سى  
داخاندده حركت ايتمى وديكر لر ينك دنى حقوقه تعرض  
وتجاوز ايله مەسى كيفيتدن عبارتدر .

هر حقوق بر وظيفه ايله مقيددر . بر شخصك حقوقى  
عمومك وظيفه سى عمومك حقوقى دنى بر شخصك وظيفه سيدر .  
سناك بنم حقوقه تجاوز و تعرض ايتمه مكى آرزو ايدر سه  
بنمده سناك حقوقكه تجاوز و تعرض ايتمه مكلكم لازم بو ايسه  
بنم وظيفه مى تشكيل ايدر . خلاصه هر كس ديكر ينك حقوقه  
رعايت ايتمك وظيفه سيله مكفدر . اكر هر كس ديكر ينك  
حقوقه رعايت ايتمز ايسه كندى وظيفه سنى اجرا ايتمه مش  
اوله جفتدن مسئوليتە دوچار اولور . خلاصه وظيفه حقوقك  
محافظه و حسن دوامى ايجون ايجاب ايدن تدابيردن عبارتدر .

هر وظیفه بر حقوقه مقابل اولديغندن ، وظیفه ده حقوق کبی  
تقسیم اولنورسده بوراده بریسی وظیفه شخصییه ، دیگرى  
وظیفه عمومیه اولق اوزره ایکییه تقسیمى مناسب کورلمشدر .  
وظیفه شخصییه: هر کسک بولندينى جمعیت داخاندن تقسیم  
اعمالدن برایش ایله مشغول اولمیشدر . یعنی بر جمعیتی تشکیل  
ایدن هر فردک اوجمیتک هیئت عمومیه سنه کوجی بتدیکی قدر  
درجه فکر استمداد ایله متناسب برایش طو توب او جمعیه  
خدمت ایتمک ، هم ده بوسایه ده کندى منافعی تأمین ایله مکدر .  
یعنی منفعت عمومیه یه خدمت ایدهرک منفعت ذاتیه سنی تأمین  
ایتمکدر . بونقطه ده هر فردک وظیفه سی آیرلمش دیمکدر .

بوندن باشقه وظیفه شخصییه ده ها بر جوق وظیفه لر  
واردر . اولرده هرکس کندى حیاتنک محافظه سنه دؤت  
ایتمکله برابر نسانک دخی توالیسی ایچون اولاد واحفادینه  
دخی باقغه مجبوردر . یعنی هرکس حیات شخصییه وحیات  
نوعیه سنی دخی کوزتمکله بورجلیدر .

حیات شخصییه عائد اولانلردن : هرکس حیاتیکی حسن  
استعمال ایتمکله مکلفدر . حیات بر موهبه الهیه در اونی فنالقده  
استعمال ایتمک الک بیوک کناهلردندر . برکیمه دیگر بریسی  
وورمق ایچون سلاحه صارلسه اوکا مدافعه فرض اولمغله برابر  
شاید باشقه درلو خلاصی ممکن اولمزه کندى حیاتی قورتارمق  
ایچون اونی اولدیرمک اونک وظیفه سیدر .

وظیفه نوعیه دن اولانلر دخی هرکس کندی عائله سیله خوش کچینمکله برابر اولادلرینی کوزل تربیه ایتک واوللری کندی سعلریله کچینه جک بر راده یه کلنجه یه قدر احتیاجلرینی تأمین ایلکدر .

وظیفه عمومیه ایسه اوجمیتک هپسنگ بر نقطه ده اجتماع ایدوب متحداً و متفقاً حرکت ایتاریدر . مثلاً ، وطنی مدافعه ایچون دشمنه قارشى چیقماق ، ویرکو ویرمک ، جمعیتدن کلن اوامره انقیاد ایتک ، قانون اساسی یه اتباع ایله مک هر فردک وظیفه عمومیه وه بجهلندندر .

اگر اوجمیتدن کلن امرلر ، نظاملر اوجمیتک بقا و تمار ایسی ایچون قونولش اولان قوانینک خارچنده اولورسه بودغه محافظه حقوق ایچون مجادله و فدای جان ایدرجه سینه مدافعه ایتک ایجاب ایدر . نته کیم بوشمدی یه قدر قانونسز . نظامسز بر جمعیت داخلنده محو اولوب کید یوردق . اطاعت و حقوقزى استرداد غیرت ایتدک . شیمدی ایسه له الحمد حقوقزى استرداد ایتدک . آرتق جمعیت مزک هر درلواوامر و نظاماتنه جان و یورکدن صاریلوب اطاعت و انقیاد و هرکس حصه سینه دوشن وظیفه یی اجرا یه غیرت ایتایدر . بر جمعیتک ترقی و سعادت تی تأمین ایچون اوجمیتک باشی بوش اوله رق کلشی کوزل حرکت ایتسی طبیعی اوله ماز . اونک ایچون اوجمیتک ترقی و تعالیسی ایچون اورته یه بر قانون قور ، و بوقانون دائره سینده حرکت ایتمکک چالیشیر ،



زمانہ، حالہ کورہدہ بوقانونی تبدیل و تعدیل ایدہ بیلیر . ایشتہ  
هرکس بوقانونه اطاعتہ مجبوردر .

### خلاصہ

۱ — وظیفہ نہیہ دیرلر ؟

وظیفہ هرکسک کندی حقوقی بیلوب اولک دائرہ سی داخلندہ  
حرکت ایتمی و دیگرلرینک دخی حقوقنه تعرض و تجاوز ایلمه می  
کیفیندن عبارتدر ؟

۲ — وظیفہ سی اجرا ایتمین نه اولور ؟

وظیفہ سی اجرا ایتمین کیسه مسئول اولور .

۳ — مسئولیت نهیہ دیرلر ؟

مسئولیت ضمنی حقوقدن عبارتدر . مثلاً بریسی دیگرینک حقوقنه  
تعرض ایدر و یا کندی وظیفہ سی اجرا ایتمه نه عمومک حقوقنه  
تجاوز ایتمش اوله جفتدن مسئولیتہ دوجار اولور . مسئول اولان  
کیسه لردن عمومک حقوقی اگر ممکن ایسه آلتیر دکلسه اونسبنده کندی  
حقوقنه تجاوز اولور . بو صورتله مقابلہ بالمثل یا پلش اولور .

۴ — وظیفہ قاج قسمدر ؟

وظیفہ ده حقوق کبی تقسیم اولنورسه ده عمومیت اعتبارله ایکی قسمه  
آیریلیر . بریسی وظیفه شخصیہ دیگرى ایسه وظیفه عمومیه در .

۵ — وظیفه شخصیہ نهیہ دیرلر ؟

وظیفه شخصیہ ، حیات شخصیہ و حیات نوعیه نك محافظه و تأمین  
ایچون لازم کلن تقیدادن عبارتدر .

۶ — وظیفه عمومیه نهیہ دیرلر ؟

وظیفه عمومیه ، ملتنک سعادت و سلامتی ایچون ایجاب ایدن تکالیف  
عمومیدن عبارتدر .





## سکزنجی بحث

### حریت

حریت، حقوق طبیعیہ واجتماعیہ نك ہیئت مجموعہ سیدر .  
حریت سربست بولمقی ، عارضہ سز حرکت ایتك معناسنه  
ایسه ده هیچ بر وقت نظام سز ، بائی بوش اوله رق حرکت  
ایتك معناسنه دكلدر . حریت ، انسانك حائر اولدینی حقوق  
وقوانین دائره سنده سربستجه حرکت ایتسی دیمكدر . مثلاً ،  
بر ماكنه نك مانیوله سی سربستجه حرکت اییدیور دینكجه  
اونك عجیب ، غریب بر طاقم حرکات پایدینی آکلاشیامیوب  
مانیوله نك بولدینی ماكنه ددی وظیفه سی نه ایسه اونی  
سربستجه اجرا ابتدکی یعنی کیمسه نك اونك وظیفه سی  
اجرایه مانع اولدینی آکلاشیلیر . كذلك ارض کونشك ، قرده  
ارضك اطرافنده سربستجه دونیور دیرسه كینه بونلرك  
قوانین طبیعیہ دن خارج بر ایش کوردكلرینه ذاهب اولمامایدر .  
بالعکس تابع اولدقلری قوانین طبیعیہ ده کمال سربستی ایله وبلا

عارضه حرکت ایدیورلر دیمکدر. ایشته انسانلرده بویله در .  
حریت بر طاقم قوانین و نظامات ایله تمین و تحدید اولنمشدر .  
هر کسک بولاندیغی جمعیت ایجریسینده بر وظیفه سی واردر .  
ایشته اووظیفه سی وجدان دأرهمسندده قونولان نظاماته توفیقاً  
اجرایه کیمسه ممانعت ایدهمز. حریت مختصرجه قیاسی بنفسه  
یعنی انسانک کندینه یاییلمسینی آرزو ایتدیگی بر بشیدی  
دیگرینه ده یایهمق و کندینه یاییلمسینی آرزو ایتدیگی شیدی  
ایسه دیگرلرینه ده یایهمقدر . حریت هیئت عمومیه سی اعتباریله  
بر حق ، بر تملکدر . اونی بحفاظه و حسن وقایه لازمدر .  
بر انسانک حریتی حقوقی نسبتنده در . بناءً علیه حقوقی بیلن  
کیمسه دائره حریتک نهدن عبارت اولدیغنی آکلار . حریت  
حقوقدن عبارت اولدیغندن حریت ده طبقی حقوق کی تقسیم  
اولنور .

۱ — حریت طبیعییه : انسانک بالذات طبیعتده موجود  
اولان حقوقک هیئت مجموعه سی داخننده کافه حرکاتنده  
سربست اولمسیدر . بونلرک داخننده حرکت ایتدیگی حالده  
شاید باشقه بری طرفندن بر تجاوز وقوع بولورسه مدافعه  
حقوقه دخی بورجاییدر . اکر اونلرک خارجنده حرکت  
ایدرسه طبیعی کندیلی مسئلدر .

حریت طبیعییه : مادی ، معنوی اولقی اوزره تکرار ایکی  
قسمه آپرلور .

حریت مادیہ : انسانک بالذات جسماً حائز اولدینی حقوق  
طبیعیہ سی دائرہ سندنہ سربستی افعال و حرکاتیدر . مثلاً یتک  
ایچمک ، کیمک خصوصندنہ کی افعالندنہ کی هرکسک حبولنسی کی  
حریت معنویہ : انسانک بالذات معنأ حائز اولدینی حقوق  
طبیعیہ سی داخاندہ سربستی افکار و آمالیدر . بوده انتخاب  
ایتمک قوتندن عبارتدر . انسان ارادہ جزئیہ سی ایستر خیرہ ،  
ایسترسہ شرہ صرف ایتمکده مختاردر ، شو قدر وارکہ خیرہ  
صرف ایدرسہ مکافاتی ، شرہ صرف ایدرسہ مجازاتی کورر .  
کیمسہ کیمسہ بی فنا حاندن طولانی مسئول ایدہ من . اونی  
مسئول ایدہ جک یتہ قانوندر . بوندن هرکسک فنا یولہ  
کیتسی طبیعی آکلاشیلماز . یالکنز بر کیمسہ دیگرینک افعال  
و حرکاتی حقدہ دوعرو بر فکر ویرہ من . چونکہ بر کیمسہ  
دیگرینک فکریخی تمامیلہ بیلہ مدیکندن اونک حقدہ  
سویاہ جکی سوزلرده عندی بناء علیہ ثمرہ من و تأثیرسز اولور .  
حالبو کہ ظاہرده دیگرینہ فنا کورونن بر حال بر مدت صوکرہ  
ای بر نتیجہ ایلہ نتیجہ تہ بیلیر . چونکہ بر ایشک حسن نتیجہ  
حاصل ایدہ بیلمسی ایچون اونی نہایتہ قدر اتمیق ایتمک  
شرطدر . حالبو کہ بریسی بر شی تصور ایدر . عمومه مفید  
بر اثر میدانہ قویغہ چالیشیر ، بو امللریخده قوہ دن فعلہ  
جیقارمق ایلہ اوغراشوب دوررکن اوتہ طرفدن بریسی کلیر ،  
کندی طرز خود پسندنہ سندنہ دوشندیکندن اوتہ کینک

حرکتی معقول کورده من ، اونى واز کچيرمک ايستر . حاجبوکه اونک بو خصوصده بر لاف بيله سـويلىکه حقى يوقدر . اکر النـدن کليرسه هم جنـسـلرينک ايشنى سـکـتـه يـه اوغـر ائـمـه دکل اونلرى نتيجه لـدـير مـکـه چالـمـلـدـر .

بر کيمسه وظيفه سنى بيله يامسه باشقه برينک اوکا بر لاف بيله سـويلىکه حقى يوقدر . بـوحـق قـانـونـک در . قـانـون اونى وظيفه سنى يامديغدن دولايي مسئول ايدير ، جزاسنى ويرر . اکر بويله اولماش اولسه هرکس بر برينک ايشنه ، وظيفه سنه قاريشسه اورته لق قارمه قاريشـيق اولور . چونـکـه هرکس ايشـک حـقـيـقـتـه واقف اوله مديغدن کندی طرز رؤيته ده برفکر بيان ايدر که بونک نه درجه لـر دـه سـوـء نـيـجـه وـيرـه جـکـنـدـه هـيـچ شـبـه يوقدر . ايشته اونک ايچون هرکسک حقوق معنويه سـنـه يـمـنى اراده و اختيارينه کيمسه مداخله ايده من وایتمه مـايدـر . فـقـط بونک بـمـض مستـتـلـارى اوله بيلور . مثلاً بر کيمسه اتحاره تصدى ايتمه ويا بر جنایت ايشلمک ايسته سه البته بوکا عـمـانـت ايـدـيلـور . انـسـانـلق هرکسى اييلىکه دوغـر و يوله تشـويـق ايتـمـکـدر . کـوتـولـکـي ارتکـاب ايـدنـلر حـقـتـه اونلرى اصلاحه چالـمـشـمـق ، نصـيـحـتـه کـوزـل سـوزـلـه يوله کـتـيرـمـک بر وظيفه انسانيتدر .

۲ — حریت موضوعه ويا اجتماعيه : بر جمعيت افرادينک کافه سنک او جمعيتک حقوق اجتماعيه سى دائره سنده ، سربسقى

افکار و حرکات در . بنظر دهنده اوج قسمه آریلور . حریت  
مدنیة ، حریت سیاسیة ، حریت دینیة :

حریت مدنیة : حقوق مدنیة دائره سنده سربستی افکار  
و حرکات در عبارتدر .

حریت سیاسیة : حقوق سیاسیة دائره سنده سربستی  
افکار و حرکات در عبارتدر .

حریت دینیة : حقوق دینیة دائره سنده سربستی اعتقاد در  
عبارتدر .

### ضمیمه

۱ — حریت نهیة دیرلر ؟  
حریت حقوق طبیعیة واجتماعیة هیه مجموعه سی دائره سنده  
سربستی افعال و حرکات در عبارتدر .

۲ — حریت قاج قسمدر ؟  
حریت ایکی قسمدر : حریت طبیعیة . حریت اجتماعیة .  
۳ — حریت طبیعیة نهیة دیرلر ؟

حریت طبیعیة حقوق طبیعیة دائره سنده سربستی افعال در  
عبارتدر .

۴ — حریت طبیعیة قاج قسمدر ؟  
حریت طبیعیة ایکی قسمدر : مادی ، معنوی .  
۵ — حریت مادیة نهیة دیرلر ؟

حریت مادیة حقوق طبیعیة مادیة دائره سنده سربستی حرکات در  
عبارتدر .

۶ — حریت معنویة نهیة دیرلر ؟

حریت معنویہ حقوق طبیعیہ معنویہ دائرہ سندھ سربستی افکار دین عبارتند ۔

۷ — حریت موضوعہ و یا اجتماعیہ نہ دیرلر ؟ حریت موضوعہ و یا اجتماعیہ حقوق موضوعہ و یا اجتماعیہ دین عبارتند ۔

۸ — حریت اجتماعیہ قاج قسمدر ؟  
حریت اجتماعیہ اوج قسمدر : حریت مدنیہ ، حریت سیاسیہ و حریت دینیہ ۔

۹ — حریت مدنیہ نہ دیرلر ؟  
حریت مدنیہ حقوق مدنیہ دائرہ سندھ سربستی افکار و حرکات دین عبارتند ۔

۱۰ — حریت سیاسیہ نہ دیرلر ۔  
حریت سیاسیہ حقوق سیاسیہ دائرہ سندھ سربستی افکار و حرکات دین عبارتند ۔

۱۱ — حریت دینیہ نہ دیرلر ؟  
حریت دینیہ حقوق دینیہ دائرہ سندھ سربستی اعتقاد و آئین دین عبارتند ۔





## طقوزنجی بحث

### ملت وکیلری و اصول انتخابات

حاکمیت مایه ده ملت کندی کندیسنی اداره ایدر . فقط  
بر ملت اڤ آزدن یکرمی اوتوز میایون نفوسدن عبارتدر .  
بونلر هېښځ بر یرده طوبیلا نوبده مذاکره ایتملی غیر قابلدر .  
بویله اولمسی ممکن اولسه بیله عین زمانده هر کس ایشندن  
کوجندن آواره قالیر . هر کسک یا ایشلرینی و یا بو اجتماعی ترک  
ایتملی ایجاب ایدر . ایشلرینی ترک ایدمزلر . چونکه حیاتلری ،  
میشتلری اونکله قائمدر . او حالده اتحادلرینی ترک ایدرلر .  
بو صورته ملت داغیلیر . اوفق اوفق فرقه لره آیریلیر . بویله  
اوفق ماتلرایسه کندی حقوقلرینی محافظه ایدمزلر . اونه طرفدن  
قوتلی بر ملت اوزرلرینه هجوم ایدمزلر ماللرینی ، جانلرینی تاف  
ایدر . اسکی دره بکترینک شیمدی کوکی قورودینی کبی اوزمانلر ده ده  
پک چوق یشایه مزلر ایدی . اڤ قوتایسی بش اون سنه ده  
محو اولور ایدی .

دیملکه افراد بشر ، بقای سعادتندن امین اوله بیلیمک ایچون



قوتلی بر ملتیه منسوب اولماید . و یا قوتلی بر ملت تأسیس ایتماید .  
 بو قوت ایسه ماتک نفوسجه کثرتندن و اوماقی تشکیل ایدن  
 افرادک اتحاد و اخوتسندن متولددر . او حالده هم هر کسی  
 کندی ایشندن آله قویماق هم ده قوت و حاکمیت مایه بی محافظه ایتک  
 ایچون افراد ماتک هپسنگ بریره طوبیلا نسبی شرط دکلددر .  
 هر طرفدن اها اینک اقرار و ناموسلی کیمسه لردن برر وکیل  
 کوندرمسی کافیددر . ملت وکیلارینه کندی ایشلرندن قازانوب  
 آله جقلری پاره به مقابل معاش ویرر اولورده ملتک حقوقی  
 محافظه ، احتیاج و آرزولرینی تأمینه چالیشیرلر . ایسته ملت  
 وکیللرینک بریره طوبیلا نسبی عموم ملتک بریره طوبیلا نسبی  
 دیمکدر . چونکه وکیل ، اصیل کییددر . ملت وکیللرینک بر  
 ملتی اداره ایتسی عموم ماتک کندی کندیسی اداره ایتسی در . ایسته  
 « حاکمیت ملیه » بودر .

حاکمیت مایه نك تأمین ایچون ملت وکیللرینک غایت مقتدیر  
 و ناموسلی کیمسه لردن اولمسی شرطدر . اکر بونلر وقوفسیر ،  
 منفعت برست ، جاهل کیمسه لردن عبارت اولورسه ملتک حقوقی  
 محافظه ایتک شویله طورسون استبدادکده تشکیانه یاردم ایدرلر .  
 هیچ بر حکمدار تصور اولمازکه استبداده عاشق اولماسون .  
 ملتک قوت و قدرتی ، وقوف و معلوماتی اونی ماتله هم حال ایتکه  
 مجبور ایدر . خلاصه بر حکمدار نه قدر حریت طرفداری  
 اولورسه اولسون ینه ملت احتیاطلی بولمایددر . حریتک حافظ

ونكه بهان حقيقتي مائدر . ملت كندى كنديسى دوشنمزه باشقه هيج كيمسه دوشونمز . اونك ايجون مات و كيللرني غايت ناموسلى ومعلوما تلى كيمسه لردن سچمايدر . بر مبعوث اعضاسنك نه قدر مهم بر وظيفه درعهده ايتديكي شبهه سزدر . بر مملكتده ويا بر محله ده اعضا انتخاب ايديله جكي وقت اونك احوال سابقه سنى ، معلومات و در ايتنى برر برر تدقيق ايتلى و بر بريله مشورت ياپه رق احوالى ايجه اكلامايدر .

اعضاييكي درلو انتخاب اولور : بريسى دوعرودن دوعرويه اعضا انتخابيدر كه اوده بر مملكتده اعضا انتخاب ايتك حقيقي حائز اولان كيمسه لرك معلومات ، ناموس و افتدارندن امين اولدينى كيمسه لرى انتخاب ايتلمايدر .

بو كا بلا واسطه انتخاب دينلديكي كجي بونى انتخاب ايدنلر ده برنجي منتخبلر دينور . برده هر بشوز كشى كرك ايجلرندن و كرك خارجدن بريسى انتخاب ايدرلر كه ايكنجي منتخب نامى ويريلير و بونلردن مجلس مبعوثان اعضالرينى انتخاب ايدرلر . چونكه برنجي منتخب رايلرينى ايكنجي منتخبه ويرمش اوليورلر . انتخاب ايتك يا عمومى ويا خصوصى اولور . يعنى اها ايدن اعضا انتخاب ايتك حق و صلاحيتنى حائز اولانلر سنوى حكومه بر مقدار ويركو و يرلردر . بونلره منتخب خصوصى ديرلر . ويا خود هيج بر وركى قاله آلفق سزين دوعرودن دوعرويه هر كس اعضا انتخاب ايدم بيلير . بوكاده منتخب عمومى دينور .

فقط هر ايكديسنده تبعه دن اولق ، مفلس و محكوم بولنماق الزمدر .

اصول انتخابه كلنجه : اولاً كيملر اعضا انتخاب ايده جكلر ايسه اونلرك اساميلريني حاوي هر بلديه دائره لريله ناحيه وكوي مركزلرلنده برر دفتر تنظيم اونور . بودقترلر تنظيم اونورقدن صوكره برنجي منتخب ظاهره چيقارلمش اوله جفتدن بونلرك اسملري صره ايله يازيله رق كلوب كچنلرك كوزينه چاربه جق بر محله بر قاج كون بولديريلور وهر كسه اعلان ايدياير . صوكره هانكي كون ايكنجي منتخب ويا مجلس مبعوثان اعضالرينك دخی انتخاب ايديه جكفي يا مناديلرله ويا ديوارلره تمليق صورتيله ويا خود رسمي غزته لرله اعلان ايديلور . وهانكي بلديه دائره سنه كله جكلري دخی بيلديريلور . معين اولان زمانده معلوم اولان محله كلزدن بر ايكي كون اول هر محله كويك برنجي منتخبلرينه داغيدلق اوزره لزومي قدر بلديه طرفندن رسمي مهرله مهرلشمش كاغدلر ويرييلور .

برنجي منتخبلر بو كاغدلري آير آماز انتخاب ايتديكي كيمسه نك اسم وشهرتي يازوب كاغذك آلتنه كندی امضاسني آتمقسزين بر ظرفه قويوب ، ظرفك اوزرينه دخی هيچ بر شي يازمقسزين معين اولنان كونده منسوب اولديني بلديه دائره سنه كتوروب تسليم ايدر .

كاغدي باشقه مي يازوبده بلديه دائره سنه باشقه سي كتوروب

تسلیم ایدہ من . چونکہ بلدیہ دائرہ لرندہ اولجہ یا پیلان دفتر  
موجبہ جہ ہر کس اسم و شہرتیلہ او قوند قدن سوکرہ النده  
ظرفیلہ موجود : وائسان او اسم صاحبك مجلس تصدیق  
ایدل دکن سوکرہ النده کی ظرفی رأی صندوقہ آثار . ایستہ  
بوصورتہ ہر کسک رأی طویلانیہ . وقت و زمانیلہ یتشہ مینلرک  
رأیلری سوکرہ دن قبول اولنمز .

خلاصہ : بوصورتہ ہر کسک رأی طویلاند قدن صکرہ  
مجلس حضورندہ صندوق آجیلہ رق القبا صرہ سبیلہ ہر کسک  
قازاندینی رأی بر کاغذہ قید اولنور . اک چوق رأی قزانانلر  
مجلس مہموتان اعضا لغنہ انتخاب اولنمز اولورلر .

ہر الی بیک ذکورہ بدل بر اعضا انتخاب اولنور . فقط  
بر سنجاق ویا قضانک نفوسی الی بیکدن ۲۵ بیک قدر فضلہ  
ویا نقصان اولورسہ ینہ ۵۰ بیک کی اعتبار اولنور .

فرانسزلرک قانون اساسیلرندہ ذکور وانات داخل اولوق  
اوزرہ ہر یوز بیک نفوسہ بدل بر مبعوث انتخاب اولنور .  
فقط قادینلر رأی ویرمک حقنہ مالک دکلدرلر . مادامکہ  
قادینلر رأی ویرمک حقنہ مالک دکلدرلر . او حالہ بزم قانون  
اساسیمزدہ اولدینی کی ہر الی بیک ذکورہ بدل بر اعضا  
انتخابی دہا موافقدر . یکی زہ لاندہ ، آوسترالیہ و آمریقادہ  
یکی شکل ایدن بعض حکومتلر دہ حق انتخاب ارککلر کی  
عین شرائطی حاوی قادینلرہ دخی تشمیل ایدلمشدر .

## خلاصه

- ١ — حاكيت مليه نه واسطه ايله تايمين ايديله بيلير .
- حاكيت مليه ملت و كيللري واسطه سيله تايمين ايديله بيلير .
- ٢ — ملت و كيللري كيملدر ؟
- ملت و كيللري ملت طرفندن راي هام و خفي ايله يعني عمو طرفندن انتخاب اولنان اعضالدر .
- ٣ — منتخب يعني انتخاب ايتك حقي حائز اولانلر كيملدر ؟
- منتخب يعني اعضا انتخاب ايتك حقي حائز اولانلر محكوم، مفلس كوله اوليان بالجله اهايدر .
- ٤ — منتخب قاج درلودر ؟
- منتخب ايكي درلودر . برنيجي برنيجي ، ديكرى ايكنجى منتخبلدر .
- ٥ — برنيجي منتخب نهيه ديرلر .
- برنيجي منتخب اهايلدن حق انتخابي حائز اولانلردن دوغرو .
- دوغرويه مجلس مبعوثان اعضالرينى انتخاب ايدن كيسه لدر .
- ٦ — ايكنجى منتخب نهيه ديرلر ؟
- ايكنجى منتخب مجلس مبعوثان اعضالرينى انتخاب ايتك ايچو برنيجي منتخب طرفندن انتخاب اولنان كيسه لدر . هر بشيوز برنيجي منتخب ايكنجى برمنتخب انتخاب ايدرلر .
- ٧ — منتخب خصوصى نهيه ديرلر ؟
- سنوي حكومه برمقدار و بركو و برنلر ك حق انتخابي حائز اولميدر .
- ٨ — منتخب عمومى نهيه ديرلر ؟
- و بركو وساير هيچ برشرط ايله مقيد اولمقنن عموم اهايلتك قانونك استئننا ايتديكي بعض استئنالردن باشقه - حق انتخابه مالا اولسيدر .
- ٩ — كيملر منتخبدر ؟ يعني اعضا انتخاب ايتك حقنه مالكدن

فلس ، محكوم اوليان و باشقه سنك كوله سی بولمیان یكری بش  
باشنی اكال ایتش اولان بالجله ذکور عثمانی تبعه سی حق انتخابه  
مالکدر. مجلس مبعوثان اعضائی ایچون عین شرائطله برابر اونوز باشنی  
واعیان اعضائی ایچون دخی قرق باشنی اكال ایتک شرطدر .

۱۰ — برنجی قاج منتخب ایکنجی بر منتخب انتخاب ایدر .

هر بشیوز برنجی منتخب ایکنجی بر منتخب انتخاب ایتک حقنه  
مالک درلر ۱۰ کر برنجی منتخبلرک عددی ۲۵۰ قدر زیاده و یا نقصان  
اولورسه ینه بشیوز کی اعتبار اولنور. شو حالده بشیوزدن فضله سی  
ویدی یوز الیدن دون اولورسه ینه بر ایکنجی ، منتخب و فضله سی ایچون  
دخی ۷۵۰ اوزرینه بشیوز ضمیله ۱۲۵۰ ایچون ایکی ، ۱۷۵۰ ایچون  
دخی اوچ و بو وجهله منتخب ثانیلر انتخاب اولنور .





## اونجی بحث

### قوای ملیه

ملت اداره عمومیه سنی تنظیم ایچون بر طاقم قوتلره محتاجدر .  
بو قوتلر ایسه قوه قانونیه، قوه مالیه، قوه عسکریه، قوه انضباطیه  
کبی بر طاقم قوتلردن عبارتدر . بونلرک مجموعنه «قوای ملیه» دینور .  
بونلردن باشقه بر طاقم قوتلر ده اوار ایسه ده باشلیجه لری بونلردر .  
بر ملت ترقی وانتظامه مظهر اوله بیلمک ایچون مطلقا بو قوتلره  
مالک اولمایدیر . بو قوای ملیه نه قدر متین اولورسه او ملت ده  
اوقدر قوتلی ومتین اولور . بو قوتلر اولقسزین بر ملتک بقا  
وتعالیسی ممکن اوله ماز بر ملت میلیونلرجه اشخاصدن عبارتدر .  
اومیلیونلرجه اشخاصک هر بر امور و خصوصاتی خصوصی بر  
طاقم اشخاصه تودیع اولنمایدیر . واو خصوصی اشخاص دخی  
درعهده ایتدکاری وظیفه لرندن مسئول طوتلایدیر . اکر بویه  
یا بلزسه او ملتک ایچندن هیچ بریسی کندی ایشنی کوچنی ترک  
ایدوبده عمومک ایشنی ایچون اوغراشه ز؟ اوغراشه بیله هر کس

اونی دیکله من، دیکله بیله غیر منتظم بر قاج کشی عمومی اداره ایده من. هر کس ایشه قاریشیر نتیجه ده کورلیدن بشقه بر شینه منجر اولز. بر ماکنهک ویا هر هانکی بر شیدک هم ایی وهمده سریع بر صورتده یاییله بیلمه سی ایچون کرک فابریقه لرده وکرک عملیات خانه لرده تقسیم مساعی به ناصیل لزوم وار ایسه طبق اونک کبی عمومی اداره خصوص مننده ده بویله جه تقسیم مساعی به لزوم واردر. بر فابریقه ده بر کبریت اعمالی ایچون اونک قوطیسی، کبریت چوبلرینی اجزاسنی وحتی اوزرینه یاییش بیله جق کاغذینی بیله باشقه باشقه آرملر اعمال ایدر. بر انسان دایما عین شیده اشتغال ایدر سه برملکه حاصل اوله رق اوشی هم سریع یاییلور وهمده غایت منتظم اولور. بوسایه ده مختلف ماهر صنعتکارلر طرفندن یاییلمش اولان بر کبریت ده هم نفیس وهمده اوجوز اولور. اگر بویله یاییلمیو بده بر کبریتک یالکیز بر شخص طرفندن اعمال ایدلمی لازم کلسه ایدی اوزمان بر قوطی کبریتی یایمق ایچون بر کیمسه بلکه ایکی کون اوغرا. شه جق ایدی و یاییلان کبریت ده غیر منتظم اولدینی حالده یینه قوطیسی آجق او آدمک ایکی کوندلکیله برابر ایسته دیکی کارینک مقدارینه مساوی اولور ایدی که بوکون برغروشه آلتان بر کبریت قوطیسی اوزمان الی آلتش غروشه آلتیر ایدی. بونکله برابر هر کسه وقت وزمانیله یتیشه جک قدر کبریت یاییله به جفندن ایش سورنجه مه ده قالب وشو صنایمدن جمیت،



بشریت هیچ بر استفاده ایده من ایدی . ایشه اداره عمومیه ده  
طبقی بویه در .

قوای ملیه نك تأمین و اداره عمومیه نك تنظیمی ایچون هر  
ایشی کندی اهانه ویریلیر . وهر ایشک اهلی اولانلرده اونی  
ایفا و اجراییه جالیشیرلر . اگر جالیشمالر سه نتیجه سنده مسؤل  
اولورلر . بو مسؤلیت اونلری بر قات دها جالیشمغه و حسن  
حرکت و دوغرولقدن آیرلامغه سوق و اجبار ایدر . بو سایه ده  
ملئک بوتون افرادی کندی ایشیله ، کوچیله مشغول اولدینی  
حاله کندیلرینک سعادت و سلامتلی تحت تأمین آلمش اولور .  
ایشته طبقی بر قابریقه ده کی تقسیم اعمال کبی بر جمعیت ده ده تقسیم  
اعمال واردر . او جمعیتک بوتون افرادینک تأمین سعادت و سلامتی  
ایچون بر طاقم اعمال و وظائفک اجراسنه لزوم واردر . بو افعال  
و وظائف ایسه ینه ملئک کندی تنسیبی اوزرینه ، او افعال  
و وظائفی حقیقه ایضیه مقتدر کیسه لره ویریلور . ایشه بو صورتله  
تقسیم اعمال صناعیه مقابله برده تقسیم اعمال اجتماعی میدانه  
کابر . مادامک قوای ملیه نك هر شعبه سنی در عهده ایده جک اولان  
کیسه لری ینه ملت تنسیب ایدیور او حاله هر شیدن اول ملئک  
عمومی بریره طوبیلاق و اونلرک رأی و اذن عمومیلریله بو قوای  
ملیه نی تشکیل ایتک ایجاب ایدیور . بوایه ممکن اوله ماز یعنی  
مجموعی میاونلره بالغ اولان و سویه فکریه لری مختلف بولان  
بو قدر افراد ماق بریره طوبیلاق و هر مسئله نی هپسینجه آکلاتمق

قابل دکلدر . او حالده د الوکیل کالاصیل ، فحواسنجه وکیل اصیل کبی اولدیقندن اونلرک هر اللهی بیک ذکورینه بدل برر وکیل انتخاب ایدوب کوندرملری بالذات کنسیدلرینک کلهلری دیمکدر . شو حالده ملت وکیللری هرشینک اساسنی تشکیل ایدر . عین زمانده ملتک هر بر فردی بوتون اداره عمومیه خصوصنده کی کنندی رأینی انتخاب ایتدیکی ذاته ویرمش اولد . یقندن ایلریده هیچ برشی سویله مکه حق اوله من . اونک ایچون ملت وکیللرینی یعنی مجلس بموئان اعضالرینی بر جوق کره تکرار ایتدی کمز وجهله ناموس ، اقتدار ووقوفله کسب تمیز ایتمش کیمسه لردن انتخاب ایتلی اکر مملکت داخلنده بویله کیمسه لر بولنمزه دیکر مملکتدن آریوب بولمیدر . خلاصه بو صورتله تشکل ایدن ملت وکیللرینه د قوه قانونیه ، دیرلر . بو قوه قانونیه مجلس بموئان ایله اعیانندن مرکب اولوب بونلرک وظیفه لری قانون یایمق و دیکر قوای ملیه پی تشکیل ایتک و اونلرک هر افعالی معاینه و تفتیش ایدوب خلاف قانون حرکتلرندن مسئول ایتلیمکدر .

ملت وکیللرینک قومیش اولدقلری بو قانونلری عمومه تطبیق ایچونده بر دیکر قوته دهالزوم واردر که بولمده قوه اجرائیه و یاخود د حکومت ، نامی ویریلور . بونلر مجلس عمومیه دن یعنی اعیان ایله بموئانندن آلدقلری قوانیندن أصلا آیریله ماز . فقط بو قوانینک ایستندلری نقطه لرینه اعتراض

ایده یلیرلر . بوندن باشقه ملتک روحی مثابه سندم اولان مالیه نك دخی حسن ایفاسی ایچون بر قوته دها لزوم واردر که بوکاده « قوه مالیه » دینور . قوه مالیه ملتک عموم نك ملت نامنه اوله رق ویردکاری و بریره بریکدیردکاری مبالغدن عبارتدر . بو مبالغ ویرکو ، اعانه و سائر صورتله مجلس مبهوثانک ویردیکی قرار موجبیجه اها لیدن طوپلانیر . ملتک قوه مالیه سی اها لینک قوه مالیه سیله متناسبدر . افراد ، فقیر ، سفیل اولورسه بالطبع آز ویرکو ویره جکنسدن ویا هیچده ویره میه جکنندن مات سندوغنده یعنی مالیه دده از باره بریکیر ویا هیچده بریکمز . اولنک ایچون هرشیدن اول ثروت عمومیه نك تأمینته چالیشماید . ثروت عمومیه نك تأمیننی ایسه معارف ، صنایع ، تجارت و زراعتله میدان کلیر . بونلرک دخی تأمیننی ایچون ینه او خصوصاته عائد بر قوه مالیه نك بولنسنه وابسته در . فی الحقیقه قوه معارف ، قوه صنایعه ، قوه تجاریه ، قوه زراعیه نامیه دخی برر شعبه حکومت موجوددر بونلری دخی ایلروده بحث ایده جکنز . بوندن باشقه هرخصوصده یالکنز حقلی اولمق کافی اولوب او حق مدافعه ایچون بر قوه جبرییه مالک اولمقده لازمدر . بوقوه جبرییه دخی اک مقدس اولان قوه عسکریه دن عبارتدر . برملت هرردلو مطالبی دیگر ماتلره طانتدیر . بیامک ایچون محتشم ، متین براردویه محتاجدر . ایشته بوقوه عسکریه دخی ملتک برقواید . مملکتده آسایش عمومینک انتظام و بقاسنی

تأمین ایتمک ایچون برده قوه انضباطیه به لزوم وارددر . بو قوه انضباطیه دخی ژاندارمه و پوایسلردن عبارتدر . قوانین قوائینک عایهنده حرکت ایدلری تأدیب و هرکسک حقوقی محافظه ضمتنده حقی و حقسزی تفریق و قانوناً جزالری تأمین ایچونده بر قوه عدلیه به دخی لزوم وارددر . ایشته بونلرک هبی تقسیم اعمال اجتماعی تشکیل ایدر . ایلریده برر برر ذکر ایدیله جکدر .

### خلاصه

- ۱ — قوای ملیه نه به دیرلر ؟  
قوای ملیه ماتک اداره و انتظامی تأمین ایدن ، شوکت و سطوتی محافظه ایلین بر طاقم هیئتلردن عبارتدر .
- ۲ — قوای ملیه باشلیجه هانکی قوتلردن عبارتدر ؟  
قوای ملیه باشلیجه : قوه قانونیه ، قوه اجرائیه ، قوه مالیه ، قوه عسکریه قوه انضباطیه و سائره کبی بر طاقم قوتلردن عبارتدر .  
اساس اعتباریه قوای ملیه ایکی قسم اولوب اونلرده قوه قانونیه ایله قوه اجرائیه در . دیگرلری قوه اجرائیه ده داخلدر .
- ۳ — تقسیم اعمال نه به دیرلر ؟  
تقسیم اعمال بر ایشک مختلف اقسامنک مختلف اهلی کیمسه لره تودیع ایدلسیدر .
- ۴ — تقسیم اعمال قاچ قسمدر ؟  
تقسیم اعمال ایکی قسمدر بریسی تقسیم اعمال صناعی ، دیگرلری تقسیم اعمال اجتماعیدر .
- ۵ — تقسیم اعمال صناعی نه به دیرلر ؟  
تقسیم اعمال صناعی بر ماکنه نلک و یا هر هانکی اعمال اولنه جق بر ماده نلک هم سرعت و همده نفاستله میدانه کله بیلمه سی ایچون اونلک هر بر قسمنک ماهر ، مقتدر و مستعد کیمسه لره ویرلسیدر .

## ٦ — تقسيم اعمال اجتماعى نه به ديپرلر ؟

تقسيم اعمال اجتماعى دڭنى برملتك ترقى وسما دتى ، عظمت وشوكتى  
تأمين ايچون او ملتك مختلف اداره و قوتلرينك او خصوصده ماهر  
مقتدر و مستعد كيسه لره و برلسيدر .

## ٧ — قواى مليه بى كيم تشكيل ايدر ؟

قواى مليه بى بيه بالذات ملت تشكيل ايدر ملت اول و كيللرى انتخاب  
ايدوب كوندرد كدن سوكره بوو كيللرى قانونلرى ياپار و بوقانونلرى اجرا  
ايتديرملك ايچون ده قوه اجرائيه بى تشكيل ايدر كه بوقوه اجرائيه نك  
هيئت مجموعه سى مختلف قواى مليه دن عبارتدر .





## اون برنجی بحث

### قوة قانونیه — پارلمنتو

قوة قانونیه ویا قوة تشریعیه ملت ایله حکمدارک وکیلرندن عبارت اولوب منافع وسعادت عمومیه لایحون لازم کلن قوانینی تنظیم ایدر ، ماتک هر بر امور و خصوصاتنه قاریشیر و حکومت مأمورلرینی کندی حرکاتندن مسئول طوتار . قوة قانونیه غیر مسئولدر . چونکه ماتک هر فردی کندی رأینی کندی رضاسیله اونلره ویرمش اولدیغندن اونلر ماتک عایینده برشی یابسه لر بیله ملت اونلری مسئول ایده من . کرچه هپسینک افکارو آمالی وطن و ملتک سطوت و تعالیدی اولدیغندن ایچملرنده بونک خلافتده بولنانلرک درحال پنجه قانونه تسلیم ایدیله جکی شبهه سز ايسه ده ملت وکیللری بالذات ملتک کندیلری دیمک اولدیغندن ملت اونلره بونی نیچون بویله یایدیکز ؟ دیه من . مشورت خصوصنده طبعی دیه یایر ، لکن اونی مسئول ایتک خصوصنده دیه من . زیرا کندی دوشن اغلاماز دپرلر . اگر ملت کندی

سعادت وسلامتك تحت تأمينه آلمنسى آرزو ايدرسه كوندره جكي  
و كيلرى ابي انتخاب ايتسون . چونكه ايشك اساسى ملت  
و كيلر نده در . زيرا حاكيت مليه آنجق بويله لكه تحت تأمينه  
آلير . باشقه درلو اوله ماز .

قوة قانونيه ايكي هيئتدن عبارتدر . بونلردن بريسي هيئت  
مبعوثان ديكرى دخى هيئت اعياندر . بونلره مجلس مبعوثان  
ويا اعيان دخى دينلديكي كبي يالكه زجه اوله رق مبعوثان و اعيان  
دخى دينلور .

مجلس مبعوثان ملت طرفندن رأى عمومى و خفي ايله انتخاب  
اولنمش كيمسه لدر . هر اللى بيك ذكوره بدل برر اعضا  
سچيلوب بالذات ملت و كيللرى اولمق اوزره در سعادت كوند-  
ريابر . مجلس مبعوثان اعضا لرى استانبولده مجلس اعيان  
اعضالردن آرى اوله رق اجتماع و انعقاد ايدرلر .

مجلس اعيان دخى ينه ملت و كيللرى اولوب اونلرده  
مجلس مبعوثاندىن آرى بر محله اجتماع و انعقاد ايدرلر . مجلس  
اعيان دخى مبعوثان ايله بر لكده قانونلرى تنظيم و تدقيق ايدر .  
و هيئت اجرائيه نك افعالى تفتيش ايلر .

قوة قانونيه مشروطيته اداره اوانان هر ملتده بويله ايكي  
هيئتدن عبارتدر . فقط بونلرك صورت انتخابلرى مختلفدر .  
فرضا انكلترده مجلس مبعوثانه بدل عوام قماره سى و مجلس  
اعيانه بدل دهلوردرلر قماره سى واردر . عوام قماره سى اهانلنك ،

لوردلر قماره سی دخی زادکانک وکیللریدر . فرانسه ده ایسه مجلس مبعوثان اعضالری طبقی زمکی کبی رأی عمومی و خفی ایله انتخاب اولندیغی حالده اعیان اعضالری دخی حکمدار ویا جمهور رئیس طرفندن انتخاب اولنیوب بالذات ولایت مجلس اداره لری طرفندن انتخاب اولنور . زیرا ، فرانسه جمهور رئیس قوة قانونیه ده دکل قوة اجراییه ده ذی مدخلدر . بزم قانون اساسیمزده مجلس اعیان اعضالری نیک هپسک حکمدار طرفندن انتخاب اولنیوی مشروطیته موافق اولدیغندن هیچ اولمزسه اوچده ایکیسکینه مات طرفندن ( سنجاق و ولایت مجلس اداره لری ویا مجلس مبعوثان اعضالری طرفندن ) و اوچده بریسک دخی پادشاه ویا حکومت طرفندن انتخاب ایدلمسی الزمدر . و بونک ده بویوله تذکره قونوله جفی قویاً مأمولدر .

هر نه صورتله اولورسه اولسون هر حکومتده قوة قانونیه نیک بویله ایکی مجلسدن عبارت اولدیغک اسبابی برآز تدقیق ایتک هر حالده فائده دن خالی دکلدر .

معلوم اولدیغی اوزره بر حکومت مشروطه ده هر کس قانونه قارشى مساوی حقوقه مالکدر . فقط بر جمعیتک تشکل و جریان طبیعیمسند حقیقی بر طاقم مساواتسز لقلر واردر . مثلاً برزنکیین ایله بر فقیر بر برینه مساوی اوله مدینی کبی بر عالمه بر جاهلده یکدیگریله مساوی اوله مز . بناءً علیه عدم مساوات ، خالق و طیبی اولوب مدنیت حاضره هندوز بونک ازاله سنه موفق



اوله مامشدر . اوحالده خلقی وطیبی اولان شو حالک ازاله سی  
 ممکن اولمدینی کبی بایک انتظام عمومی ایچون بر واسطه کبی ده  
 تلقی اولته بیلور . چونکه دنیاده هرکس زنکین اولورسه اعمال  
 شاقینی کیم ایفا ایده جک ؟ هرکس عین سویه ده عالم اولورسه  
 ویا جاهل بولورسه ترقی علم و کاله کیم رغبت ایلده جک ؟  
 چونکه مشهور برعالمک دیدیکی کبی ترقی برآت یاریشی کیدرکه  
 معلوم ومعین اولان مکافات هبسی دکل ایچلرندن برویا برقاجی  
 قازانیر . اکر انسانلر مادی ومعنوی بر طاقم تکملات خصوص  
 صنده هبسنک عین سویه بی محافظه ایتملری لازم کلیرسه ایشته  
 بواک بیوک بر استبداد تشکیل ایدر . زیرا فطرة هرکس مساوی  
 دکادر . هرکس مختلف استعداد و قابلیت مالکدر . هرکس  
 استعداد ، قابلیت وسی بی نسبتده اثر ترقی کوسترر . اوحالده  
 انسانلر خلقة مساوی اولدقلری کبی اجتماع نقطه نظرندن ده  
 مساوی دکادرلر . چونکه جمیعک انتظام و آهنکی ایچون  
 هرکسک بر برله وعموم اولان مناسباتی یکدیگرینک منفعت  
 واحتیاجی اوزرینه استداد ایتدیرلر یکنندن و شیمدی یه قدرده بو  
 اساسی صارصه جق باشقه بر اساس بوائه مدیقشدن او حالده  
 هرکسک بو خصوصده مساوی اوله میه جفی میدانه چیتار . چونکه  
 هرکس عین صورته جالیشه مز . چوق جالیشانلر جمعیه ، مد  
 نیته انسانیته بیوک بیوک خدمت ایدرلر ؛ طبیی بیوک بیوک  
 تروته ، مکافاته ، سعادت مظهر اولورلر . اوحالده بو خصوصده

اونلری بکطرزده بولدیرمه، چالشمق ظلم و استبداد تشکیل ایتمکدر . مساواتدن مقصد عمومک صرف قانون دائره سنده مساوی اولمایدیر . یعنی برملتک بر جمیتک اداره و انتظامی ایچون قونیلان قوانیندن عمومک متساویاً مستفید و مسؤول اولمایدیر . زنکین ، فقیر ، عالم ، جاهل قانوناً مساویدیر . یعنی اونلردن بریسی خلاف قانون بر حرکتده بولورسه قانون اونلری زنکین ویا فقیر ، عالم ، ویا جاهل دیهرک عفو ایتمز . جزای سزاسنی ویرر .

ایشته شو اساس اییدن ایییه آ کلاشلدقدن صوکره قوه قانونیه نك نه سبه مبنی ایکی مجلسدن عبارت اولدیغنی آ کلامق قولایلاشمش اولور .

مادامکه انسانلر یالککز قوانین موضوعه نقطه نظرندن مساویدرلر . احوالده غیر مساوی اولان بوانسانلرک هر بر حقوقنی بر صورت متساویهده حفظ ووقایه ایده بیلماک لازمدیر . اونک ایچونده انسانلری ایکی صنفه آیرمق وبوصنفلرک هر برینه مخصوص اولان اعضالری دخی آیری آیری اجتماع ایتدیروب هر برلرلرینک مذاکراتنی دخی بر بویه مقایسه و مقابله ایدوب مجموعنک نتیجه سنی استحصال ایتماک ایجاب ایدر . بو ایکی صنفدن بریسی زنکین ویا عالم دیگرى دخی فقیر ویا جاهل صنفدن عبارتدر . اگر بویه ایکی مجلس تشکیل ایتیموده یالککز فقیر طرفندن ویا یالککز زنکین طرفدن منتخب یالککز برر

مجلسدن عبارت قالسه ايدى اوزمان بوايكي صنفدن مبعوثى اولميان صنفك حقوقى ضايع ايدلش اولوردى . عين زمانده بونلرك انتخاب ايدم جكلرى انصارلرده وقوف تامه يه مالك اوله ميه جقلرندن خطا ايتك احتماليده اولوردى .

قوة قانونيه نك بويله ايكي مجلسدن عبارت اولمى بر كره مساواتك محافظه سنى تأمين ايتديكي كې برده يكدى كرينك افراط وشدتنى تعديل ايتك كې بر فائده مهمه يي حائزدر . اونك ايچون هرشى ايلك اول مجلس مبعوثانده تذكر اولتور . وصو كره مجلس اعيايه كيدر مجلس اعياي دنخى بونى تذكر ايدرك افراط و تفریطنى شدت و خفتنى تعديل و تصحيح ايلر اوندن صوكره اجرا برحاله كلير .

### خلاصه

- ۱ — قوة قانونيه ويا پارلمنتو نيه ديرلر ؟  
قوة قانونيه قوانين و نظاماتى تنظيم و ترتيب ايدن برهيتندر .
- ۲ — قوة قانونيه يي كيملر تشكيل ايدر ؟  
قوة قانونيه يي ملت ايله حكمدارك و كيللرى تشكيل ايدر .
- ۳ — قوة قانونيه مسئوليدر ؟  
قوة قانونيه مسئول دكلدر . چونكه قوة قانونيه ملتك و كيللرى بناء عليه بالذات كنديلرى ديمكدر .
- ۴ — قوة قانونيه قاچ هيتندن عبارتدر ؟  
قوة قانونيه ايكي هيتندن عبارتدر اولنلرده هيت مبعوثان ايله هيت اعياندر .
- ۵ — هرايكي هيت برانكده يي يوقسه آبرى آبرى مى انعقاد ايدر ؟

هرایکي هیئت آیری آیری انعقاد ایدر.

۶ — هر حکومت مشروطه ده قوه قانونیه نك بویه ایکی مجلسدن عبارت اولسنگ سبی نه در ؟

هر حکومت مشروطه ده قوه قانونیه نك بویه ایکی مجلسدن عبارت اولسنگ ایکی سبی واردر . اولردن بریسی افراد اهالی اره سنده کی مساواتك محافظه سی دیگر کی دخی مجلسلردن برینگ شدت و افراطنی خطا و صوابنی تعدیل و اصلاح و تدقیق ایتسیدر .

۷ — حکمدارلر قوه قانونیه ده می یوقسه قوه اجرائیه ده می صاحب نفوذدرلر ؟

بوهرملتده دکشیر آلمانیا برحکومت مشروطه اولدینی حالده حکمدارلر زنده کی نفوذ و صلاحیتك درجه سیله اعتباریله همان مستبدلکنه یقین بر موقع اشغال ایدر . انکاتره ده ایسه حکمدارلر هم قوه قانونیه هم ده قوه اجرائیه ده ذی مدخلدر . فرانسه جمهور رئیس ایسه یالکز قوه اجرائیه نك رئیس اولوب قوه قانونیه یه اصلا مداخله ایتز . بدی سنه ده بردفعه فرانسه جمهور رئیس دکشیدیکی زمان مجلس مبعوثان ایله مجلس اعیان ، مجلس اعیان رئیسنگ تحت ریاستنده اوله رق اجتماع ایدرلر بوکا قولفره دینور بو قولفره ده جمهور رئیسنی انتخاب ایدرلر اولدن سوکره جمهور رئیس ده دیگر نظاری تشکیل ایدر .

بزم پادشاهلر مضی هم قوه قانونیه همده قوه اجرائیه ده ذی مدخلدر . فقط بونلرک هبسی قوه قانونیه نك تصویب و تنسیینه موافق اولق شرطدر . مجلس مبعوثان و اعیانك برلکده قرار ویرمدکلری برشینی یایغه نه پادشاهك نه صدراعظمك و نه ده ناظرلردن برینگ قطعاً حق و صلاحیتی یوقدر





## اون ایکنجی بحث

### قوة اجرائیه — حکومت

قوة اجرائیه هیئت قانونیه نك وضع ایتهدیکی قوانینی اجرا ایدن بر هیئتسدر . قوانینی وضع ایتمك وعین قوانینی مملکته تطبیق ایله مك هیج بردولتهه یالکمز بر هیئته ویرلمه مشدر . مستقل حکومتلرده بوکی استئنار اوله بیلورسده معقول ، مشروع، ومشروطی اولان هیج بر حکومتهه بو حال کورلمه مشدر . اساساً بوایکی قوتك بر بردن تماماً آیری اولمسی ایجاب ایدر . چونکه بر قانونی وضع ایتمك باشقه اونی اجرا ایله مك ینه باشقه در بونلر آره سنده کی نسبت نظریات ایله عملیات آره سنده کی نسبت کیدر . هر هانکی بر علمك بر نظریاتی برده عملیاتی واردر . اونك نظریاتی درسخانه ده او علم ویا ماده حقته در میان ایدیان افکار و ملاحظات فیه دن عبارتدر . عملیاتی ایسه درسخانه ده در میان اولتان افکار وملاحظات بال تجربه ، بالمشاهده عملی

اوله رقیده کورسترمک و افکار و ملاحظاتی اشیا به ده تطبیق ایلدکدر .  
ایشته هیئت قانونیه علومک نظریاتی ، هیئت اجرائیه ایسه  
عملیاتی کیدر . کذلک بر بنا یایدیرمق ایچسون اولا او بنانک  
بر بلانی یایدیرمق و او بلان موجبجه او بنانی انشا ایتدیرمک  
ایجاب ایدر . یاییله جق بلان ایسه هر کسک جینده کی پاره سنه ،  
وسعت و اقتدار مال یسنه کوره اوله جفی کبی او بلانه کوره  
یاییله جق بناده بالطبع بلان نه ایسه اوندن عبارت اولور . فقط  
هر حالده بنانی انشایه باشلامزدن اول مطلقا اونک بلانی یایمق  
ویا یایدیرمق ایجاب ایدر . بلان تماماً یایلدقدن و هر بر قساطی  
ایجه تدقیق و تحقیق ایلدکدن صوکره ایسه باشلانیلیر . ایشته  
طبقی قوة قانونیه ایله قوة اجرائیه ده بونک کیدر . قوة قانونیه  
یاییله جق بنانک بلانی یاپان بر مهندس ، قوة اجرائیه ایسه او  
بلان موجبجه یاییله جق بناده چالیشان بر معمار اوسته و عمله لردر .  
دیئمککه بر بنانی یایمق ایچون بر مهندس ایله بر معمار ناصل که  
عین مقصده خادم فقط مطلقا بر برندن آیری ایکی مسلک صاحبی  
ایسه لر قوة قانونیه قوة اجرائیه ده طبقی اولر کیدر . بونلردن  
باقیه بو ایکی هیئتک آیری آیری اولمسی دها بک چوق فوایدی  
جامعدر . بر کره تقسیم اعمال قاعده سنجه هر ایکی هیئتکی تشکیل  
ایدن اعضا لر و مأمورین کندی وظیفه لر نده ملکه و رسوخ صا  
حبی اولور لر . ثانیاً غایت واسع و قاریشیق معاملاتی حاوی  
اولان بویله مهم شیلرده هم تشویش ذهنه همده تشویش معامله به

میدان ویرلمز : نالنا یا بیلان قانونلر قطعی و صریح اولایه جق اولورسه او قانون حکمسنز اولور . بویله بر قانوندن هم یاپان و همده اجرا ایدن بيله ممنون اولمز . انسان بر طرفدن یاپار دیکر طرفدن ییقارسه اوندن عمو مجده هیچ بر خیر کلز ، خلاصه اجرا اوله جق قوانین اولجه تماماً یا بیلای قطعی و صریح بر حال آلدقندن صکره اجرا و تطبیق ایدلملیدر . ایشته شوملاحظاتندن آکلاشلدیغه کوره هیئت قانونیه ایله هیئت اجراییه نك بر برندن آیری اوله رق تشکلی لازم کلیور . قوه اجراییه نك مرکزی بر هیئتی ، برده توابی واردر . قوه اجراییه نك هیئته « هیئت وکلا ، ویا « قابینه » دینور .

هیئت وکلا ویا قابینه باش وکیل ایله برنجی درجه ده کی ناظرلردن عبارتدر . قوه اجراییه قوه قانونیه قارشی مسئول بر هیئت اولدیغندن قابینه ده مجلس عمومی قارشی مسئول اولور . ناظرلردن بریسی مسئول اولورسه بومسئولیت ، درجه سنه کوره دیکر ناظرلر ویا قابینه هیئتنک هپسنده عائد اولور . مجلس مبعوثان قابینه حقننده اعتماد کوستر من ایسه قابینه یی تشکیل ایدنلرک استعفا ایتلمی الزمدر .

هیئت وکلای تشکیل ایدن ناظرلر : باشنده باش وکیل اولور آندن صوکرده شیخ الاسلام افندی داخلیه ، خارجیه ، حربیه ، بحریه ، معارف ، تجارت و نافع ، اورمان معادن و زراعت ، طوبخانه ، عدلیه مالیه ناظرلری و سائرده عبارتدر .

کړک باش وکیل وکړک ناظر لر مجلس مبعوثان اعضا نرندن ویاخورد  
مجلس مبعوثان اعضا لرینک اعتمادنی قازانا نردن اولور . بوسورتله  
مجلس مبعوثانک انتخاب و رایسه مظهر اولانلر ذات شاهانه  
طرفندن تعیین اولور . ۱۲۹۳ ده وضع اولنان و برقاچ ما . تمذیل  
واصلاح اولنش بولنان قانون اساسیمزده صدر اعظم ایله  
شیخ الاسلامک دوغروندن دوغرویه بالذات ذات شاهانه طرفندن  
تعیین اولنه جنی مصرح ایسه ده شونی ای بیاماید که مجلس  
مبعوثانک رایسه مظهر اوله میان هیچ برناظر حتی الک اوفق بر  
مأمور بیله یرنده اوطورده مز . هر نه قدر ذات شاهانه هم قوة  
اجرائیه همد قوه قانونیه ده ذی مدخل ایسه ده کنديسنک غیر  
مسئول اولسی بوا یکی قوای مایه ده کی درجه نفوذنی کسرايدر .  
یعنی هرا یکی قوتک ده رئیس اولمغه مطلقا مستبد بر حکمدار  
کبی ایستدیکنی پایه مز ایستیان شیدک یا پسنی آنجق مجلس  
عمومینک تنسیبی اوزرینه امر ایدر .

پارلمنتو دیجه اعیان ایله مبعوثانندن عبارت اولان قوه قانونیه  
ویاهیئت قانونیه آکلاشلدینی کبی یالکز حکومت دیجه ده قوه  
اجرائیه آکلاشیلیر . فقط دولت دیجه ده هم قوه قانونیه هم ده  
قوه اجرائیه هیئت عمومیه سیله آکلاشاملیدر که . یعنی پارلمنتو  
ایله حکومت ( رئیس حکمدارده داخل اولدینی حالده ) دولتی  
تشکیل ایدر . دیمکه اسکیدن اولدینی کبی دولت کله سنی یالکز  
پادشاهده دکل ملاتق قوای عمومیه سنی بردن ذکر ایدن شو عمومی



تعميرده استعمال ايدہ جکيز واك مناسبه ده بودر بوندن دها منا .  
سب ودها اي باشقه برکله بوئنه مامشدر .

قوة اجرائيه نظري اوله رق ايکي به تقسيم اولنه بيلور .  
بريسي مرکزي ديکري محيطي تشکيل ايدر .

قوة اجرائيه نك مرکزده بولتان قسمي هنوز ذکر ايتديکمز  
قابينه دن واو قابينه بي تشکيل ايدن ناظرلردن هر بريسنك دائره  
مخصوصه لرندن عبارتدر .

قوة اجرائيه نك قسم محيطيسي ايسه عسکري ، ملکی ويا  
هرهانسکی برشعبه حکومتدن اولورسه اولسون بريسنك ولايت ،  
سنجاق ، قضا ، والحاصل ناحيه لره وارنجه به قدر کافه مأموريندن  
عبارتدر . بوصوکره کی هر بر امور وخصوصاتده مرکزده تابع  
اولوب يالکيز حال وزمان و منافع عموميه نك ايجاب ايتديردیکی  
بعض خصوصاتده بالاخره مرکزده بيلديرمک وياسطاحی تفرعانی  
هيچ ده بيلديرمه مک اوزره کنديسينده برده « توسيع  
مأذونيت » واردر .

ايشته حکومتک بوتالی قسمنک بويله مرکزده تابع اولسي  
کيفيته . « مرکزيت » و مرکزده تابع اوليوب کندي باشلرينه  
اداره ايتلمرينده « عدم مرکزيت » دينور .

فقط حال حاضرده بزم اداره مشروطه من براداره مرکزیه  
اولديفندن اونک ايجون بزده مرکزى اوله رق اداره اولتان بر  
حکومت مشروطه دن بحث ايدیوروز

صدراعظم . — قایمیه رئیس اولوب مجلس مبعوثانك انتخاب و رأیی اوزرینه ذات شاهانه طرفدن تعیین اولنور .  
صدراعظم قایمیه نك هر برامور خصوصاتندن و حکومت ایشلر-  
ندن مسئولدر . ذات شاهانه ایله ملت آره سنده بر وکیل کبی  
اولوب عین زمانده ذات شاهانه یه عرض و تقدیم اولنه جق هر بر  
امور خصوصاتنه قاریشیر . فقط مخالف قانون اولان افعالنندن  
مجلسه قارشی مسئولدر .

حربییه ناظری . — حربیه ناظری اردولری اداره و تنظیم  
ایله برابر قوای عسکرییه یی محور لایقنده طوتار و حدودلری  
تحکیم و تقویه ایتمکله برابر محاربه و قوعه کلدکده عسکری سوق  
و اداره ایدر .

بحریه ناظری . — بحریه ناظری عموم دونما و عساکر  
بحریه یی اداره ایدر و ساحلاری محافظه ایلر .

داخلیه ناظری . — قوانین و نظاماتی داخاندن تطبیق  
ایچون والی ، متصرف و قائم مقاملرله اداره داخایه یی تأمین ایدر .  
خارجیه ناظری . — سفیر و شهیندرلر واسطه سیله دیگر  
ممالکله اولان مناسبات تجاریه و سیاسیه مزى تأمین ایدر .

امنیت عمومیه مدیری . — پولیس و ژاندارمه واسطه سیله  
آسایش و انتظام داخلی یی محافظه ایدر .

دیگر نظارتلرک دخی هپ اسملری اوزرنده اولدیقندن  
ذکرندن صرف نظر ایدلمشدر .

ناظر لرہ کلنجہ، برده دور استبدادده صدر اعظم آیدہ ( ۱۵۰۰ )  
لیرا ناظر لر دخی بشیوزدن بیک لیرایہ قدر معاش آلیرلرایدی . ارده  
بیجہ بیکلرجه احسانلرده مظهر اولورلر ایدی . فرانسه ده کی ناظر لر  
سنه ده ( ۶۰۹۰۰۰ ) فرانیق یعنی سنه ده ( ۲۷۰۰ ) لیرا ، آیدہ

ایسه ( ۲۲۵ ) لیرادن عبارتدر . فرانسه ده والیرل دخی صنفنه کوره سنه ده ۱۸ بیک فرانقیدن ۳۵ بیک فرانق یعنی سنه ده ۸۰۰ دن ۱۵۰۰ لیرا آره سنه ده آیده ایسه ۶۰ لیرادن یوز لیرایه قدر معاش آلیرلر اگر بزم اداره منه تطبیق ایتمک لازم کلیرسه نصف اولسه بیلله هیچ اولزسه نلث ویا ربیعنی طی ایتملیدر . زیرا بزم مملکت مزده دها آژ باره ایله اولردن دها اینی یشامق ممکندر .

### خلاصه

- ۱ — قوة اجرائیه ویا حکومت نهیه دیرلر ؟  
قوة اجرائیه ویا حکومت قوة قانونیه نك وضع ایتمدیکی قوانینی مملکته تطبیق واجرا ایدن برهیئندر .
- ۲ — قوة قانونیه ایله قوة اجرائیه هر حکومت مشروطه عین هیئتمنی عبارتدر ؟  
خیر ! قوة قانونیه ایله قوة اجرائیه هر حکومت مشروطه وجهو- ریه ده مختلف هیئتلردن عبارتدر .
- ۳ — قوة قانونیه ایله قوة اجرائیه نیچون مختلف هیئتلردن عبارتدر ؟  
چونکه بونلر آره سنه ده کی فرق نظریات ایله عملیات آره سنه ده کی ویا خود بر بنانك پلانیه انشا آتی ویا خود بر مهندسله بر معمار آره سنه ده کی فرق کییدر تقسیم اعمال نقطه نظرندن بوابکی هیئتك مطلقا آیری اولسی لازم کلیر . بوندن بشقه آیری بولنمسنده دها پك چوق فوائد واردر ؟
- ۴ — هیئت وكلا ویا قایمه نهیه دیرلر ؟  
قوة اجرائیه نك هیئت مرکزیه سنه یعنی باش وکیل ایله ناظرلرك هیئت مجموعه سنه دینور .
- ۵ — هیئت اجرائیه مسئولیدر ؟  
اوت هیئت اجرائیه هیئت قانونیه یه قارشی مسئولدر . هیئت قانونیه طرفندن صوریلان هر سؤاله لازم کلن جوابلری ویرمکه مجبوردر .
- ۶ — قایمه نك ایشلرندن کیملر مسئولدر ؟

قايينه نك ايشلرندن باش وكيل ايله قايينه يه اشتراك ايدن ناظرلر مسئولدر . بونلرك برينك مسئوليتي ديكرينده عائددر .

۷ — مجلس مبعوثان قايينه حقننده اعتماد كوسترمزسه قايينه اركاني نه ياپار ؟

مجلس مبعوثان قايينه حقننده اعتماد كوسترمز ايسه قايينه اركاننك كافه سي ويا حقننده اعتماد اولنيانلري استعفا ايدر .

۸ — قايينه يي تشكيل ايدنلري صاييكنز ؟

صدراعظم ، شيخ الاسلام ايله حربيه ، بحريه ، داخليه ، خارجيه ، اورمان ومعادن ، طوبخانه ، معارف ، ماليه ، تجارت وتافهه ، عدليه ناظرلريدر .

۹ — پارلمنتو ، حكومت ودولت كلهلري آزه سنده كي فرق نه در ؟  
پارلمنتو ، براداره مشروطه ده مجلس مبعوثان ايله اعيانندن عبارت بولسان هيئت قانونيه يه ؛ حكومت ، على العموم هيئت اجرائيه يه ؛ دولت ايسه پارلمنتو ايله حكومتك يعنى هيئت قانونيه ايله هيئت اجرا .  
ثيه نك مجموعه دينور .

۱۰ — پادشاه قوه قانونيه دنمى . يوقسه قوه اجرائيه دنميدر ؟

پادشاه هم قوه قانونيه وهمده قوه اجرائيه ده ذى مدخلدر . فقط پادشاه اداره اتمز . تنظيم وترتيب ايديلن لايحه لرك اجرا سنى امر ايدر . پادشاه بالذات هيچ بر ايشه قارشمز . اكر قارشمز اولسه قايينه كي ياپديفنندن مسئول اولسى لازم كلير . حالبوكه پادشاه غير مسئولدر . غير مسئول اولسى بر چوق منافع تأمين ايتسندندر . بر كره حكمدارلرك مسئول اوللري همه حاله ايكيده بر دكيشمه لرني انتاج ايدر . بوايه داخلي خارجى احوال اداره وسياسيمزى صادصار بر حكمدارك چابوق چابوق دكيشمى اين بر نتيجه ويرمز . بوندن باشقه هر كس حكمدار حقننده حسن ظنه ورابطه معنويه مالك اولد . يفتندن حكمدار مسئول اولدقجه بوحسلر زائل اولدجنى كي حكمدارك نفوذينك هر كسجه دره جه سي ده تزيل ايدر

خلاصه حکم‌دارلر هر دولته غیر مسئولدر . غیر مسئول اولملری ده  
آتجق بو صورتله یعنی کندیلرینک بالداث ادارهیه قارشیموب هیئت  
قانونیه‌نک افکارینی ترویج ایتسیله تحت تأمینہ آلمشدر .

۱۱ — مرکزیت وعدم مرکزیت نهیه دیرلر ؟

هیئت اجرائیه‌نک قایینه‌بی تشکیل ایدن ارکانندن هر بر ناظر پای  
تختسده کندی دائره‌سی داخلنده بر مرکز تشکیل ایدرکه ولایت  
سبحاق وفضالرده کی ملکی ، عسکری وعدلی وسائرهنک منسوب اولد .  
قلری نظارتلرک مرکزینه تابع اولملری وهر بر امور و خصوصاته  
مرکز رأینی آلفه مجبور بولملرینه مرکزیت دینور .

عدم مرکزیت ایسه بونک عکسنه اولوب مرکزدن خارج بولنان  
مأمورینک هر امور و خصوصاتی مرکزیه بیلدیرمکسزین کندی بیلدکلری  
کی اجرا ایتلریدر .

۱۲ — توسیع مآذونیت نهیه دیرلر .

توسیع مآذونیت علی‌العموم مأمورین مرکزیه تابع اولقله برابر  
بعض خصوصاته ایستدکلری کی حرکت ایتک حق و صلاحیتندن  
عبارتدر . بو خصوصات ایسه یا عجله برایش اولور و یا خود مملکتنه نافع  
بر نقطه‌ده بولنور و یا خود زمان ، حال کندیسنی اوله بر طرزده  
حرکت مجبور ایدر . بولری ایترسه اجرا ایتدکدن سوکره مرکزیه  
بیلدیره بیلیر . عین زمانده اجرا آتنک هر بر تفرعاتی مرکزیه بیلدیر  
مکه مجبور دکلددر . سطحی بر جوق شیلری یا معنی توسیع مآذونیت  
دائره‌سند حرکت ایتکدر .





## اون اوچنجی بحث

### قوة ماله

قوة ماله بر ملتک اک بیوک واک اساسلی قوتیدر هر شی  
پاره ایله میداننه کلیر . پاره ایسه قوة ماله یی تشکیل ایدر . بر  
دولتک قوة ماله سی ملتک قوة ماله سیله متناسبدر . بر ماتی  
تشکیل ایدن اهالی نه قدر زنکین ونه درجه صاحب ثروت  
اولورسه بالطبع حکومتده اونسبتده ویرکی ویره جکلرندن  
حکومتده اونسبتده زنکین اولور . او یله ایسه اولاً ملتک قوة  
ماله سی تحت تأمیننه آلامیدر که بوسایه ده دولتکده قوة ماله سی  
تحت تأمیننه آلمش اولسون . ملتک قوة ماله سی درت شی ایله  
تحت تأمیننه آلیراونلرده : معارف ، تجارت ، صنایع وزراعتدن  
عبارتدر . معارف حقنده نه قدر سوز سوزلنسه یینه آذرر .  
تجارت صنایع وزراعت دخی معارف اولمدقجه اساسلی صورته  
تحت تأمیننه آله من . تجارت بر مملکت داخلنده حصوله  
کان هر نوع اشیایی دیگر مملکتلرده اخراج ایتک دیگر  
مملکتلرده کی شیلری ده او مملکته ادخال ایتکدر . فقط  
تجارتده کوزهدیله جک مهم بر نقطه وار ایسه اوده پاره نک

داخله قالمی در . پاره عین حکومته تابع بر شهرک برندن  
 چقبوب مملکتک دیکرینه کیرمه ملیدر . اجنبی مملکتلرنده کی  
 اوردی بالذات تجارت سایه سنده کندی مملکتتمزه جلب ایتمکدر .  
 تجارت دیمک بیوک بیوک ایشلر طوتمق و مملکتتمز داخلنده  
 شمدوفرلر ، ترامویلر ، واپورلر ایشلتمک ، معدن اوچاقلری  
 آچدیرمق خلاصه مملکتک نهیه احتیاجی وار ایسه اونلرک  
 جمله-نی قره دن فعله چیقارمقدر . بونلری یایمق نه قدرزنکیکن  
 اولورسه اولسون بر آدمک ایشی دکلدر . بونلری یایمق ایچون  
 بر مملکت داخلنده چوق زنکیکن آدملرده لزوم یوقدر . او  
 مملکت اهاالیسنک هپسی ویا قسم اعظمی بریره طویلانوبده  
 مشترکاً بویله بر مهم برایش یایمق هپسی برر مقدارپاره ویررلر  
 ایسه ایش اولورکیدر . فرض ایدنمکه بر مایون لیرالق بر  
 معدن ویا بر شمدوفر یایدیرمق کبی مهم بر ایش ظهور ایتسه  
 اونیده اجنبی بر شرکت آلمق ایستسده بز مملکتتمزه اجنبی  
 شرکت صوقیوب وپاره مزک دخی اجنبی مملکتتمه کیمه مسنی  
 آرزو ایدر ایسهک بر چوق کیمسه لردن مرکب بر شرکت تشکیل  
 اید بیلیرز . او شرکت داخل اولان کیمسه لر نه قدر فقیر اولورلرسه  
 اولسونلر برر لیرا ویره بیایرلر و بو صورته هم هر کس پاره  
 قزایر وهمده ملتتمزک سعادتی تحت تأمینه آلتیر . اکر افراد  
 ملت ارسسینده بو کبی اتحاد وامنیت اولمز و بویله اوفقی تفک  
 شرکتلر تشکیل و تأسیس ایتمز ایسه نافله قوه مالیه تأمین ایدیلهمز .



خلاصه تجارتده کوزه ديله جك اك مهم نقطه پاره يي افراد ماتدن  
 چك ميبوب اجنبي مملكتلرندن چك مك وداخلي هر بر شركتلري  
 بالذات ملتزمه عائد كيمسه لره ويا ملت شركتلرينه ويرمكدن .  
 اكثر يا كورلد يكي اوزره اناطوليدنه شهر ليلر كويلولره بش  
 آلت يوز غروش بر پاره ويرر هر سنه بو پاره نك فائضنه بدل  
 اولق اوزره كويلونك بتون محصولاتنه اورناق اولورلر . اك  
 آزدن هر سنه اون بش يكرمي لبرالق بغدادى آلبرلر فقط  
 اسكى پاره سنه هيچ خلل كلز . زواللى كويلولر بردن او قدر  
 پاره يي ويره ميديكندن هر سنه بويله بر ظلم آلتنده ازيلير . شمدى  
 بوكا تجارتى دينور ؟ بوكا تجارت دكل سرقت دينور . تجارتده  
 عدالت ، استقامت وحقانيتى هيچ بر زمان الدن بر اقمه ميلير .  
 شيمدى يه قدر مملكت زده نه قدر تاجر ، نه قدر تجارتله مشغول  
 كيمسه لر وار ايسه همان هپسى اصولى دائره سنده حقانيتله تجارت  
 ايتيموب دائما مشتريلرينى آلداتمق صورتيله تجارت ايديبور .  
 مثلا بردكاندن بر اشيا آلسه كزديكر بردكانه كيتديك كزده عين  
 اشيا يه بش مثلى فيآت ايسه مكدن صيئ يامبورلر . حالبوكه  
 ايكي سنده عين مال ، بويله تجارتى اولور ؟ ايشته بونلري  
 اورته دن قالديره جق ينه اهايلير . اهالى تجارتك يسه كندى  
 قرداشلرينى آلداتمقدن عبارت اولمبوب آنجق صرف ايديلن  
 املك وپاره نسه بتمده معقول و مشروع اوفق بر كردن عبارت  
 اولديغى بيايرلر سه وبتون افراد اهالى دخى بو كجى نامشروع

حاللره تشبث ایدنلردن نفرت ایلرلر ایسه ایشته اوزمان بوکی  
 یولسزقلره میدان ویرلمز . صنایه کلنجه : صنایع احتیاجات  
 مبرمی ازاله ایچون متین و صاغلام لوازماتک اعمال و میدان تداوله  
 قونلایدیر . احتیاج مبرمدن اولیان برطاقم سوس ، زینت  
 ایچون یاپیله جق شیلر ایکنجی و صوکنجی درجه ده قالیر .  
 دمیر معدنلری ایشاته رک اونلردن درلو درلو آلات وادوات  
 یایمق ، زراعت آلتلری و شمندوفرلر اعمال صابون فابریقلری  
 آچق ، اجزای طیه نك کافه سنی مملکت تمزده اعماله چالشمق  
 نه بیوک موفقیتدر . صنایعه دخی دقت ایدیله جک مهم برنقطه  
 وار ایسه اوده یاپیله جک شیلری قطعاً تقاید ایتیوب یعنی ایچنه  
 حیله قاتمیوب ممکن اولدینی قدر متین و ظریف اولمسنه دقت  
 ایتمکدر . چونکه بر صنعتله حیله و دیسه کیرر ایسه اوندن هیچ  
 بر خیر کلز ، او صنعت پک موقتدر بر مدت صوکره هر کس  
 اونک چور وک و حیله لی اولدیفی آکلار ، اعتبار ورواجدن  
 دوشر ، اونک ایچون دوغرولغه یتر اولمز . بونک مکافاتن دخی  
 هر جهندن کوریلور . زراعت کلنجه : بو اک طیبی واک حلال  
 برنوع صنعت و تجارتدر . زراعت یالکز اکین اکمکدن عبارت  
 اولیوب عین زمان حیوان یتشدیرمک ، چفتلک صاحبی اولق  
 دخی زراعتندیر . زراعت معنای عمومیسى اعتباریله طبیعتدن  
 استفاده ایتمکدر . طبیعتدن استفاده ایسه بوغدايى اکمک ،  
 آغاجی دیکمک ، حیوانلری اورتمکله اولور . بوندن ده ابسیط

دها اي بر تجارت اوله بيليرمي ؟ انسان بر اينك آلسه كله جك  
 سنه ابكي دانه اولور . بتون يازسودندن ، ياغندن استفاده ايدر .  
 برقيودن ، بر طاووق دخی بويله در . عين زمانده انسان بونلرله  
 كوزل بر وقت كچير . ايلك بهارده يشيل چمنلر اوزرنده او  
 ميني ميني قوزولركشن وشاطر بر صورتده قوشوب صچرادقلىرى  
 سبر ايتك اونلرى در آغوش ايدوب اوخشامق دويولور عمر ميدر ؟  
 تأسف اولزه جق بر نقطه وار ايسه اوده شمدى يه قدر بزده زراعتك  
 تكميل شعباتك حال ابتدائيدى قالمسيدر . آمر يقاده ، آوروپاده  
 بيك درلو زراعت ماكنه لرى بايلدى صپان ايله بر آيد كوريله جك بر  
 ايش بو ماكنه لرك سرعت و متاتى سايه سنده بر ساعتده كوريله بيلور .  
 او كوزلرك او بطى حر كترلر ينه تحمل ايتمكدن ايسه اونلرك يرينه آت  
 قوشمق دها مناسبدر . مع التأسف مملكتمزده نه او ماكنه لر  
 نه ده آت قوشمه سى تعمم ايتمه مشدر . بونلر ايسه هپ فقر القدن  
 زياده جهالتدن ايلرى كلير ، چونكه بر كويده اك آزندن يوز  
 خانه اولسه بو يوزخانه اشتراك ايدوبده بر لريرا ويرسه لر تكميل  
 زراعت ماكنه لرى كيتير تديره بيليرلر ، واونلرله نوبته هر كسك  
 تارلا سنى سوررلر ، واصل اوله جق فضله محصولاتدن هر سنه  
 بر روي ايكيشر ليرا دها طويله لره بر قاج سنه ظرفنده هبى  
 زراعت ماكنه لرينه مالك اولدينى كې نروتلرى ده طاشار  
 دو كولور . حالبوكه اهاليز اول امرده زراعت ماكنه لرينك  
 اسمنى بيله ايشتمه مش نانبا بويله بر اتحاد واشترك ايله هيچ

برایش یابم مشایشه نرسندن ناصل باشلايه جغنی برامیور. آرزو وار ، اما جسارت یوق . معارف اولمی هپسنگ ذهنه هرشیی اییجه یاتیرملی که اونلرده تشبثلرنده جسارتده بولنسونلر . عین زمانده اهلیمز حیوانلری ناصل یتشدیرملی باغلری آغاجلری نصل دیکملی ، بو خصوصه دائرده بر چوق درسار اوکرنلی کتابلر او قومایدیر . بونلر ایسه آنجق معارفله اولور .

ایشته تجارت ، صنایع ، وزراعت سایه سنده بر ملتک هر فردینک قوه ماله سی تحت تأمینہ آلتیرسه طیبی اونلرک بو تروتلری نسبتده حکومته ویرکی ویرجکلرندن حکومتک صندوغنده ده چوق پاره بریکیر . حکومتده اوپاردلرله مملکت داخلنده اجراآت یاپار . اهالی فقیر اولورسه صندوغه هیچ پاره کلز ، حکومتده اجراآت یایمق شویله طورسون مأمورلرک معاشنی بیله ویره من . هیچده برایش کوريله من . اکلاشیلیورکه بر ملتک سعادتک اساسی ینه او ملتک هر بر فردینک آلتک ترنده ، سعینک ثمره سنده در .

دولتک قوه ماله سنه کانهجه : اوده ملتک قوه ماله سندن تأدیه ایتدیکی ویرکیلردن عبارتدر . بو ویرکیلر پارلمنتوده تدقیق ومذاکره ایدلکدکنصکره تخصیاته ارانده سینه تعاق ایدر وبو صورتله هر مملکت کندی حسابنه دوشنی کندی اهایسنه تقسیم وتوزیع ایدرک خصوصی تحصیلدارلر واسطه سیله طوپلازیر ، کویولوردن ، اهایلیدن طوپلانان بو پاره نرتی ، بو ویرکیلر مال

صندوقلرنده بيريكير. صوكره بوباره لرى حكومت آلهرق مأمورلره آيلىق ويرر ، عسكرلره ، دونمايه ، معارفه الحاصل بر چوق خصوصاته صرف ايدر. بوندن بر مقدار پاره آرتارسه اونى ده ملتك خزينه سنده بيريكديرلر . شايد ايلريده بر محاربه اولورسه ، بردن بره عسكر طوبلانيرسه چوق فائضله بورج ايتيوب اونى ده اوكا صرف ايدرلر . خلاصه ويركيلر بر ملتك حيات اجتماعيه سنده يك مؤثر بر وظيفه ايفا ايدر . هر ملت كندى ثروتى ، سعي نسبتنده حكومته ويركى ويرر .

ويركولر . — ويركو احتياج و منافع عموميه صرف ايدلك اوزره هر سنه اهالي دن هر برينك حصه سنه اصابت ايدن معين بر مبلغدن عبارتدر . ويركينك مقدارى هر سنه مجلس عمومى طرفندن تعيين اولنور . بوسنه ايچون تعيين اولنان ويركى كله جك سنه تحصيل اولنور . مجلس عمومينك مساعده سى اولمق سزىن اصلا هيچ برويركو تحصيل ايديله مز .

ايكى نوع ويركو وارددر . بريسى بلا واسطه ديكرى ده بالواسطه ويركودر . بلا واسطه ويركو هر كسك ، مقابلنده حكومتدن هيچ برشى طلب ايتمك سزىن ، ويرمكه مجبور اولد ينى مبالغه دركه بوده : املاك تتمتع واعشار ويركيلرندن عبارتدر . بو ويركيلرى تحصيلدارلر اهالي دن طوبلايه رق مال صندوقلرينه ياتيرر .

بالواسطه ويركى دغى دغريدن دغريده اهالي دن آلنر .

بو نوع ویرکوب بر طاقم تجارت مقابله شرکتلردن آئیر .  
بونکده باشلیجهلری : استهلاکات ویرکیلری ، انحصار ، پول  
کمرک وسائرهدن عبارتدر .

املاک ویرکیسی : خانه ، ترلا ، باغ ، چفتلک کبی ملکدن  
آلان ویرکیلردر . بو ویرکیلرده املاک قیمتی نه ایسه اوکا  
کوره هیئت قانونیه طرفدن تنسیب اولانان بر مقدار معین  
تحصیل اولنور .

تمتع ویرکوسی : عسکر ، مأمور وجیفتجیلردن ماء-دا  
تجارتله مشغول اولان کیمسهلردن آلان برویرکودر . بر مجلس  
معرفیه بر کیمسه نك سنده قاج غروش قزانه بیلدیکی حساب  
وتخمین ایدیلرک اونک یوزده بر مقداری آئیر . اکر فضله  
یازلمش اولورسه استدعایدرک محله نك امام ومختاری دخی تصدیق  
ایدیلرک اونک تمتع ویرکوسنی ازالدیرلر وهرسنه یکیدن ویرکی  
اداره خانه لرنده معامله یاییله رق هرکسک سنوی تمتع ویرکوسی  
تعیین ایدیلر .

اعشار ویرکوسی : هرسنه حصزه کلن محصولاتک اونده  
برینک حکومته تسلیم ایدلمسیدر . بعضاً کویلرک سنوی اعشار  
ویرکولری بعض تجارلره صاتیلور او حالده هرکویک اعشاری  
طبیعی بوتجاره تسلیم ایدیلر . اکر بوماترملر کویلولردن فضله  
آلبرلرسه کویلولر اونک حقهده منسوب اولدقلری حکومته  
شکایتیه واعشارلرینک حکومت معرفتیه آلملرینی طابه حققلری

وارد ر . باغله بوستانله دخى سنوى ويريلن ويريدن باشقه  
محصولارينه محسوب اولمق اوزره برويركى دها يازارلر كه بوكاده  
رسم ويا تركجه دهه زير ، تمبر اولنور . الك زياده ملتزم لر كويولور  
بوراده الداتيرلر .

بعض سنه لرده بعض محلكه احتياجى فضله اولديقتن  
ويركى يه بر مقدار مناسبك ضمى مجلس عموميه مناسب كوريلور  
ايشته بوكا رسم منضم ويا ضم ويركى ديرلر . مثلاً معارف و تجهيزات  
عسكريه ضم ويركيلرى كجي .

استهلاكات ويركولرى : على العموم ايچكيلر ، طوز ،  
شكر ، قهوه . سائر دن آلمان ويركيلدر .

قيد و انسجيل ويركىسى : بر ملك صاتون آلدقده ويا خود  
برورائت وقوعه كلديكند حكومه ويريلن خرجدن عبارتدر .  
پول : بعض كاغدلر اوزرينه حكومت نامه اوله رق بر  
داغنه باصيله رق موقع فروخته چيتاريلور كه بونلره پول دينور .  
بو پوللر استدعالرده ، آلايش و يرش مقاوله لرند ، على العموم  
سندلرده ، مكتوبلرده و تجارت ايشلرند قوللانيلور . پول  
استعمال ايدلمسى لازم كلن بر محله قوللانمىسه اوندن جزاى  
تقدى آتير .

انحصار : بر شينك اعمال و فروختى امتيازىنك بر شركت  
ويا شخصه و يرلسيدر . او شركت ويا شخص دخى بوكا مقابل  
سنوى حكومه مقاولهسى وجبنهجه بر خيلى باره و يرر . اكثر

مملکتلرده کبریت ، باروت ، اویون کاغذلری ، پوست و تفراف بیله انحصار ایله اداره اولدور .

دخولیه ویا آیاق باصدی پاره سی : بر شهردن دیگر شهره کیدن اولور ایسه کیدیان شهرده دخولیه پاره سی آلیرلر . بوده اشخاص باشنه بوقاچ غروشدن عبارتدر .

کمرک : اجنبی مملکتلرندن مملکتتمزه ادخال اولنان اشیادن آئنان پاره در . شیم دیلک بز یوزده اون بش قدر کمرک آلیورز کمرک آلمه نك فائده سی بك چوقدر . بر کره کمرک حکومتیه مهم بر واردات تشکیل ایدر . بوندن باشقه مملکتتمز داخاندکی تجارت ، صنایع و زراعتی اجنبی مملکتلرینه قارشى حمایه ایدر . اکر کمرک چوق آلیرسه باشقه مملکتلردن مملکتتمزه اشیا سو-قه مزلر . بوسایه ده مملکتتمز داخاندکی یاییلمش شیلر سورولور ، رواج بولور ؛ بوسایه ده ترقی مملکت تأمین ایدیلیر و مملکتتمز داخاندن خارجه اخراجات دخی وقوعه کلیر . روسیه خارجدن کندی مملکتتمه کیرن اشیادن یوزده سکسان کمرک آلیر . داخلدن چیقانلردن ایسه طبیعی هیچ آلمز . ایشته بوسایه ده روسیه ده کمرک یوزده سکسان آلمسنددر که روسیه نك تجارتی چوق ایلری کیتمشدر . او حالده بز نیچون کمرکی فضله آلیورز ؟ ایستدیکمز کبی کمرک آلق بزم المزده دکلدر . دیگر حکومتلره معاهده و مقاوله لرمن واردر . اکر بزده چالیشیر و ترقی ایدرده دیگر حکومتلره قارشى سوزمنی دکلته بیلیرسه ک اوزمان



کمر کی ده ایستدیکمز قدر آله بیلیرز . خلاصه مما یکتتمزک ترقی و تعالیسی ایچون یکانه بر چاره اولان ویرکوی اهالی وقت وزمانیله ومنتظماً ویرماید .

### خلاصه

- ۱ — قوه مالیه نهیه دیرلر ؟  
قوه مالیه ملنک ثروت عمومیه سیله او ثروت عمومیه دن ویرکی نامیله حکومت ویرلن تکالیفک حصوله کتیردیکی ثروته قوه مالیه دینیلور .
- ۲ — قوه مالیه قاج قسمدر ؟  
قوه مالیه ایکی قسمدر [ : بریسی ملنک دیکری دولنک قوه مالیه سیدر .
- ۳ — ملنک قوه مالیه سی نه در ؟  
ملنک قوه مالیه سی هر فردک بالذات کندی مالی اوله رق مالک اولدینی ثرویدر .
- ۴ — ملنک قوه مالیه سی نه ایله تحت تأمیننه آلینیر ؟  
ملنک قوه مالیه سی معارف ، تجارت ، صنایع و زراعتله تحت تأمیننه آلینیر .
- ۵ — معارف نهیه دیرلر ؟  
معارف او قویوب یازمق و برحق کتابلر ، غزنه لر مطالعه ایدرک ، تنویر ذهن ایتک و بو صورته تربیه فکریه یی بحق اکتساب ایلکدر .
- ۶ — تجارت نهیه دیرلر ؟  
تجارت مملکتتمز داخلنده بولنان برحق اشیای اجنبی مملکتلرینه اخراج ایتک و اجنبی مملکتلرنده اولوبده مملکتتمزک احتیاج مس ایتدیکی شیلری دخی کندی مملکتتمزه جلب ایتکدر . فقط مملکتتمزک تأمین سعادت ایده بیلرسی ایچون دائماً اجنبی مملکتلرنده کی پاره یی مملکتتمزه جلب ایتکی اونوتمه ماید .

۷ — بر مملکتده مهم تجارتلر \* یاپه بیلیمک ایچون شرکترلر تأسیس ایتملیدر .

۸ — شرکت نه یه دیرلر ؟  
شرکت بر ویا بر قاچ کشینک کرک بدنا کرک ثروتا یاپه میه ججقلری بر ایشی بیکلرجه اشخاصک اتحاد واشتراکیله یاپیلمسینه ویاخود بر ایش خصوصنده ایکی ویا دها زیاده اشخاصک کرک بدنا کرک فکرأ وکرک مالاً برلشمسینه شرکت دیکتور .

۹ — شرکتی کیم اداره ایدر ؟  
شرکتی تأسیس ایدنلر ویاخود شرکته داخل اولاندن بر قسمی شرکت هیئت طرفندن انتخاب اولنه رق شرکتی اداره ایدر .  
۱۰ — تجارتده کوزهدیله جک مهم نقطه نه لردر ؟

تجارتده کوزهدیله جک اک مهم نقطه پاره یی بالذات ملتنن چکمیبوب اجنبی مملکتلرندن چکمک و مملکتنمز داخلنده هر درلو شرکترلری بالذات یایق ویا یغنه چالیشمقدر .

۱۱ — مشتریلرینی آلداتان واکا قارشى لازم کلن حرمتده قصور ایدن بر تاجر نه اولور ؟  
مشتریلرینی آلداتان واکا قارشى لازم کلن حرمتده قصور ایدن بر تاجر پک چابق باتار .

۱۲ — تجارتده موفقیتنه نائل اوله بیلیمک ایچون نه یایق لازمدر ؟  
تجارتده موفقیتنه نائل اوله بیلیمک ایچون هر کسک امنیت و توجهنی قزائمی دخی هرکسه حرمت ورعايتده بولنمی واک زیاده حيله و دسیسه جهته صاعیبوب استقامت، حقانیت و عدالتدن اصلا و قطعاً ایرلامقله اولور .  
۱۳ — صنایع نه یه دیرلر ؟

مملکتک وعموم بشریتک احتیاج مبرمی اولان برچوق شیلری اعمال ایتمکدن عبارتدر .

۱۴ — صنایعده دقت ایدیله جک نقطه نه در ؟  
صنایعده دقت ایدیله جک نقطه یاپیلن شیلرک ایچنه قطعاً حيله قائماقدر .  
۱۵ — زراعت نه یه دیرلر ؟

زراعت اکوب بچمک ، باغ ، آفاج یشدیرمک ، حیوان تورہ تمک  
کې صرف طبیی شیلرله طبیعتدن استفاده ایتمکدر .

۱۶ — دولتک قوۋ مالیه سی نه دن عبارتدر ؟

دولتک قوۋ مالیه سی ملتک تأدیہ ابتدیکی ویرکیلردن عبارتدر .

۱۷ — ویرکی نه یه دیرلر ؟

احتیاج و منافع عمومی یه صرف ایدمک اوزره هر سنه اهایلدن هر  
برینک حصه سنه اصابت ایدن بر مقدار مبلغدن عبارتدر .

۱۸ — ویرکی کیملک طرفندن تعیین اولنور ؟

ویرکی مجلس عمومی یعنی پارلمنتو طرفندن تعیین اولنور .

۱۹ — قاچ نوع ویرکو واردر ؟

ایکی نوع ویرکو واردر . بریسی بلا واسطه دیکری دخی بالواسطه ویرکودر .

۲۰ — بلا واسطه ویرکو نه یه دیرلر ؟

هر کسک ، مقابلنده حکومتدن هیچ برشی طلب ایتمکسزین ویرمکه  
مجبور اولدینی مبلغدر که بوده املاک ، تمتع واعشار ویرکولردن عبارتدر .

۲۱ — بالواسطه ویرکو نه یه دیرلر ؟

بالواسطه ویرکو دوغروندن دوغرویه اهایلدن آلتیوب بر طاقم  
امتیازات و یا تجارت مقابلنده بعضی شرکتلردن آلتیر . انحصار ، پول ،  
کمرک وسائرہ کبی .

۲۲ — املاک ، تمتع واعشار ویرکیلری نه یه دیرلر ؟

اولردن آلتان املاک ، قزانچدن آلتان تمتع ، محصولاتدن آلتانه

اعشار ویرکوسی دینور .

۲۳ — پول نه یه دیرلر ؟

حکومت نامنه اوله رق اوزرلرینه برر دامغه اوریلوب موقع فروخته

چیقاریلن کاغدلره پول دینور .

۲۴ — کمرک نه یه دیرلر ؟

اجنبی مملکتلردن مملکت مزه ادخال اولنان اشیا دن آلتان پاره یه

کمرک دینور .



## اون دردنجی بحث

### قوة عسکریه

قوة عسکریه اک مقدس بر قوة ملیه در . عسکرلر حریت و وطنک حافظ و نکه بان حقیقیدیدر . عسکرلر ملتک اک کنج و دینج اولادلرندن عبارتدر . بونلر ، سنه لرحه تعلیم و وظائف عسکریه ده بولنه رقیتشیرلر . لزومندن فضله بر آتش طوقونجه بار . لیان بر باروت کبی ، در حال بوسکورورلر و دشمنی تپهلرلر . عسکرلرمن یالکیز محاربه وقوعنده دشمنانه محاربه ایتک ایچون حاضر اولیبوب عین زمانده حریت و قانون اساسی بی دخی محافظه ایچون بوتون عسکرلرمن عین ایتش اولدقلرندن شاید کرک پادشاه و کرک حکومت کرک اهالی کرک باشقه بریسی طرفندن ملتک حقوقه بر تعرض وقوع بولورسه عسکرلرمن اونلری تأدیه و وظیفه دار اولدقلری کبی حرکت و قانون اساسی بی مدافعه ایچونده حیاتلریخی ویره جکلردر . بو عیننده عسکرله برابر بوتون ماتمزده داخلدر . عسکرلک ایکی صنفه آیریلیر : برینه قره عسکرلری ، دیکرینه ده دکنز عسکرلری دینور . قره عسکرلری حدود بویلرنده ، قشله لرده ، اردولرنده بولنور

دشمنله محاربه وقوعه كلديكي زمان قره محاربه سنى ياپارلر . بو  
 عسكەرلر ك دخى پياده سواري ، طويچي ، مزراقلي ، آوجي  
 كبي برچوق نوعلى واردر . دكز عسكەرلى ايسه كميلرده ،  
 زرهايلرده ، بوغاز ليمان و ايشلك ساحلرده بولتورلر . بونلر  
 دخى على العموم دكزلى ، ساحللى ، بوغازلى محافظه  
 ايتدكارى كبي حين حاجتده محاربه وقوعه كلديكي زمان دكز  
 محاربه سنى ياپارلر .

قره عسكەرلى حربيه نظارتنه ، دكز عسكەرلى ايسه  
 بحريه نظارتنه تابعدر .

حربيه نظارتى على العموم اردولرله قره عسكەرلىنه وامور  
 عسكريه نظارت ايدر . بحريه نظارتى ايسه على العموم حرب  
 سفينه ليله بحريه عسكەرلىنه ، بوغاز ساحللك محافظه سنه باقار .  
 قره عسكەرلى يدي اردويه تقسيم اولمشدر .

عسكەرلر ك وظيفه سى وطنى ، ماتى اجنييلر ك تعرض و تهاجمندن  
 محافظه ايتك و حين حاجتده محاربه ايلكدر . عسكەرلر وطنك  
 اك اصيل ، اك نجيب اولادليدر . عسكەرلر ملتك قوللرى ،  
 قداقليدر . عسكركل بك مقدسدر ، چونكه عسكەرلر ك وظيفه لرى  
 بك مهم و بك مشكلدر . كيجه لرى بزراحت راحت اوپوركن  
 او آرسلان عسكەرلر منى اللرنده تفنكلر ، سوناكولر اولدينى  
 حالده حدود بوينده نوبت بكلركن ، دشمنله بر محاربه وقوعه  
 كليرسه هپسى وطنك سلامتى ايچون حياتلرندن واز كچرلر .

دشمن باشلىرىنىڭ ئاتىش ياغدۇرىدىغىنى خالدا يەنە اونلار ذرە قدر قورقۇنۇلۇپ . اوشانلى ھىتلى عسكىرلەر ، او ار اوغلى ارلر وطنك تويى بىمىدك مېنى مېنى ياوورلرغىنى ، بېلى بو كولمىش اق صاچلى اختيارلرغىنى ، پاك عفيف مخدراتى مېرھتسىز ، جاناوار دشمنك آياقلىرى آلاندىدە ازدير مەمك ايچون دشمنى وطنمىزە باصدير مۇزلر . چوقۇنلار ابي بېلىككەزكە ۱۰ تىموز سەنە ۳۲۴ دە وفى ۱۰ نىسان سەنە ۳۲۵ تارىخچىلارندە قازاندىغىمىز حرىت ومىشروطىت اتحاد ترقى جەمىيەتكە بېنىلە ، عسكىرلەر مەزك سونكولرلە ، ماتەزك اتحاد ومقاومىلە آلەمىدەر . اكر شو حقوقيلى اوسوكىلى عسكىر قارداشلارمىز بېلۇبدە مدافە ايتەمىش اولسەلر ايدى ، او اسكىدن اولدىغى كېي بېلىمىەركىنە مستبدلرگە طرفى اتزام ايتسەلرايدى ، بىز قىيامتە قدر حرىتمىزە نائل اولەمازدق . ايشەتە عسكىرلەر مۇز قىيىنچىلرغىنى سونكولرغىنى ، تەفەككۇرغىنى ھەزەمان دشمنە قارشى دكل بەعضادە مەمەكەت داخاندە توردەن سىنىقى دشمنلەرە قارشى جويۇرلر . الحاصل بابالرىنك ، اولادلىرىنك ، ھەمبەيرەلرىنك حقوقي كېمەسەيە قاپدیر مۇزلر اونلرغى آياق آلاندىدە ازدير مۇزلر . بونلر نە قدر شايان تەقدیس آدملىردر . یشاسون سوكىلى عسكىر قارداشلارمىز .

اردو . — محاربە زمانىدە عسكىرلرغى بىردىنبىر جەم ایتەك وھال صلحەدە ادارەلرغى تەسۋىل ایلەمك ايچون قواى عسكىرىيە برطساقم بويۇك شەبەلەرە آيرىلۇر كە بونلەرە اردو دىنىسور . بىزم

عموم قواي عسكريه مز يدي اردويه تقسيم اولنمشدر . اولنردۀ:  
 ( ۱ ) استانبول ( ۲ ) ادرنه ( ۳ ) مناستر ( ۴ ) ارضروم  
 ( ۵ ) شام ( ۶ ) بغداد ( ۷ ) يمندر . بو اردولرك هپسى بر  
 مشير طرفندن اداره اولنور بو اردولرك مرجى حربيه نظارتيدر .  
 هانكى طرفده بر اغتشاش ظهوره كليرسه او طرفده كي اردولره  
 امر ويريلور در حال عسكر سلاح آلتنه آلينجيه قدر اولجه  
 سلاح آلتنده بولنان احتياط طابورلرى سوق ايديلير و آرقلر-  
 نندن ده طوبلانان عسكرلر كوندريلير . اكر براردو داخلنده كي  
 عسكرلر بو وقوعاتك اوكنى آله مازلر ايسه او زمان ديكر  
 اردولردن ده عسكر كوندريلير ايسته بو اردولر سايه سنده هم  
 سوقيات عسكريه قولايلاشير هم ده وطنك هر طرفنده جسيم برر  
 قوت هر زمان موجود بولنديريلور .

مدت عسكريه . — قانونك استننا ايتديكي بعض كي مسهلردن  
 ماعدا ۲۰ ياشندن ۴۰ ياشنه قدر هر كس عسكر اولمغه مجبوردر .  
 فقط بونك هپسى سلاح آلتندن كچمز . بو اوج درت درلو  
 خدمتله مكلف بولنور . برنجى دوره يه قرعه ، ايكنجى يه احتياط ،  
 اوچنجى يه رديف ، دردنچى يه ده مستحفظ تمير اولنور .  
 قرعه نفرى : — يكرمى ياشنه كان بر كي مسه عسكره آتير اوج  
 سنه مدتله هر هانكى طرفه كوندريليرسه اوراده خدمت عسكريه سنى  
 ايفا ايدر . مدت بيتنجه اوده مملكتته عودت ايدر .  
 احتياط : — احتياط مدتى آلى سنه در . فقط هر زمان

سلاح آتنده كچميوپ لزومنده طوپلانيير .

رديف . — طقوزسنده رديفلك وظيفه يي واردر . فقط بو مدت ظرفنده بوتون وقتي قشله ده كچيرميوب كنده ايشيله مشغول اولور . اكر محاربه اولور وياساخر خصوصاتده عسكركه لزوم كوريلورسه بو طقوز سنده هنوز بتمه مش اولورسه اوزمان رديفلر طوپلانيير ديمككه بورديفللك حال استراحتده كچيور اكر لزوم كوريلورسه كيد يايور .

مستخفظ . — رديفلكدن صوكرمايكي سنده مستخفظلك كليير . بوده حال استراحتده كچر . اكر بر محاربه اولورده رديفلر طوپلانييري حالده ينه عسكركه لزوم كوريلورسه اوزمان مستخفظلرده طوپلانيير . فقط بوسه فلر نادر اوله رق طوپلانيير . مكاتب عاليه طابله لريله امتحان ويره بيان بيوك مدرسلر عسكرلكدن معافدر . چونكه اونلارده وطنه آريجه برخدمت ايدييورلر .

شمدي بر آزده آروپانك عسكرلكي حقنده كي مسلكيني كوزدن كچيرم . بو كيديشله آروپاده بين الدول برصاح عمومي عقدي امكانك خارجنده در . چونكه بو كون تكميل اوروبا دولتلى سلاح آتنده اوقدر عسكر بولنديريورلر كه بونلرك مجموعي آتي ميلوني تجاوز ايدييور . بوايه آروپاده حكومتلر آرمه سنده امنيتك اولمديفني كوسترر . آروپاده اك چوق عسكر چيقاران وعسكرلكجه اك زياده ايلري كيدن آلمانبا ،



فرانسه و روسيه در . اولردن سوكره بز كليرز . آلمانيا نك ( ۵۶ ) ميايون نفوسى اولوب صالح حائنده آلتى يوز بيك ، محاربه حائنده ايسه ( ۳ ) ميايون عسكر سلاح آلتنده بولنده . برينور . فرانسه نك ايسه ( ۴۰ ) ميايون قدر نفوسى اولوب صالح و محاربه حائنده همان آلمانيا يه معادل عسكر چيقاره بيلور . فرانسه ۵۹ كشيده بر ؛ آلمانيا ايسه ۸۹ كشيده بر عسكر آليور . فقط فرانسز عسكر لر ينك چوغى بياغى خسته لقدن تلف اوليور . آلمانلر ايسه آنچق قوى البنيه و هر درلوا مراضدن آزاده كيمسه لرى عسكره آلدقلى ايچون او قدر خسته لقدن تلفات و ير ميورلر . روسيه يه كانجه مجموع سكه نه سى ( ۱۳۰ ) ميلون اولوب حال صلحده بر ميايون حال حربده ايسه درت بچق ميايون عسكر چيقاره بيلور .

ژاپونيا دخى حال صلح و حال حربده آوروپا دولتر ينه معادل عسكر چيقار مقدمه ايسه ده آمريقاليلر اك آز عسكر چيقار مقدمه درلر .

انكلز عسكرى معاشلى اولوب معاشلى دخى بك فضلده در و بو معاش كيتد كجه آرتار و مجموع عسكرى حال صلحده ( ۱۲۰ ) بيك قدر در برانكلز نفرى - نه ده ( ۱۵۰ ) ليرايه ، بر فرانسز ويا بر آلمان نفرى ايسه همان بونك نصفه و نصفندن ده اآز بر پاره يه مال اولور .

اسويچره حكومتى حال صلحده همان هيچ عسكر بسله من

اون بيكه قريب ضابطانندن باشقه عسكرى يوقى كيدر .  
خلاصه آوروپا حكومتلرينك همان كافه سنده عسكرك  
مجبورى اولوب وقت صاحده بيله پك چوق عسكر سلاح  
آلتنده بولندير لر و بوضورتله آوروپانك تكميل وارداتنك  
يوزده ۲۵ دن ۴۰ قدرينى اونلره صرف ايدر لر .

### خلاصه

- ۱ — قوة عسكريه نه يه دير لر ؟  
قوة عسكريه داخلي وخارجى بالجمله دشمنلرى تأديب ايلين واونلرك  
تعرض وتجاوزلرينه مانع اولان بر قوتدر .
- ۲ — عسكركلرمن هانكى وظيفه لرله مكلفدر ؟  
عسكركلرمن هم وطنى وهمده قانون اساسى ي محافظه ايتمكله مكلفدر .
- ۳ — قاچ نوع عسكركلرمن وارددر ؟  
ايكى نوع عسكركلرمن وارددر . بريسى قره ديكرى دكز عسكريددر .
- ۴ — قره عسكركلرى نه ياپار لر ؟  
قره عسكرى حدودلرده بكلر ، قشله لرده تعليم ايدر محاربه وقوعه  
كلديكنده قره ده محاربه سنى ياپار .
- ۵ — دكز عسكركلرى نه ياپار ؟  
دكز عسكركلرى زرهلى تعبير اولنان بيوك كيلرده بولنور ساحللىرى  
محافظه ايتمكله برابر دكز محاربه سنى ياپار .
- ۶ — اردو نه يه دير لر ؟  
اداره عسكريه يى تسهيل ايچون عموم قواى عسكريه نك تقسيم  
اولديني بيوك شعبه لرله اردو دينور .
- ۷ — قاچ اردو من وارددر ؟  
يدى اردو من وارددر . اونلرده صره سيله استانبول ، ادرنه ،  
مناستر ، اضرورم ، شام ، بغداد ويغندر .

۸ — مدت عسکریه قاچ سنه در ؟

مدت عسکریه یکرمی سنه اولوب دوت صنف اوزرینه تفسیم اولمشدور . برنجیسنه قرعه ، ایکنجیسنه احتیاط ، اوچنجیسنه ردیف درونجیسنه مستحفظ دینیر .

۹ — تکمیل آوروپا حکومتاری وقت صلحده نه قدر عسکر بلیورلر ؟

تکمیل آوروپا حکومتاری وقت صلحده آلتی میلیوندن فضله عسکر بلیورلر ؟ .

۱۰ — آلمانیا ، فرانسه ، روسیه وقت صلح وحریده نه قدر عسکر چیقاره ییلور .

آلمانیا وقت صلحده (۶۰۰) بیک وقت حریده (۳) میلیون فرانسهده طبق بونک کبی روسیه ایسه صلحده بر میلیون حریده ایسه دوت ییحق میلیون عسکر چیقاریور انکلیر عسکرلری معاشلی اولوب جموعی حال صلحده (۱۲۰) بیکه بالغ اولیور وهر نفر سنوی حکومته (۱۵۰) لبرایه مال اولیور .

۱۱ — آوروپا حکومتاری بوبسلدکلری عسکرلره وارداتلرینک یوزده قاچنی صرف ایدیورلر ؟

آوروپا حکومتاری بوبسلدکلری عسکرلره سنوی وارداتلرینک یوزده ۲۵ : ۴۰ قدرینی صرف ایدیورلر . نه قدر فضولی بر مصرف ! ملکتنک اعمارینه ، معارفک ترقیسنه ، سفیللرک تأمین معیشتلرینه صرف ایدلسه !! ...





## اون بشنجی بحث

### قوه انضباطیه

قوه انضباطیه انتظام و آسایش داخلی محافظه ایدن بر  
قوتدر . انتظام و آسایش داخلی یونده اولمزه، هیچ برایش  
کوریه مز . جوار دشمنلر نه قدر تجاوز ایدرلر سه ایتسونلر  
بردواتی اوقدر زبون دوشورده مزلر، فقط اک اوفق براغتاشاش  
داخلی وطنی یک چوق تهلیکله لره القا ایدر . بردولتک انتظام  
و آسایشی یونده اولدقجه جوار دشمنلره مقابله ایدیلر ، فقط  
داخلی بوزوق ومختل اولدقجه هیچ بر زمان دوغرو حرکت  
ایده مز . انتظام و آسایش داخلی تأمین ایده جک بولیسلرله  
ژاندارمه یعنی ضبطیه لردر . بر بولیسک بر ضبطیه نك وظیفه سی یک  
بیوک و یک ناز کدر . بونلرک وظیفه سی یالکمز النده تفنک ویا  
قلیجله نوبت بکلمه مکدن عبارت دکلددر . صر مسنه کوره بر جانی بی  
بولوب چیقار مق ، بر سارقی بیك درلو قور نازلقله یاقالامق ،  
بر حقلی بی بر حقسزدن تفریق ایتک هب بونلرک وظیفه سیدر .  
کرک بولیسلر و کرک ژاندارمه لر امنیت عمومیه مدیر لکنه  
مربوط اوله رقی اداره اولنورلر .

پوليسلر من ، ژاندارمه لر من حقوق و وظيفه شناس نزاكت مجسمه برر شخص اولمايدرلر . اك بيوك دعوالر زور ايله دكل اييلىكه كوريلور . متواضع ، تربيه لى ، خاطر شناس كيمسه لر هر كس طرفندن سويابر . كرچه عمومك اطاعتى شخصه دكل قانونه ايسه ده شخصك ده هيچ اهميتى يوق دكلدر . بر طاقم برباد ، رزيل كيمسه لر واردركه هيچ يوق يره هر كسى قانونه قارشى عصيانه سبيت و يرديرلر . خلاصه اداره عموميه ده شخصك بيوك همده بك بيوك دخلى واردر . قوانينك ماكنه كجى اجرا و تطبيق ايدلمسندن هيچ برنتيجه چيتماز . اوليرركه انتظام عمومى محافظه ايدلىكه برابر مطلوب اولان ترقى و حریت عمرميه ممكن اولسون .

### خلاصه

- ۱ — قوه انضباطيه نه يه ديرلر؟
- قوه انضباطيه انتظام و آسایش داخلينى محافظه ايدن ر قوتدر .
- ۲ — قوه انضباطيه يى تأمين ايدن كيملردر ؟
- قوه انضباطيه يى پوليس و ژاندارمه لر تأمين ايدر .
- ۳ — پوليس ايله ژاندارمه لر ناصل اولمليدر ؟
- پوليس ايله ژاندارمه لر حقوق و وظيفه شناس ، نازك ، تربيه لى و جدى اولمليدرلر .
- ۴ — قوه انضباطيه هانكي نظارت طرفندن اداره اولنور ؟
- قوه انضباطيه ضبطيه نظارتى طرفندن اداره اولنور .
- ۵ — بچون آيرى آيرى پوليس و ژاندارمه يه لزوم كورلمشدر ؟

چونكه پوليسلر اهالى يى قانون نامنه اطاعته دعوت ايدرلر، اطاعت  
 ايتديكى تقديرده قوة جبريه يه لزوم كوريلير. حالبوكه پوليسلر اكثريا  
 بوقوة جبريه يه موفق اوله مازلر ، اوزمان بووظيفه يى ضبطيه لره ترك  
 ايدرلر . ضبطيه لر ايسه مسلح برر عسکر اوله قىلرندن حقيله بوقوة  
 جبريه تشكيل ايدرلر .





## اون آلتنجی بحث

### قوة عدليه

قوة عدليه : قانونه اطاعت ايتمنلری و هر کسک حقوقيه تجاوز ايتمنلری قانوناً تأديب و مجازات ايدن ، وراثت و سائر خصوصاتی دخی تدقيق ايلين بر قوتدر . بودخی عدليه نظارتی ناميله بر نظارت طرفدن اداره اوانور . عدليه اموری بر طاقم محکمه لر واسطه سيله کوريلور . بو محکمه لرده قوانين موجوده و موضوعيه کوره اکثریت آرا ايله ويريلن قراره « حکم » تعبير اولنور . هر کس محکمه نك ويرديکی بو حکمه اطاعت ايتمه مجبوردر .

بر کيمسه نك محکمه يه مراجعت ايدم بيلمسی ايچون يکرمی برياشنده اولمسی ، دول قادينلر دخی عين شرائطه تابع اولوب يالکيز زوجلری اولانلرک زوجلرندن دخی مساعده آلمسی شرطدر . بوندن باشقه بر کيمسه حبس جزاسنه ويا علی العاده بر جزايه مستحق اوله بيلمک ايچون ۱۶ ياشنی کچمش اولمايدر . بوسنده ويا بوندن دون برسنده بولان اولورسه يامکتب حبسه خا . نه سنه ويا پدرينک خانه سنه کوندريلير .

محکمه‌لر

على العموم محکمه‌لر بش صنف اوزرينه ترتيب اولميشدر.

۱ — صلح محکمه‌سى ( ناحیه‌لرده )

۲ — بدایت محکمه‌سى ( سنجاق و قضالرده )

۳ — استیناف محکمه‌سى ( ولایتلرده )

۴ — جنایت محکمه‌سى ( ولایتلرده )

۵ — تمیز محکمه‌سى ( پای‌تخته )

۶ — تجارت محکمه‌سى ( هرطرفده )

۷ — عسکری محکمه‌سى ( هرطرفده )

صاح محکمه‌سى . — حکم و نفوذى بر ناحیه داخلنده  
بولنان بالجملة کویلره شامل اولق اوزره هر ناحیه مرکزنده  
بولنور بر محکمه‌در . بو محکمه صاح حاکمی نامیه‌له معروف  
اولان و حکومت طرفندن تعیین اولنان معاشلى بر مأمور ایله  
لزومى قدر فخرى اعضاى محایه‌دن عبارتدر . صلح حاکمک  
وظیفه‌سى اهالىنسک ، کویلورک اوفاق قفک دعوالرى بربرینه  
تربیه ایدرجه‌سنه رؤیت ایتک و مهم دعوالرى دخی مرکز  
قضا ویا مرکز لوايه کوندرمکدر .

بدایت محکمه‌سى . — هر سنجاق مرکزنده بولنور .  
رؤیت اولنه‌جق دعوالرک نوعنه کوره ایکی اوج شعبه‌به آیریلر.  
آله‌جق ویره‌جک کبی برطاقم معاملات حقوقیه‌بی رؤیت ایتک  
اوزره بدایت حقوق محکمه‌سى ویا ساده‌جه حقوق محکمه‌سى ،



ضرب ، جرح ، قتل کبی بر جزایی استلزام ایدن دعوالری  
 کورمک اوزره . بدایت جزا محکمه سی ، ویا ساده جه « جزا  
 محکمه سی ، وراثت ، میراث کبی بر طاقم عائله ایشلرینک  
 قارارلشد بر مق اوزره . بدایت شرعیه محکمه سی ، ویا ساده جه  
 « محکمه شرعیه ، نامیله بر طاقم شعبه لر بولنور . بو شعبه لرک  
 هر بررلری برر رئیس ایله ایکیدن درت ویا آلتی اعضادن  
 عبارت اولوب عمومی دخی یالکیز بر حاکم ریاست و نظارتی  
 آلتده بولنور . اصل هپسنه نظارت ایدن حاکم اکثریتله  
 حقوق محکمه سننده کی دعوالری رؤیت ایدر ولزومنده دیگر  
 شعبه لری دخی تفتیش ایدر . بو بدایت محکمه لرینه عائد اولوق  
 اوزره بر مدعی عمومی معاونی ، بر مستنطق ، بر اجرا ماموری  
 ولزومی قدر کاتبلر بولنور . بدایت محکمه سنک تکمیل اعضالری  
 معاشلیدر . بدایت محکمه لرینک وظیفه سی سنجاق داخلنده کی  
 و سنجاقه مربوط اولان قضالرده کی بالجله عدله ایشلرینی رؤیت  
 ایتک . بر موجب قانون حکم ویرمک ، جنایت ، استئناف  
 وتمیزه عائد اولانلری دخی معاملات لازمه سی ایفا ایتدکدن صکره  
 مرجع لرینه کوندر مکدر . جزا محکمه لری ۷۵ غروشدن یوقاری  
 جزای تقدیدن اعتبار آیش کوندن بش سنه یه قدر حبس جزا سنه  
 حکم ویرر . بوندن ایلری بر جزایه حکم ویرمک لازم کلیرسه  
 جزائی رؤیت ایدوب او حکمک ویرلسنی محکمه جنایتیه  
 کوندرر .

بودايت محكمه لرينك قضايله مخصوص اولمق اوزره اوافق  
بر شعبه سى واردركى سنجاقلارده كى كې ايكى ويا اوج شـمـبهـدن  
عبارت اولمىوب دعوالرك هېسنى كورمك اوزره ياللكز بر شعبه دن  
عبارتدر . بوده ياللكز بر حاكم ريايتى آلتنده انعقاد ايدر .  
بو محكمه لر اوج آيدن اوج سـنـهـيه قدر حبس جزا سـنـه محكوم  
اولان دعوالره حكم ويروب بوندن يوقارى دـعـوالرى ايسـه  
مرکز لواده كى بدايت محكمه لرينه ارسال ايدر .

جنايت محكمه سى . — هر ولايتده برر جنايت محكمه سى  
بولنوب او ولايتك دائره سى داخاندە وقوعه كلن بالجملة جنايت  
ايشلرينى رؤيت ومحاكمه ايدر . جنايت ، مدهش جرح وضربه  
برابر سرقت كې بش سـنـهـدن اون بش سـنـهـيه قدر حبس ايله  
اعدام جزاسى . ووجب اولان دـعـوالر هب محكمه جنايتـده  
كوريلور . محكمه جنايت رئيس ايله اون ايكى اعضادن مركبدر .  
استيناف محكمه سى . — على العموم بدايت محكمه لرينك ايشلرينى  
تدقيق ايدر . بدايت محكمه لرينك ويردكارى حكم مدعيـلر  
طرفدن نقض اولنه رق محكمه استينافه كوندركم اوزره بالاستدعا  
بدايت محكمه لرينه بيلدير اير .

بدايت محكمه لرى دخى مدعينك طابى اوزرينه اوراق استـمـطـا .  
قيەسنى كاملاً محكمه استينافه كوندورلر . محكمه استيناف دخى  
بعدالتدقيق يا حكمى تصديق ويا خود يكيدن محاكمه اولملىرى  
ايچون حكم مذكورى نقض ايدرك محكمه اصليه سـنـه ارسال ايدر .

استیناف محکمہ لری بر قاج شعبہ یہ تقسیم اول نور . ہپسنگ  
 باشندہ بر رئیس بوانور . بوندن باشقہ مذکور محکمہ یہ عائد اولوق  
 اوزرہ بر باش مدعی عمومی بونور کہ بدایت محکمہ لرنده کی  
 مدعی عمومی معاونی بونک معاونی مقامندہ در . استیناف  
 محکمہ لری دائرہ صلاحیت لری داخلندہ بولنان عدلیہ ایشلرندن  
 ایستر حقوقہ ، ایستر جزایہ عائد اولسون استیناف اولنان بالجلہ  
 دعاوی بی رؤیت ایدر . استیناف محکمہ لرنده برده باش آووقات  
 بوانور کہ اودہ مدعی عمومی کبی متہملر اوزرینہ بر نظارت  
 عمومیہ اجرا ایدر .

محکمہ تمیز . — یالکیز بر محکمہ دن عبارت اولوب  
 پای تختندہ یعنی استانبولہ بوانور . دائرہ صلاحیتی عموم ممالک  
 عثمانیہ شاملدر . بودہ محکمہ استیناف کبی بر طاقم شعبہ لره  
 تقسیم اولنمشدر . وہپسی ینہ عمومی بر رئیسک تحت ریاستندہ  
 بوانور . بوندہ دخی بر باش مدعی عمومی ایلہ بر باش آووقات  
 ولزومی قدر اعضا بوانور .

محکمہ تمیز ، محکمہ استینافک حکم حقوقیدی ایلہ محکمہ  
 جنایتک حکم جنایتی تدقیق ایدر . بونلر نتیجہ محاکمہ لرنده  
 اولکی محکمہ لریک حکم لریک قانونہ موافق اولوب اولمدیغنی  
 ومغایر قانون اوقاق بر حال کوریلورسہ در حال حکمی نقض ایدر .  
 وب یکیدن محاکمہ بی امر ویا باشقہ بر حکم وقرار ویرر . عین  
 زماندہ مدعیلر محکمہ استینافک قرارینی دخی نقض ایدہ لریک تمیز

ايدرلر كه محكمه تميز بوكي دعوالرى ده تدقيق ايدر .  
محكمه تجارت . — محكمه تجارت عموم تاجرلر طرفندن  
انتخاب اولنان لك قدملى والك تجربه ديده اسكى تاجرلردن تشكىل  
ايدر بونلر بلا اجرت اجراى وظيفه ايدرلر . اكثري تجارت  
دعوالرينى بونلر فصل ايدرلر . هر شهرده بر محكمه تجارت  
بولنه بيلور .

محكمه عسكريه . — عموم عسكرك دعوالرى دخی  
« ارکان حرب » نامى ویران ویتون اعضا و رئیسى ضابطاندن  
عبارت بولنان بر طاقم محكمه اوده كوريلور . اكر بومدعيلردن  
بريسى ملكيهيه منسوب اولورسه او دعوى ديكر بر محكمه  
عدليه ده كوريلور .

### خلاصه

۱ — قوة عدليه نهيه ديرلر ؟  
قانونه اطاعت ايتينلري وعمومك حقوقنه تجاوز ايلينلري تأديب  
ايدن بر قوتدر .

۲ — قوة عدليه كيملرله اجرا اولنور ؟  
قوة عدليه محكمه لرله اجرا اولنور .

۳ — قاچ درلو محكمه واردر ؟  
يدي درلو محكمه واردر . اولنورده : صلح ، بدایت ، استيناف ،  
جنایت ، تميز ، تجارت وعسكرى محكمه لرندن عبارتدر .

۴ — صلح محكمه سى نهيه ديرلر ؟  
حكم ونفوذى بر ناحيه داخلنده بولنان بالجملة كوبلره شامل اولوق  
اوزره هر ناحيه مركزنده بولنان و صلح حاكمى ناميله معروف بر امور  
مخصوص طرفندن اداره اولنان بر محكمه در .

۵ — صلح محكمه سنك ، وظيفه سي نه در ؟

صلح محكمه سنك وظيفه سي كويلولري بربريله بارشديرمق ، اوفاق تفك شيلردن دولايي اونلرك اره سنده كي برودتي ازاله ايتك وعين زمانده مهم وقوعاتي مركزه بيلديرمكدور .

۶ — بدايت محكمه سي نه به ديرلر ؟

بدايت محكمه سي هر سنجاق مركززنده بولنور ، كوريله جك دعوانك لزومنه كوره بر قاچ شعبه به آبريلير ، هر شعبه برر رئيس ايله اداره اولنديني كي عمومي ده حقوق شعبه سنك رئيس اولان حاكك تحت نظارتي آلتنده بولنور ؛ بو محكمه لره عائد اولقي اوزره برر مدعي عمومي معاونيله ، برر مستنطق و برر اجرا مأمورلري دخي بولنور .

۷ — بدايت محكمه لر ينك وظيفه لري نه در ؟

بدايت محكمه لري ۷۵ غروش جزاي نقديدن بش سنه حبسله قدر بالجله دعوالري كوروب حكيم دخي و برر فقط بوندن فضله بر جزاي موجب اوله جق دعوالر اولورسه اونلري اوراق استنطاقيه لريله برابر مركز ولایت جنایت محكمه لر ينه ارسال ايدر .

۸ — بدايت محكمه سنك منقسم اولديني شعبه لر هانكيلر بدر ؟

بدايت محكمه لر ينك منقسم اولديني شعبه لر : محكمه حقوق ، محكمه جزا ، محكمه شرعيه دن عبارتدر .

۹ — محكمه حقوق نه كي دعوالري رؤيت ايدر ؟

محكمه حقوق ، حقوقه عائد يعني آليش و يریش كي معاملات ، بورج لينك بورجني انكار ايتسي وساير بوكي شيلري تدقيق و محاكمه ايدر .

۱۰ — محكمه جزا نه كي دعوالري رؤيت ايدر ؟

محكمه جزا دخي بش سنه حبسله قدر اولان بالجله جزاي موجب دعوالري رؤيت ايدر . ضرب ، جرح ، قتل كي .

۱۱ — محكمه شرعيه نه كي دعوالري محاكمه ايدر ؟

محكمه شرعيه دخي وراثت ، ميراث كي بر طاقم عائله ايشلريني بمحاكمه و تدقيق ايدر .

۱۲ — محکمه جنایت نهیه دیرلر ؟

هر ولایت داخلنده برر محکمه جنایت موجود او اوب او محکمه لر مذکور ولایتک شامل اولدینی بوتون مملکتلرده وقوعه کلن جنایت ایشلرینی یعنی بش سنه دن اون بش سنه حبس ایله اعدام جزاسنه وارنجهیه قدر مدهش دعوالری رؤیت ایدر .

۱۳ — محکمه استیناف نهیه دیرلر ؟

محکمه استیناف دخی هر ولایت مرکزنده برر دانه بولوب او ولایت داخلنده کی بالجله بدایت محکمه لرینک ایشلرینی تدقیق ونقضی طلب اولنان دعوالری رؤیت ایدر .

۱۴ — محکمه تمیز نهیه دیرلر ؟

یالکیز بر محکمه دن عبارت اولوب اوده استانبولده بولور و تکمیل ممالک عثمانیه داخلنده کی جنایت واستیناف محکمه لرینک ایشلرینی تدقیق ایدر .

۱۵ — محکمه تجارت نهیه دیرلر ؟

محکمه تجارت عموم تجارتلر طرفندن منتخب فخری تجارتلر طرفندن اداره اولور . امور تجاریه بی قوانین تجاریهیه توفیقاً اجرا و ایفا ایدرلر .

۱۶ — محکمه عسکریه ، نهیه دیرلر ؟

محکمه عسکریه ، عسکرلرک دعوالرینی کورن بر محکمه اولوب بوده اعضا ورئیسلی هر ضابطاندن عبارت اولان ودعوالری دخی قوانین عسکریه موجدنه حل وفصل ایدن بر هیئتدرکه بوکاده ارکان حرب هیئتی « دینور . ارکان حرب هیئتی هر طرفیده بولور . کی میسندہ اعضالری کوچک رتبه ده وآز کی میسندہ ایسه اعضالری بیوک رتبه ده وجوق اولور . بولر آیریجه معاش آلزلر ضابطلک معاشرلی نه ایسه اونکله اداره ایدرلر وعین زمانده کندی وظیفه . لرندن ده کیری قالمالزلر لزومنده اجتماع ایدرک دعوائی فصل ایدرلر .





## اون یدنجی بحث

### قوة علمیه - معارف

قوة علمیه بر ملتک روحیدر . بر ملتک هم کندی سعادت  
تأمین ایتمی وهمده دیکر ملتله تفوق ایایه بیلمسی ایچون  
تحصیل واکتسابنه مجبور اولدینی بر قوت وار ایسه اوده قوه  
علمیه یعنی معارفدر .

معارف حقنده نه قدر سوز سوزاندسه . نه درجه ستایشده  
بولاندسه ینه آزدرد . اسکی زمانلرده ملتله میدانه برر پهلوان  
چیقارهرق محاربه ایدر لر ایدی . هر ملتده بولنان بر قاچ پهلوان  
محاربه بی قزاققله عموم ملتله شرف و حیثیت بخش ایدر ایدی .  
صوکره لری آلات حرب چوغالدی . انسانلر بر برینی دها  
قولای ودها مدھش بر صورتده تلف ایتک واسطه لری بولدیلر .  
شیمدی هر ایکی ملت کتله کتله قارشیلانوب بر برینه آتشلرله  
سونکولرله . قایجلرله هجوم ایدیور و بر برینی خاک ایله یکسان  
ایایور لر ! فقط بوکا مقابل افکار و ذکای بشرده ایجه تکمیل  
وتعالی ایتدی . انسانلر آرمندده علوم و معارف اولدقجه انتشار  
ایلدی . خلاصه انسانلر عمومیت اعتباریله آز چوق تکمیل  
ایلدیلر . هر طرفده محاربه علیهنده فکر لر اویانغه باشلادی .

آرتق ملتیر ، قوملر بربرلریله نه پهلوان ایله ، نه ده آلات حرب ایله محاربه ایده جکلر ! آرتق مادی تکمللره ، تفوقلره رغبت قالمدی . چونکه نتیجه سز ، بی فائده اولدینی تبیین ایتدی . آرتق اییدن اینی به آکلاشلدی که انسان آنجق تکملات فکریه سی نسبتده ، معلومات علمیه سی درجه ننده انساندر . ایشته بوندن بویله ده ملتیر بربرلریله قلیجه دکل قلمله ، وجودله دکل فکر ایله ، باروتله دکل علم ایله محاربه ایده جکلر . وبوایسه نتیجه اعتباریله بربرلرینی محو وها ایده جک شیلردن عبارت اولیوب بالعکس انسانیتک برقات دها تکمانه وهرایکی طرفکده مطلقاً منفعت عمومیه نه بادی اوله جقدر . آوروپا اقوامنک لسانلرنده « علمک وطنی یوقدر ، دیرلر .

ذاتاً بزم شریعتمز موجبجه بز هیج برزمان دشمن بزی مجبور ایتدکجه سلاحه صارلمایز . فقط دشمن بزی مجبور ایتدکدن سوکره برکرده سلاحه صاریلیرسه حق مدافعه حقو- قز ایچون عالمی ترمه دیرز . فقط بو طویراقلر اوزرنده یالکیز سونکو ، طوب ، تفنک قوتیله مدافعه حقوق کافی اولیوب علم ، تجارت ، صنایع وزراعت قوتیله ده مدافعه حقوق ایتلیز یالکیز سلاح پاره ایتمز . زیرا دشمنلر من کندی حقوق وحیثیتلرینی یالکیز سلاحله دکل علم ومعرفتله ده محافظه ایدیورلر . اوقوه مادیلرینه لاینفا برده قوه معنویه ویا فکریه ده علاوه ایدیورلر . اوت برملتک فمایاب اولیه جق وابدیاً اونودلیه جق رخصاتی



وار ايسه اوده كندى معارفيدر . بوكون يونانستان برقرالقدر . فقط بوقرالانى كندى سعييله دكل آوروپا حكومتلرينك معاونتيله آلدى . چونكه يونانستانده ميلاد عيسادن اول وصوكره بر جوق حكيملر ، عالملر فيلوسوفلر يتيشدى ، اونلر بك جوق آثار ترك ايتدى . هر نه قدر زمان بو آثارك بك جوقلريني محو ايتمش ايسه ده ينه بر مقداريني اسلافه براقدى . الجا ات زمان ايله اونلر اولدى كيتدى . لكن ديللرده داستان اولان ناملرى ، شهرتلى ، علم ومعرفتلى نسيم ماضى ايله حاله ، استقباله انتقال ايتدى . بناء عليه اسكى يونانيار ماده بزده بيله قابليه جق درجه ده اولدى ، فقط معناً ، علماً ، فكرياً بر ذره بيله غيب ايتمه مش كبي يشايوردى . ايسته اونلر ك بشريته اولان شو خدمتلى اونلر ك نامى ، صرف اونلر ك نام مقدسلىريني ابقا ايجون يونانستان حكوتمنى تشكيل وتاسيسه عالم انسانيت قرار ويردى . وبوقرار اوزرينه اجداد مزك قائلريه ، جانلريه قزانديغمز اويرلرى ، او مقدس وطنمزك جزء اريني بزم المزدن آلوب يونانستان قرالانى تشكيل ايتديلر . بوكا بز بر حقمنز اقدر ديه ميز . چونكه بز بو حالره مستحق اولدق . چونكه بز يالكز سلاحمزدن باشقه هيچ بر شينه كوونمبور هيچ برشى طانييوردق . فقط مع التأسف او سلا حمزى دخى عموم وطنك سعادت و سلامتى ايجون استعمال ايتسهك دهانه ايستر ايدك . بر قاچ ظالم مستبدك قوردقلى

اسرار استبدادی کشف ایدمیه رک ظاهرده وطنم رک سلامتی  
 حالو که حقیقتده اونک محو وانقراضی موجب اوله جق بر قاج  
 مستبدک منفعت ذاتیه سی تأمین ایچون قوللانیه ردق . بناء علیه  
 بز سوقراطلرک ، ایوقراطلرک آریسطوتلرک مسکنه لرینه خاف  
 اوله میوردق : بزه عموم آوروپالیر باربار دیورلر ایدی . بزم  
 کبی باربارلرک آوروپا کبی و معرفتک ضیا صاحبدینی بر اقلیمده  
 اوطورمنه هیچ بر زمان راضی اوله میورلر ایدی . هپسی ال  
 برالیکله بزی مذشامن اولان آسیایه قدر آتمغه چالیشمیورلر  
 ایدی . ایشته بونک ایچون اوتوز اوتوز بشمنه اول وطنمزی  
 بر جوق بیوک پارچه لره آیردیلر . و بونلری بزم کبی لیاقتلرله  
 ویردیلر . بوکاده قانع اولمادیلر بزم بوتون بوتون آوروپادن  
 چیقمه من ایچون بلان قوردیلر . بویلاک قومدن فعله چیقمه .  
 سنه آنجق بر ایکی هفته لق بر زمان قالمش ایکن حقیقت حاله  
 واقف اولان اتحاد و ترقی جمعیتی آراتق ده ا زیاده بکله مکده  
 محل قالمدیغنی حس ایدرک فیکرینی میدانه قویدی ، حقیقت  
 حال عسکرلرمنه آکلاتدی . اوزارده بر حدت دشمنه چوریدان  
 ساحلرینی وطنده کی دشمنه چویردیلر ، بوسایه ده شو انقلاب  
 مسعودده میدانه کادی تاریخده بیله امثالی کورلین بویله بر انقلاب  
 بتون آوروپالیرک نظردقتی جلب ایتدی . هرکس بزی یقیندن  
 تدقیقه باشلادی . انقلابم زده کوستردیکمز اتحاد و قوت ، سکون  
 و اعتدال ، ایتدیکمز نمایش و سونجیلر ترکلرک ، عثمانلیرک

حقیقهٔ انسان اولدیفنی وانسانیتی سودیکی فقط شیمدی به قدر وقوعه کلن خطالرك بالذات کندیلرینک صنعيله اولمبوب بر قاج مستبدك اثر ظالمانه سنی اولدیفنی اییدن ایی به آکلادیلر . آرتق بزده مدنی دولتیر ، ملتیر ایچنه قارشندق . شیمدی هر کس بزدن مطلوب اولان علم ومعرفتی بکلیور . هیچ بر زمان آوروپا- لیلر بزدن ، مدنی بردولتدن ، علمدن ، فزندن باشقه هیچ بر شی' بکله منزلر . بوندن صوکره بزم اولره کوستره جکمز الك بیوک معرفتمز عالمز عرفانمزد . شیمدین صوکره بزی بو طوبراقلرده ثابت طوته جقده ینه علممز عرفانمزد . آوروپانک شیمدی به قدر حقمزده کوستردیکی فنا نظرلری ، تحقیر واستخفافلری هر کسجه معلومدر . فقط قان دوکمکسزین ، کیمسه نك حقنه ، حقوقنه تمرض ایتیمکسزین هم عسکر هم اهالی باخصوص بوقدر مختلف عناصردن مرکب براهالی یکوجود اوله رق بویه مسعود بر انقلاب یابدیمزدن دولای عموم آوروپا- لیلری محجوب ایتدیکمز ه هیچ شبهه یوقدر . طبیی استانبوله وسائر یرلره برچوق غزته مخبرلری بولایور . احوالری برر برر تدقیق ایدیور . ونسوب اولدقلری غزته لره مقاله لر یازیو- لر . دیمککه بوندن صکره هر حالز یالکز ملتیزی تشکیل یدن هر فرد طرفنددن دکل ، دوست دشمنز اولان بر طاقم اجانب طرفندندن برر برر تدقیق ایدیه جک ، ایچمزدن برر کیمسه نك آتمش اولدیفنی فنا بر آدمک فنا نتیجه سی یالکز کندی

نفسنده قالمیوب بلکه عموم ماتمه شامل اوله جق . ایشه برغزته  
محری نری و بزم اوصاف و خصائل انسانیه منری برر بر مدح  
و نئادن سوکره ارده شویله برده جمله یازیور .

« آورو با طویراقلری اوزرنده اوطورمه لایق اولدقلرینی  
کمال امینله بیلدیکمز و شولیاقتسز لکلرندن طولایی آسیایه آتمق  
ایستدیکمز بو « باربار » کندی حاکمیتلرینی الله ایتک خصوصنده  
بزدن دهها مدنی اولدقلرینی کوسه تردیلر اونلر بتون اقوامک  
سیل کبی قانار آقندینی بویله عظیم برانقلابده نه رباش کسدیلر  
نده بر وجود تلف ایتدیلر . « محرر یالکیز بونکله قالمیور  
بریردهده « ترکلرک شو انقلابلرینی کمال سکون واعتدال ایله  
یابدقلرندن باشقه شایان تقدیس برمزیتلری واردر که اوده اصلا  
آلقول ( اسپرتو ) استعمال ایتمه ملریدر ، دیور . فی الحقیقه  
آلقولک نه قدر مدهش بر شی اولدیغنی تریف ایتک بوراده  
صددک خارجنده در . یالکیز بین الاطبا برچوق مباحثادن صکره  
بزم شو انقلاب کبری بویله کمال سکون واعتدال ایله کچیردیکمزک  
باشیجه سببی اهالیمزک - اکثریت اعتباریله - وجودلرینک  
آلقول ایله مشبوع اولمدیغندن ایلری کلدیکنه قرار و برلمشدرکه  
بوده موافق حقیقتدر . چونکه آلقول و هر نوع مسکرات جمله  
عصیه بی او قدر یورار و اودرجه بوزار که انسان اک اوفق بر  
شیدن بیله پک بیوک برتهور وحدته دوچار اولور .

خلاصه ، خطالرینی کمال جسارتله تشریح ایدن ماتلر ترقیه

نامزد در . بزده خطالرمزى بلا پروا ، قورقوسزجه سنه تشریح  
ایتملى زواونلری تشریحدن صوکرده برر برر ازاله یه چالشملى  
یزکه ظایه املزمه وصولی ممکن اولسون . بوکون بزده اک  
نقصان بر قوت وار ایسه اوده قوه علمیه در . قوه علمیه نك  
نقصانغی دکلیدر که بزى شیمدی یه قدر استبداد بویوندوروغی  
آئنده براقدی . حالبوکه قوه علمیه دیگر بوتون قوتلرک باباسی ، عادتا  
برر هبیدر . برملته قوه علمیه نه قدر مکمل اولورسه اوماتک دیگر  
قوتلری ده اونسبتده مکمل اولور . قوه علمیه هر شیدن اول انسانه کوزل  
بر تربیه فکریه ویرر . انسان بوتربیه فکریه سایه سنده کندندن ،  
محیطندن خبردار اولور . انسان هر نه یاپارسه فکریله ، عقایله ،  
بینیله یاپار . فکر ، عقل ، بین نه قدر کوزل تربیه اولور ،  
نه درجه مکمل بوانورسه طبیعی یاییلن شیرده اونسبتده مکمل  
اولور واونسبتده جدی ، متین وسالم ایشلره تشبث اولور .  
قوه علمیه قوه اجراییه دن معارف نظارتی نامیله معروف  
بر نظارت طرفدن اداره اولور .

معارف اک زیاده مکتبلرده تحصیل اولور . اونک ایچون  
بر ماتک قوه علمیه نك درجه سنی کوستره جک بر معیار وار  
ایسه اوده مکتبلریدر . مکتبلر نه قدر چوق ونه درجه منتظم  
اولورسه اونسبتده تحصیلده عمومی مکمل اولور .

مکتبلرمن درت قسم اوزرینه ترتیب اولنمشدر :

۱ — ابتدایه مکتبلری

۲ — رشديه مکتبلى

۳ — اعدادیه

۴ — عالیہ

ابتدائیه مکتبلى . — ابتدائیه مکتبلرنده هرکسه الزم اولان او قویوب یازمغه برابر معلومات ابتدائیه تدریس اولنور .  
 ابتدائیه مکتبلى ۶ دن ۱۳ یاشنده کی چوجقلره مخصوصدر .  
 ابتدائیه مکتبلى مجنا اولوب مجبوریدر . یعنی هرکس کندی چوجفی مطلقا ابتدائیه مکتبنه کوندرمهک مجبوردر . ابتدائیه اکر کوندرمنزه حکومت اونى تجزیه ایدر . ابتدائیه مکتبلرینک مدتی اوج سنه در . فقط چالیشقان چوجقلر بر سنه در بر قاج صنفک امتحانی بردن ویرم بیایرلر . ابتدائیه مکتبلرنده قیز و ارکک چوجقلری برانکده او قورلر ایسه ده اکثر محللارده قیز چوجقلری ایچون دخی خصوصی ابتدائیه مکتبلى بولنور .  
 چوجقلر ابتدائیه مکتبلرندن ابتدائیه شهادتنامه سی آلهرق چیقارلر .  
 رشديه مکتبلى . — ابتدائیه مکتبندن سوکره رشديه مکتبنه کیریلور . رشديه مکتبنه کیرمک ایچون یا ابتدائیه شهادتنامه سی کوسترملی ویا ابتدائیه ده کی درسلردن او شهادتنامه درجه سنده امتحان ویرملیدر . رشديه مکتبنده ده چوق درسلر او قور . رشديه مکتبنک مدت تحصیایه سی دخی اوج سنه در . فقط چالیشقان چوجقلر هر سنه ایکی صنفک امتحانی ورمک ایسترلر سه قبول اولنور . چوجقلر رشديه مکتبندن رشديه شهادتنامه سی آلهرق چیقارلر .

اعداديه مکتبلى . — رشديه دن سوکره اعداديه مکتبته  
کیرلور . بوراده دهاچوق قنلر تحصیل ایدیلر . انسان او قودجه  
ذهنلر ، فکرلر آچیلیر . انسان هر شیدن خبردار اولور .  
چو قنلر اعداديه مکتبلرندن اعداديه شهادتنامه سیله  
چیقارلر . ابتداییه ، رشديه و اعداديه تدریساتی هر کسه الزمدر .  
حتی بر دمیرجی ، برقوندره جی بیله بونلری بیلملیدر . انسان  
بونلری بیلمزسه دنیاسدن بی خبر اولور . ناصل یشادیغنی ،  
بیچون دنیایه کلدیکنی بیله مز .

عالیه مکتبلى . — اعداديه دن سوکره مکاتب عالیہ کلیر .  
مکاتب عالیہ هر کسک مسلسکنی تعیین ایدر . مکاتب عالیہ دن  
جیقان بر صنعت و یا بر مسلك اربابی اوله رق چیقار . مثلاً مکتب  
طبییه کیرن دو تنور ، مکتب حقوقه کیرن آروقات دارالمعلمینه  
کیرن معلم ، تجارت مکتبته کیرن تاجر اولور .  
باشلیجه مکاتب عالیہ شونلردر . دارالفنون ، مکتب طبییه ،  
مکتب حقوق ، مکتب ملکیه ، دارالمعلمین ، تجارت مکتبی ،  
ملکیه بیطر مکتبی و سائرهدن عبارتدر .

### خلاصه

- ۱ — قوه علمیه نهیه دیرلر ؟  
قوه علمیه بر ملتک درجه علم و کلاتنی کوستن بر قوت اولوب  
دیگر بوتون قوتلرک مادر اصلیمی ورهبر حقیقیسیدر .
- ۲ — بر ملتی دیگر ملته تفوق ایتدیره جک و نامنی ابدیاً ابقا  
ایله جک قوت هانکیسیدر ؟

برلمانی بوتون ملتره تفوق ایندی بره جک و نامنی ابدیاً ابقا ایلیه جک  
آنجوق اولمک قوه علمیه سی یعنی درجه معارف و کلائیدر .  
۳ — برملت وطنی ، حقوقنی هانکی نوله حفظ و مدافعه ایدر ؟  
برملت وطنی ، حقوقنی قوه علمیه سیله ، قوه عسکریه سیله صنایع ،  
زراعت و تجارتیه محافظه ایدر .

۴ — آوروپالیر اسکیدن بزه نه دیورلر ایدی ؟  
آوروپالیر اسکیدن بزه باربار یعنی لیاقت و قابلیتیز آدملر دیورلر  
ایدی . بزم آوروپانک طومراقلرینی چیکله دیکمه راضی اولیورلر  
وبزی آسیایه آتمق ایستورلر ایدی و بزده انسانلغه لیاقت و قابلیتیز  
اولدینی یاپدیغمز انقلاب ایله برپارچه اثبات ایتدک .

۵ — آوروپالیر شیمدی بوفکردن واز کچدیلر می ؟  
آوروپالیر شیمدی بوفکردن وقتاً واز کچدیلر . اکر بز مشر-  
وطیتک بخش ایندیکی غایت واسع بر ساحه حریت داخله اولنلرک  
آرزو و طلب ایندیکی لیاقت و قابلیت کوستره مزسه ایینه اولنلر فکرلرینی قوه دن  
فعله حیه قاره جقلر . بزی آوروپا طومراقلرندن دایاقله تحقیرله قوه جقلر .  
۶ — آوروپالیرک و بوتون عالم انسانیتک بزدن بکادکلی شی نه در ؟  
آوروپالیرک و بوتون عالم انسانیتک بزدن بکادکلی شی قوه علمیه  
یعنی ، معارف ایله تجارت ، صنایع و رراعتده سوک درجه ترقیمزدر .  
مع الناسف هر شیشمز کی بونلرده پک نقصاندر .

۷ — معارفی کیم تأمین واحضار ایدر ؟  
معارفی مکتبلر تأمین واحضار ایدر .  
۸ — مکتبلر قاچ درجه اوزرینه ترتیب اولنمشدر ؟  
مکتبلر درت درجه اوزرینه ترتیب اولنمشدر . اولنلرده ابتدائیه ،  
رشدیه ، اعدادیه و عالیه مکتبلر ایدر .

۹ — ابتدائیه مکتبلری ناصلدر ؟  
ابتدائیه مکتبده اوفوبوب یازمق اوکر نالهی کی بعض اوفاق  
معلومات ابتدائیه دخی تحصیل اولنور . ابتدائی مکتبلر هر طرفده  
مجبوری و مجانادر .



۱۰ — رشديه مکتبلى ناصلدلر ؟

رشديه مکتبلى مبادىء علومك تدريس اولندينى ايکنجه درجه ده  
برمکتب اولوب ابتدائيه دن سوکره اورايه کيريلور .

۱۲ — مکاتب عاليه نصلدلر ؟

مکاتب عاليه هرکسه بر صنعت اوکروه تير . مکاتب عاليه دن چيقانلر  
يا بر صنعت ويا بر مسلك اربابى اوله رق چيقارلر .

## اون سکزنجى بحث

### قوة بلديه

قوة بلديه هر مملکت اهالى سنك بالذات بلدلرينك يعنى  
مملکتلرينك اعمار و ترقي سنده چايشم ييدر . چارشولرک ، بازار-  
لرک تميز و منتظم اولمسي ، اصناف و اهالى نك کندی آلدن  
ويريشلرنده ، هر دلرلو معامله لرنده حسن اتزاج ايلسي لازمدر .  
قوة بلديه بر مملکتك وبوصورتله بر مملکتك درجه سي و نزا کتنه  
بر مثال اوله بيلور . قوة بلديه ظن اولندينى کي صرف بر بلديه  
مأمورندن عبارت دکلدر . بر مملکتك قوة بلديه سي او مملکتك  
بتون اهالى سنده عاندر . خلاصه هر کس مملکتك ، محله نك ، خانه  
و سوقاقلرک انتظام و مکمليتنده ، تعلیم و وظائفدن اهل ايتمه مايدر .  
قوة بلديه نك ده منتظماً جريان ايده بيلمسي ايچون رأى خفي  
ايله اهالى طرفندن منتخب بر بلديه رئيسيله برقاج اعضادن عبارت  
بر هيئت ادارمسي واردر . بلديه رئيسي معاشلى اولوب اعضالري  
فخر ييدر . بلديه رئيسي هرايکي سنده بر دفعه يکيدن انتخاب  
اولنور . مملکتك تنظيقاتى ، اصناف ، بقال واکمکچيلرک

تفتیش و نظارتی و مجلس مبعوثان اعضا لریڼک انتخاباتک اجراسی  
هې بلدیه دائره لریڼه عاڼددر .

خلاصه

۱ — قوة بلدیه نه یه دیرلر ؟

هر مملکتک اعمار و ترقیسی خصوصنده بالذات او مملکت اهل یسنک  
واقع اولان سى و غیر تلیدر .

۲ — قوة بلدیه نك ده حسن جریانى ایچون براداره سى وارمیدر ؟  
اوت قوة بلدیه نك ده حسن جریانى ایچون بلدیه دائره سى نامنده  
براداره خانه سى واردر .

۳ — بلدیه دائره سنک هیئتى کیملر تشکیل ایدر ؟

بلدیه دائره سنک هیئتى بلدیه رئیس له اعضا لر تشکیل ایدر . بلدیه رئیسى  
عموم طرفندن رأى حنى ایله انتخاب اولنوب معا شلیدر حالبوکه اعضا لر فخریدر .

۴ — بلدیه دائره سنک وظیفه سى نهدر ؟

بلدیه دائره سنک وظیفه سى مملکتک تدریقاتى ، اصناف ، بقال  
و اککجیلرک تفتیش و نظارتى ، مجلس مبعوثان اعضا لرینک انتخاباتک  
اجراسى هې بلدیه دائره لریڼه عاڼددر .

قواى مایه جدولی

هیئت مبعوثان  
هیئت اعیان

قوة قانونیه

قوة مالیه  
قوة عسکریه  
قوة انضباطیه  
قوة عدلیه  
قوة علمیه  
قوة بلدیه

قوة اجرائیه

قواى مایه

## اون دو قونجی بحث

## ممالك عثمانیه نك تقسیمات اداره سی

ممالك عثمانیه اداره جهتیله برطاقم ولایتلره ، ولایتلر  
سنجاقلر و سنجاقلر قضالره ، قضالردخی ناحیهلره تقسیم اولمشدر .  
ولایت . — ممالك عثمانیه نك اوفق برقطعه سی اولوب بروالی  
طرفدن اداره اولنور . والی حکومت طرفدن تعیین اولنور  
و ولایت مجلس اداره سنك تقدیس و نظارتی آلتده بولنور . والی  
اجرا آتی متصرفلر واسطه سیله یابار والینك مرجمی داخله  
نظارتیدر . والی ولایتك و اهالینك منافعی خصوصنده هر درلو  
تشبند بولنه بیلور . لیکن بعض مهم ایشلر اولورسه اوزمان  
حکومتك امرینی آلفه مجبوردر .

بوامری ایسه داخله نظارتی واسطه سیله آلیر . والی اولاً  
صوره جنی شیء داخله نظارتنه یازار اوده صدارته بیلدیرر  
صدارت دها مهم برشی ایسه مجلس عمومینك مساعدده سنی بکلر .  
اگر دكلسه كندیسی امر ویرر ، ایشته بوسورتله اجرا آت  
مهمه وقوعه کلیر . برولایتده ، والینك بونئدینی مالکیه دائرة سیله  
ایتناف ، جنایت ، تجارت محکمه لری ، پوسته و تاقراف خانه ، بر مکتب  
اعدادی ، ملکی ، عسکری فرقه سی ، صنایع مکتبی زراعت  
و تجارت مکتبی دارالمعلمین مکتبی ، مشهور ولایتلرده اجنبیلرله  
قونسولوسخانه لری و مائر بولنور .

سنجاق . — سنجاق ولایتك بر جزئی اولوب بر متصرف طرفندن اداره اونور . متصرف دخی حکومت طرفندن تعیین اونور . و مجالس اداره لوانك تفتیش و نظارتی آئنده بونور . متصرف اجرا آتی قائمه کامله تبلیغ ایدر .

متصرفك مرجعی دخی والیدر . متصرف دخی مملكتك منافی ایچون رجقو ایشلرده بولور سده بض مهم خصوصاته والینك امرینی دخی آلفه مجبوردر . بر سنجاقده ، متصرفك بولاندینی ملکیه دائره سیله بدایت محکمه سنك بولاندینی عدلیه دائره سی و سنجاغك و سمنه کوره بعضاً فرقه ، بعضاً بر طابور عسکرک اداره سی ایچون لازم کان امرا و ضابطان عسکریه ، ولایت مکتب اعدادینك بر قیچ صنف آشاغیده اولمق اوزره بر سنجاق مکتب اعدادیسی ، تلغراف و پوسته ، تجارت محکمه سی و ساحلده کی سنجاقلرده اکثر با قونسو و سخنه لر بونور .

قضا . — سنجاغك بر جزئی اولوب بر قائمه مقام طرفندن اداره اونور . قائمه مقامك مرجعی دخی متصرفدر . بوده مملكتك منافی ایچون هر درلو خصوصاته حرکت ایدم بیلور سده بعض مهم خصوصات ایچون متصرفكده امرینی آلفه مجبوردر . بر قضا ، قائمه مقامك بولاندینی ملکیه دائره سیله ، حاکمك بولاندینی عدلیه دائره سی ، رشدییه مکتبی ، پوسته و تاغرافخانه و عسکریه دائره سی بونور .

ناحیه . — قضانك بر جزئی اولوب بر مدیر طرفندن اداره

اولنور . بومديرلرلرک مرجعلری دنخى قائممقاملردر . ناحیه مد-  
یرلری آندقلری امرلری کوی مختارلرینه تبلیغ ایدرلر . هر  
کوی ۳۰ دن ۵۰۰ خانیه قدر اوله بیلور بونلر ایچلرندن بریسی  
کهیا (مختار) نامیله انتخاب ایدرلر ، رسمی برکهیا مهری واردر .  
کوبولور اومهری کیمه تسایم ایدرلر ایسه اومختار اولور . طبقی  
محله مختارلریده بویله در : برمختار برکوبلونک وکیلی دیمکدر .  
بوکویه ویرکی تحصیلی ایچون تحصیلدار کلیرسه ایلك اول کهیا یه  
مراجعت ایدر . بوده کوبولوری جاغیروب کلن امری سویلر  
اونلرده مختارک سوزینه اطاعت ایدرلر . اگر مختار یولسز برایش  
یاپار ویاخود کوبولورک حتملرینی محافظه یه چالیشمزسه کوبولور  
اونی عزل ایتک حقنه مالک اولورلر ومهری آلوب باشقه بریسنه  
ویرلر . برکویده ویا برمحله ده یالکیز برمختار اولمز . برمختار  
اول برده مختار ثانی وبرامامله برقاج ده اختیار مجاسی بوئور .  
اگر مختار عزل اولورسه بو اختیار مجاسندن برینی مختار یاپارلر .  
چونکه بونلر مختار اغه نامزد اولمشلردر . کویلرده مختارک معاشی  
یوقدر . فقط شهرلرده محله کهیا لری تحصیل ایتدکلری ویرکیدن  
برقاج غروش « کهیا جیلوق » تمیر اولنان برپاره آلبرلر . برده  
نکاه وسائر خصوصاتده جزئی برپاره آلبرلر . برناحیه ده ناحیه  
مدیریه ، صاحب حاکمی ، رابتدائییه وبعضاده رشديه مکتبی ،  
ناحیه نک درجه همینه کوره بعضاً برتلغراف وپوسته خانه بولنور .  
کویلرده ایسه کلن مسانرلرک اقامت ایتدیکی برر اوطه ایله برر  
ابتدائییه مکتبی بولنور .

## خلاصه

- ۱ — ممالك عثمانیه اداره جهتیله ناصل تقسیم اولمشدر ؟  
ممالك عثمانیه اداره جهتیله برطاقم ولایتلره ، ولایتلر سنجاقلره ،  
سنجاقلر قضاالره ، قضاالر ناحیهلره ، ناحیهلر دخی کویلره تقسیم اولمشدر .
  - ۲ — ولایت نهیه دیرلر ؟  
ولایت ممالك شاهانه نك منقسم اولدینی بیوک قطعه لردن بری اولوب  
بروالی طرفندن اداره اولنور .
  - ۳ — سنجاقل نهیه دیرلر ؟  
سنجاقل ولایتک برجزئی اولوب برمتصرف طرفندن اداره اولنور .
  - ۴ — قضا نهیه دیرلر ؟  
قضا سنجاقلک برجزئی اولوب بر قائم مقام طرفندن اداره اولنور .
  - ۵ — ناحیه نهیه دیرلر ؟  
ناحیه قضا نك برجزئی اولوب برمدیر طرفندن اداره اولنور .
  - ۶ — کوی نهیه دیرلر ؟  
کوی ناحیه لرك برجزئی اولوب بر مختار طرفندن اداره اولنور .
  - ۷ — مرکز نهیه دیرلر ؟  
کوک ولایت کرك سنجاقل مرکز لینه یقین برطاقم کویلر ویا اوکو-  
بلرك مربوط اولدینی ناحیهلر واردرکه بونلر دوغروندن دوغرویه مرکز  
ولایت ویا مرکز لویه ملحق اوله رق اداره اولنورلر چونکه بونلرك  
بقیننده مربوط اولقی ایچون مناسب بر قضا یوقدر . اوزمان مرکز  
ولایت ویا مرکز لوالر بونا حیه ویا قریه لرك مربوط اولدینی بر مرکز  
قضا کی نظر اعتباره آلیر .
- ایشته بوتون اسلاملری دوچار فقر وسفالت ایدن واونلری کرداب  
اضمحلاله آنان سبب حقیقی اساساً دین مبین اسلامیتجه ده مردود اولان  
بوسوء اعتقاددر . بناءً علیه بوندن بویله اعتماد نفسدن باشقه هیچ  
برشی طایماتی واللله دخی اعتماد ایدرك ضلالتنده قالماق عمومک ،

وباخصوص دین قرداشلریزک وظیفه سیدر. زیرا جناب حق قرآنک  
 ۴۳۴ نجی صحیفه سنده سورۃ فاطرہک بشنچی آیتندہ ای انسانلر [اللہ  
 اولان بیهوده اعتمادکز یولکری شاشیر قاسون] بو یورمشدر .

## یکر منجی بحث

### تبعه نك وظائف حقوقی

عین ماتک افرادندن هر برینه تبعه دینور : عثمانلی تبعه .  
 سی دینجه عثمانلی حکومتنه تابع اولان هر فرد آکلاشیلور .  
 عین ماتک افرادی ، دینلری ولسانلری نه اولورسه اولسون ،  
 عین تبعه دن اولدقلرندن بربریه قرداش دیمکدر .

تبعه نك وظیفه سی قانونه اطاعتدر . اگر بر کیمسه قانونه  
 اطاعت ایتمزسه عاصی صاییلور . بناءً عایه او کیمسه شدتله  
 مجازات اولتور . چونکه قانون منافع عمومیسه ایچون قونلش  
 بردستورددر . منافع عمومییه یی تأمین ایدن برشدنی قبول ایتمه مک  
 ویا اوکا اطاعت ایلمه مک عمومیه قارشنی بر خیانتدر . اونک  
 ایچون قانونه اطاعت ایتمین کیمسه قانوناً مجازات اولتور .

تبعه قانونه اطاعت ایتمکله برابر ویرکیلری دخی زماننده  
 کتیروب حکومتیه ویرمکله مکلفدر . چونکه ویرکیلر منفعت  
 واحتیاج عمومی ایچون صرف ایـدیـار . مملکتک اداره سی  
 ویرکیلرله دوزملیر . مأمورلرک معاشلری ویرکیلرله ویریلیر  
 اگر اهالی ویرکیلری ویرمنزسه خزینیه هیچ باره کیرمز  
 باره اولمینجه ده هیچ برایش کوریلهمز اونک ایچون هر کس

حصه سنه اصابت ايدن وير كيلرى وقت وزمانيله محنه تاديه ايتمه  
بورجايدر. خلاصه ويركى هر كسك بورجيدر . اوندن قور تاق  
آنچق اونى تاديه ايتمه اولور .

تبعه دن هر كس كندى اولاد وعيالك سعادتي ايچون  
چاليشوب پاره قزانغه دخى بورجايدر . ليكن بو باردي هم  
جنسلرينك مضرت وفلاكتلريله قزانمه مليدر . بو پاره يي وطنه  
وهم جنسلرينه خدمت ايدرك اونك مقابله قزانمايدر . انسان  
كندى منفعتى منفعت عموميه يه خدمت ايدرك تدارك ايتمايدر .  
اكر بويله چالشمز ايسه آرقه سندن فلاكت حاضر در . برماق  
تشكيل ايدن افرادك هپسى بر قرداش كيدير . اونك ايچون  
بربري اينجتمه اكله برابر يكديكرينه معاونت و حرمتده قصور  
ايتمه مليدر . كوچك چوجقلرى ابي تربيه ايتلى ، يتيملى ،  
بيكسلى مكتبه و يروب او قوتدير مى و اونلرك سعادت وسلامت  
حال و آتيسنى تا مين ايتلى . فقرا و اختيارلره آجيلى . محتاج  
اولانلره معاونتدن كبرى دورمه ايدر انسانيت بونى ايجاب  
ايتديرر . الك بيوك وظيفه لر من وطنك سعادت و عظمتنى تا ميندر .  
وطنك معارف ، صنايع ، تجارت و زراعتنى ايلرى كتورمك  
عموم تبعه نك الك بيوك وظيفه سيدير . معارف سز بر مات روح سز  
بر جسم كيدير . تجارت صنايع و زراعت دخى آنچق معارفله  
ميدانه كلير . خلاصه ، بونلرك هپسنىك اساسى معارفدر . كرك  
معارف كر كسه صنايع ، تجارت و زراعت ماتك بيوك كوچك هپسنىك



سعى وغيرت وثبات دائماً ليله ميدانه كلير. الك مهم ايشلر بر كشينك چوق  
چالشمسيله دكل، چوق كشينك بر چالشمسيله الده ايديلير. ارنك  
ايچون هر كس آلله و يروب اتحاد و اتفاقله چايشمايدر. بربرينك  
ايشنى اكمال ايتك ايچون بربرينه ياردم ايتايدر. قطعياً نه مه لازم  
ديمه مليدر. صكره هر كس نه مه لازم ديرسه هيچ بر ايش  
كورلار. چو جقلر سز شيميدن متفكر متجاسر و متشبث  
اوليكز. عقلكيزك كسديكى هر ايشى اجرايه تشبث ايديكز.  
و تشبث ايتديكيز ايشلرى دخی قانهايتنه قدر تمقييده ثبات  
ايديكز. ايشته اوزمان سميكيزك سعادتنى كوررسكز و وطنه  
بيوك بيوك خدمتلا ايدرسكز.

تبعه نك حقوقى : حریت ، مساوات ، عدالت و اخوتدن  
عبارتدار. يعنى هر كس قانونى تجاوز ايتمين و عموميه ضررى  
طوقميان هر فعاانده ، فكرنده ، اجراآت و تشبثاتنده سربستدر،  
هر كس قانون قارشيدنده مساويدر. هر كسك حقوقى عدالتله  
كورلمايدر. هر كس بربريله قرداش كېي كچممايدر. بوندن  
باشقه هر كسك مالى ، جاني ، عرضى و ناموسى دخی برر حقى  
اولوب بونلرك محافظه و وقايه سنه دخی حكومت بورجايدر.  
تبعه نك حقوقى محافظه بورجايدر. اكر تبعه نك حقوقى محافظه  
ايدلارسه هر كسك حكومت حقنده شكاييت ايتكه و مجلس مبعوثانه اقامه  
دعوا ايله مكه حقى واردر. فقط هر كس هر دعوا ايچون  
دوغرودن دوغرويه مجلس مبعوثانه شكاييت ايتيوب اولاً

منسوب اولاديني حكومته مراجعت ايدەجك اكر اورادن  
حقوقي محافظه ايتزلر ايسه اوندن سوكره مجلس مبعوثانه  
شكايته حق اوله جقدر . مجلس مبعوثان دنخى هم مدعينك  
حقوقي استرداد ايدەجك و همده اولجه مراجعت ايتديكي حالده  
حقوقي كتم ايدن شعبه حكومتي شدتله جزايه چاربه جقدر .

### خلاصه

۱ — تبعه نهيه ديرلر ؟

تبعه ، عين ملتك افرادندن هر برينه تبعه ديرلر .

۲ — ملت نهيه ديرلر ؟

ملت ، مقصدلري اولان وعين قانونه تابع يونان و بر سنجاق  
آلتنده جمع اولان بر ويا برجوق اقوامك هيئت مجموعه سنه ديرلر .  
بزم ملتزه عثمانلي ملتي تعبير اولنور . بودو عثمانلي بايراغي آلتنده  
طوبلانان مختلف اقوامدن مركبدر . بونلرك باشليجه لري : تورك ،  
عرب ، آرنارود ، كورد، روم ، ارمني ، يهودي ، بلغار و سائرهدر .  
بو مختلف اقوامك لسان و دينلري نه اولورسه اولسون هبسي عثمانلي  
نامي آلتنده برلشير . عثمانلي ملتلك لسان رسمي سى تركجه اولوب  
تبعه عثمانيه دن هر كسك يوني بيلمسي و اوكرمسي لازمدر .

۳ — تبعه‌ك وظيفه سي نهدر ؟

تبعه‌ك وظيفه سي قانونه اطاعت ايتك ، و مركبلى و يرمك كندى  
اولاد و عيالى اعاشه ايله مك ، كندى چوجقلىرى كوزل تربيه ايتك ،  
وطنك سعادت و عظمتي ايجون چالشمقدر .

۴ — چوجقلىر تا كوچكدن اعتباراً ناصل اولميدر ؟

چوجقلىر تا كوچكدن اعتباراً دائماً متفكر ، متجاسر و منشبت  
ولميدرلر . عقللرينك كسديكي هر ايشى اجرايه تشبث ايتل و اجرا سنه  
نشبث ايتدكلري هر شىي "ناهايته قدر تعقيبده ثبات ايلميدر" ايشته

اوزمان سبيلرينك سعادتي كوررلر و وطنه ده بيوك بيوك خدمتلايدرلر.  
 ۵ -- تبعه نك حقوقى نه در ؟

تبعه نك حقوقى ايسه حریت ، مساوات ، عدالت و اخوتدن عبارتدر .  
 يعنى هر كس قانونى تجاوز ايتمين و ضررى عمومه طوقنميان هر بر  
 افعالنده ، افكارنده ، تشبثاننده سربست اولوب قانون قارشيسينده  
 مساوى اولوب حقوقى دخى عدالتله كوريلوب هم جنسلريله بالخاصه  
 وطن قارداشلريله قارداشجه كچينمكدر .

۶ -- تبعه نك حقوقى محافظه يه كيم بورجليدر ؟

تبعه نك حقوقى محافظه يه حكومت بورجليدر .

۷ -- حكومت تبعه نك حقوقى محافظه ايتزسه نه اولور ؟

حكومت تبعه دن بر ويا بر قاچنك حقوقى محافظه ايتز ويا سوء  
 استعمال ايدرسه اونلر حكومت حقننده مجلس مبعوثانه شكايات ايدرلر  
 فقط اولجه منسوب اولدقلرى حكومته شكايات ايتدكدن صكره ينه  
 حقوقلرى قانون دائره سنده كورلرزه اوزمان مجلس مبعوثانه شكايته  
 حقلرى واردر .

### تشبث شخصى

تشبث شخصى ، هر كسك كرك منفرداً كرك مجتمماً  
 چاليشملى و چاليشمق ايجون لازم كلن واسطه لره تشبث  
 ايتمليدر . تشبث شخصى ، هر كسك كندى اكمكنى كندى  
 سهيله قزائمسيدر . تشبث شخصى هر كسك كندى سعادتي  
 شونده بونده دكل بالذات كندنده آرامسيدر . هر كسك بر  
 نقطه استنادى واردر . هر كس اونقظه استنادى كندنده آرامليدر .  
 اكر كندنده آرامزسه ايسته او زمان استبداد و فلاكته محكوم  
 اولور . مثلاً : بر چوجق معيشت ، تربيه ، ثروت و سعادت

کبی مختلف اسباب بدن عبارت بولتان کندی نقطه استنادی  
کند. نده ، بالذات کندی سینه آرمیویده کندی عائله سنده  
آراسه عائله سیده باشقه عائله ده اوده باشقه سنده ویا حکومتده  
ویا خودده بولنلک هبسی ده حکومتده آزارلر و بو صورتله هر  
کس بر برینه تبصیه ، استبداد و تحکیم حصول و تشکیم میدان  
ویرلر . فقط عکسی حالده انسانلر هر درلو سعادتی اکتساب  
ایتمک ، کندی الرنده اولدیغنی ایجه بیلسه لر و اوصورتله کنیدیلرن  
و کندی سایلرندن باشقه هیچ کیمسه یه اهمیت و یرمه سه لرایشته اوزمان  
کندی نقطه استنادلرینی کنیدیلرنده تقرر ایتدیرمش اولورلر .  
انسانه بویله جه کندی نقطه استنادکاهی باشقه سنده آراتان  
و بو صورتله متاسلا بر تحکیم و استبداد تشکیل ایتدیرن  
اسباب درتدر : بریمی سوء تربیه ؛ ایکنجیسی عظاالت  
اوچنجیسی حکومته اولان اعتماد ، دردنجیسی ایه سوء اعتقاددر .  
برنجی شق : هر چو جق کندی عائله سندن ناصل بر تربیه  
ابتدائییه آلیرسه اوکا کوره حرکت ایدر . ایلریده تحصیل  
و کالانه مظهر اولورسه بالطبع او تربیه یی دیکشیدیرر .  
اوله مازسه اویله جه قالیر . بونک دخلی بیوکدر . بر چو جقک  
عائله سی اوکا بوکا بویون اکن ، کندی سعادت و معیشتنی  
باشقه لرینک سینه ، قزانجنده ، پارسنده آریان ویا حکومته  
قویروق صالایان طاقندن اولورسه چو جقده اویله جه تربیه  
کوره چکنندن بالطبع اوده اویله سلوک ایدر .

ايكنجى شق : انسانك بحق تشبث شخصى دائره سنده  
مظهر سعادت اوله بيلمسى ايچون چوق چاليشمى ، چوق  
يورولمى ايجاب ايدر . بوايسه تابللرك ايشى دكلدر . تابللر  
هر شى قولايجه بولوب صرف ايتك ايسترلر بوكا موفق  
اوله بيلمك ايچون ده شونك بونك امرى ، تحكى آلتده  
قالغه راضى اولورلر ؛ چاليشوب چبالايوبده كندى سى  
ايله تدارك ايتديكى اككى بر راحت وجهدان ايله يىكى ،  
تنپورانه اوطوروبده شونك بونك عتاب وتحقير زهرنا كيله  
يكه ترجيح ايتزلر .

اوجنجى شق : حكومه اولان امنيت واطمئنان همان  
برقوى بوتون بوتون فلاكته دوشورمك درجه ده مؤثر  
اسبا بندر . هر حكومه مختلف عناصر واردر . بو عناصردن  
هانكىسى حاكم ايسه او عناصرك افرادى فقر وسفالت محكومدر .  
سببى ايسه صرف حكومه اولان اعتمادلريدر . وبو صورته  
كندى نقطه استادكاهلرني كنديلرندن قالدوروب حكومه  
قورلر . مثلا : بزم متمزك ، ترك ، عرب ، ارناوود ، روم ،  
ارمنى ، يهودى كې يك چوق اقوامدن مركبدر . بو اقوام  
مياننده اك زياده فقير وسفيل قالان ايسه تركلردر . اولردن  
صوكره محكوم سفالت اولانلر تكميل اسلاملر كلير ، ديكر  
عناصر بالعكس زنكين وهر برى بر صورته مسعودر .  
روسيه ده ايسه يته بويلدر . ملت حاكمه اولان موسقوولر

فقر و سفاقت در . اورادہ کی اسلام لر ایسہ بالعکس غالب  
 وز نکیندر لر . ایستہ بوکا سہ بیت ویرن شی اومتک حکومتی  
 بنسہ می اوکا ربط قلب ایدوب - کوبا حکومت اونک هر بر  
 صورتہ حایسی ایش کی - کندی تشبثی قبر مسیدر . ملت  
 حاکمہ نک بویہ جہ محکوم فقر و ضرورت اولسنہ سبب صرف  
 کندی نقطہ اسلام لرینی حکومتلرنده آرام لریدر . دیگر  
 عناصرک بو حالہ محکوم اولماسی ایسہ ہرنہ قدر اولردہ نقطہ  
 اسلام لرینی حکومتدہ آراسہ لر بیلہ بالذات مات حاکمہ قدر  
 او نقطہ یہ کمال اطمینان ایلہ اعتماد ایدہ مدکلرندن نقطہ استناد .  
 کاهلرینی ینہ کندیلرینہ ارجاع ایتدیر لر . ایستہ بوسایہ دہ  
 مملکتک معارف ، صنایع ، تجارت ، زراعت کی اسلامی  
 نقطہ لرینی اللہ ایدرک ظاہردہ قورو برنام ایلہ او طور اقلرہ حاکم  
 اولانلرہ حقیقتدہ اکثر اولان بارہ قوتیہ حاکم اولور لر بر مات  
 حاکمہ نک محکوم سفالت اولمہ نک بوندن باشقہ بر سببی دہا وارد رکہ  
 اودہ مذکور اولد قلی حکومتک جور و جزا ، آئندہ ازلمسیدر .  
 دردنجی شق : سوء اعتقاد نتیجہ سی اولہرق ، هر کس  
 کندی نفسنہ اعتماد ایدہ جکی یردہ اللہ اعتماد ایدر . ای ،  
 کوتو ہرنہ کایرسہ آلاہدن بیایر . بوصورتہ هر شیک اسبابنہ  
 تسلیم ایتیز . حالبوکہ اللہ انسانلرہ ارادہ و اختیار و یرمش  
 ابنہ تثبت ایتدکجہ هیچ بر شئی و یرمہ جکینی دہ یوزلر جہ  
 ایلہ امر بو یورمشدر . کندیلرینہ کورنمیو بدہ آلاہ

کوہنن کی مسہر کندی اللریہ کندی فلا کتلیخی حاضر لاش  
اولورلر . سعادتك حصولی ایچون هرشیدن اول اعتماد نفس  
شرطدر . هرکس کندیسنک پادشاه ذی شانی اولماید . کندی  
نفسلرینه اعتماد ایتیموده اللهه اعتماد ایدنلر وهر درلو ایلدیکی ،  
سعادتی اللهدن بکلینلر کندی نقطه استنادکاهلریخی کندیلرندن  
قالدیروب اللهه قورلر ، وبو سوء اعتقاد نتیجه سیله اللهک امر  
ایتدیکی اسبابه توسل ایتدکلرندن هر درلو فلا کته محکوم اولورلر .  
برایشه ناصل تشبث ایتلی واو ایشی نهایته قدر ناصل  
نتیجه نلیرملی ؟

برایشه ، تشبث ایتک ایچون اول تشبث اولنه جق ایشی  
ای بیاماید . اوایشک فائده وضررینی هر بر شمولیه ایجه  
دوشونملی ، اوندن صکیره اجراننه قرار ویرماید . اجراننه  
قرار ویریان بر شی ایه درحال اجرا ایتماید . اگر انسان  
اوزون بویلی بر شیده قرار ویروده قوددن فعله چینارلدینی  
حالده فائده سی کوریه جکی تحقق ایتدیکی تقدیرده اونی اجرادن  
چکنیرسه هیچ بر شیده تشبث اولنه ماز وهیچ بر شی ده میدانه کلز .  
انکلیرلرک بوقدر مترقی اولمیرینه ، مملکتلری ایکی  
اطمدن عبارت اولدینی حالده بوکون اوچیوز میایونلق  
بر نفوس عظیم ایه بوتون دنیا یه بایرلمیرینه . بده تشبث اولماید .  
انکلیرلر حاکم لردن بریسی « موفقیت اوچ شرطی وارد  
برنجیدسی تشبث ، ایکنه جیدی تشبث اوچنجه جیدی تشبثدر » دیمشده

دیگر بر انکلیز عالمی ایسه «موفقیّتک اوج شرطی واردر .  
برنجیسی جسارت ایکنجیسی جسارت اوجنجیسی ینه  
جسارتدر ، دیمشدر .

اوجنجی بر انکلیز عالمی ایسه «موفقیّتک اوج شرطی  
واردر برنجیسی ثبات ایکنجیسی «ثبات» اوجنجیسی ینه  
ثباتدر ، دیمشدر . دیگر برعالم ایسه بونلری برلش-دیره رک  
«موفقیّتک اوج شرطی واردر: بریسی جسارت ، ایکنجیسی  
تثبت اوجنجیسی ثباتدر ، دیمشدر .

فی الحقیقه بونلر تشبث شخصیه کوزدیهلک اک مهم  
نقطه لردر . بر شهرک بر محله نکه اهلایسی اجتماع ایتملی ، شهرده ویا  
محله ده مکتب ، مدرسه ، بقایه کبی نقصان شیلری دوشونملی  
بینلرنده براغانه تشکیل ایدوب بونلری یاعملی یالکیز برکیسه نکه  
موفق اوله میه جنی بر شیئه اشتراک و اغانه سایه سنده موفقیّت  
پک قولایدر . فرانسلر بر جوق سیاسی جمعیتلر تشکیل ایدورلر ،  
حالبوکه بونلرده بوشلق ، بوشاقدن متولد بر آچایق حس اید-  
یایور . بونلرک هانبتون سعلیلری نتیجه سز ، نمرسز قالبور .  
انکلیزلر ایسه دائما میشت وائتصاد اوزرینه جمعیتلر یاییورلر .  
حکومه مداخله ایتییورلر . بو سایه ده پک جوق شیلره موفق  
اولیورلر . برانکلیز کندی نه اسالی برمدار میشت بولمق ایچون  
کندی ملکیتده چالشیور ، بوکا موفق اولورسه نه اعلا اولورسه  
مملکتی ترک ایدیور ، دیار دیار دولاشیور ، نهایت بریرده



کندينه مناسب برا کمک بوليور ، اوصورتبه استراحتنی تأمين ایدیور . آورو بانک هر هانکی طرفنه کیدله متعدد انکلین سیاحلرینه تصادف اولنور ، بونلر پک زانکین اولدقلری حالده اشتراك سایه سنده هر شیده موفق اولدقلری کبی سیاحتمده موفق اولیورلر . وائئای سیاحتمده بر معدن ویا برایش کورورلر سه در حال اونی اجرایه چالیشیورلر و نتیجه سنک صوکنه قدر دثبات ایدیورلر بویله تشبثک نتیجه سی البتده عقیم قالمیور .

هر شیدی حکومتدن بکله مک نه قدر عبث ونه قدر شایان تأسفدر . ملت کندی حاکمینی تأمين ایچون مطلقا تشبث شخصی به درت ال ایله صارلمایدیر . برملتک سعادت و سلامتی ایچون تشبث شخصیدن باشقه مؤثر هیچ برشی یوقدر . بمضلری بر تجارت ویا بر ایشه باشلامق ایچون پاره سزلقدن شکایت ایدیورلر . بوبک بیوک بر خطادر . پاره ایله ایشه باشلامق پاردیه پاره قزاندر مقدر . معرفت پاره سز ایشه باشلایوب آرین تربی صاری آلتونه قلب ایتمکدر . فقط کسب ثروت ایچون بارمدن زیاده تشبثک دخلی واردیر . تشبث شخصی اک بیوک وتوکنمز بر رأس المالدیر . انسان هر شیده پاره سیله دکل فکر یله ، تشبثیله ، فکر تشبثیله تشبث شخصیدیله مظهر و موفق اولور .





